

**NATIONAL ASSEMBLY OF
SEYCHELLES**

Tuesday 12th March 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye ki pe asiste nou, e nou piblik. E en bonzour spesyal pour nou bann viziter dan Galeri, ki bann zabitan English River e mon krwar en group spesyal. Kontan ki zot in zwenn nou ozordi. Mon a donn laparol Onorab Labonte pour dir zot en bonzour byenveni.

HON ANDY LABONTE

Mersi Mr Speaker. Bonzour Mr Speaker. Bonzour tou koleg Onorab. Bonzour tou *staff* Sekretarya e tou zabitan La Rivière Anglaise. En bonzour spesyal tou zabitan La Rivière Anglaise.

E nou bann trwazyenm az ki la anler dan Galeri ki ganny akonpannyen par mon *clerk* Ms Kathleen Charles avek nou *DA*

Ms Jency Volcère. E mon swete ki zot a kapab pas en bon bomaten avek nou, pou war ki mannyer nou travay i deroule. E ki i ava annan respe avek lape dan nou Lasanble, an sinye respe pour nou trwazyenm az ki la anler - *Senior citizen*. Mersi.

MR SPEAKER

Mersi Onorab. Nou a fer Prezantasyon Papye. Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble; tou bann dimoun ki dan Galeri e tou dimoun ki pe ekout nou. Bann Papye ki pe ganny prezante bomaten i;

*S.I. 112 of 2023
Environment Protection
(Environmental Levies)
(Amendment) Regulations, 2023*

*S.I. 113 of 2023 Financial
Institutions (Capital Adequacy)
(Amendment) Regulations, 2023*

*S.I. 114 of 2023 Business
Tax (Amendment of Fifth
Schedule) Regulations, 2023*

*S.I. 115 of 2023 Seychelles
Pension Fund (Membership and
Contribution) (Amendment)
Regulations, 2023*

*S.I. 116 of 2023 Seychelles
Pension Fund (Retirement)
(Amendment) Regulations, 2023*

S.I. 117 of 2023 Social Security (Benefits) (Amendment) Regulations, 2023

S.I. 118 of 2023 Electricity (Amendment) Regulations, 2023

S.I. 119 of 2023 Water Supply (Treated Water) (Charges) (Amendment) Regulations, 2023

S.I. 120 of 2023 Seychelles Revenue Commission (Amendment of Schedule) Regulations, 2023

S.I. 121 of 2023 Immovable Property Tax (Exemption) Order, 2023

S.I. 122 of 2023 Excise Tax (General) Regulations, 2023

Report on the 64th Session of the OACPS Parliamentary Assembly and Constitutive sessions of the OACPS – EU Joint Parliamentary Assemblies, Luanda – Angola 17th to 21st of February, 2024.
Mersi Mr Speaker.

MR SPEAKER

Mersi Madanm Clerk. Nou a al lo *Private Notice Question*. Nou ava apel Minis pou antre pour kestyon silvouple.

Bonzour Minis pour Zafer Entern, Errol Fonseka e mersi pou avek nou pou pran *Private Notice Question*. Onorab *Leader Lopozisyon* a met son kestyon silvouple?

HON SEBASTIEN PILLAY

Mersi Mr Speaker, bonzour. Bonzour tou dimoun ki dan Galeri, bann dimoun English River. Byenveni dan Lasanble Nasyonal. Bonzour tou dimoun ki pe ekout nou e bonzour tou koleg Onorab. E byensir bonzour Minis dan Lasanble ozordi bomaten.

Mr Speaker, mon *Private Notice Question* i lir koumsa; Swivan deklarasyon fer par Mr Jitesh Shah, Sef Egzekitiv pour Lazans Lenfrastriktir, ki Gouvernman pa responsab pour sa ki'n arive kot CCCL le 7 desanm;

Eski Minis i kapab dir nou lekel ki responsab? E eski Minis i osi kapab dir nou ki zistans lenvestigasyon in arive e kan eski nou ekspekte ganny sa rapor? Mersi Mr Speaker.

MR SPEAKER

Mersi. Minis, ou repons silvouple?

MINISTER ERROL FONSEKA

Mersi Mr Speaker. Premyerman, bonzour Mr Speaker. Bonzour *Leader of Government Business, Leader Lopozisyon*, tou Manm Onorab lo tou le de kote latab; Tou dimoun a lekout; nou bann *visitors* ozordi, e mon tande sorti English River e ki enkli osi

nou bann trwazyenm az anler laba. Byenveni e espere ki zot annan en bon letan dan Lasanble ozordi.

Mr Speaker, avan mon reponn sa kestyon mon ti a kontan pas mon kondoleans lo sityasyon lanmor Mr Nelson Barbe ki'n arive yer. E pas mon kondoleans a lafanmir Barbe, lafanmir Palmyre e son madanm Gemma. E tou dimoun. Nou tou nou konn Nelson tre byen. En dimoun ki'n dan *tourism* pour en bon letan. Depi ler *tourism* ti konmanse 1972. Apre *airport*, in travay for.

E i en dimoun ki donn sa legzanp nou Seselwa lontan ki ti travay for. Travay for, ou gannyen apre. Ozordi nou anvi gannyen, apre nou travay for. So sa en legzanp ki nou war dan sa bann dimoun lontan. So nou – ozordi nou pe pans ver zot sityasyon e tou nou kondoleans a lafanmir.

Mr Speaker, mon a retourn *back to* kestyon Onorab. Mersi Onorab pour ou kestyon.

Mr Speaker, sa levennman trazik ki ti arive le 7 Desanm lannen pase, i annan en lenter nasyon. E tou Seselwa – e partikilyerman bann zabitan Cascade, Petit Paris, Providence, Pointe Larue, tou

sa bann zabitan ki'n ganny afekte direkteman i anvi konnen ki pe arive.

Alors ozordi mon anvi dir Lasanble e tou Seselwa, an partikilye sa bann zabitan ki'n ganny afekte, ki lensidan leksplozyon le 7 Desanm kot CCCL i en ka lapolis e i annan en lenvestigasyon ki pe ganny fer.

Aktyelman, ozordi lapolis menm pe fer plizyer keksoz. Me i ankor pe espere pou ganny zimaz CCTV ki ti'n ganny anrezistre lo sistenm *camera* kot CCCL, e ki ti'n ganny andomaze par leksplozyon.

Bann eksper i ankor pe sey rekiper sa bann zimaz, pour mye kapab etabli sa ki'n pase sa zour. Nou espere ki zot a reisi fer sa.

E antretan Mr Speaker, lapolis i an kominikasyon avek Atorni Zeneral. E letan sa proses in ganny konplete, Atorni Zeneral koman sa biro endepandan ki ansarz prosekisyon kriminel dan pei, i ava pran desizyon lo kontinyasyon Zidisyer sa *case*.

Pou napa okenn rapor ki pou ganny met devan Lasanble Nasyon. Akoz? Akoz letan lapolis i fer son travay, parey dan tou ka kriminel, i pa donn okenn rapor avek Lasanble

Nasyonal, me avek Biro Atorni Zeneral. Mersi Mr Speaker.

MR SPEAKER

Mersi Minis. Bon, nou a pran kestyon. Nou konmans avek Kestyon Siplemanter pour ziska apepre 9 er 45. Nou a pran kestyon ki nou kapab mete dan sa letan. Onorab Cosgrow?

HON WALLACE COSGROW

Mersi Mr Speaker. Bonzour Mr Speaker. Bonzour Minis. Bonzour tou Manm Lasanble, tou bann dimoun anler dan Galeri sorti Rivière Anglaise. Bonzour tou manm piblik.

Mr Speaker, Minis bomaten in vini in dir nou poudir lenvestigasyon pa ankor fini. Zot ankor pe esper rezilta CCTV kot CCCL. Me nou annan en zofisye Gouvernman ki dir avek nou poudir Gouvernman pa responsab.

La mon le retourn lo mon *statement* ki mon ti fer dan SONA. E ki personn ziska prezan pa ankor anvoy ni en *Right of Reply* kot Lasanble. E ni *challenge* mon *statement* ki mon ti fer.

E mon pou dir kategorikman Mr Speaker. Lenformasyon i se ki, lapolis...

MR SPEAKER

Onorab, ou la pou demann en kestyon?

HON WALLACE COSGROW

Mon pe al demann mon kestyon. Mon pe *build* mon kestyon.

MR SPEAKER

Sorry. Sorry. Sa bann size sansib la, mon konnen i anmenn en kantite kontrovers. Me selman nou bezwen swiv lord ki devan nou. Ou la pou demann en kestyon. Ou pa la pou *argue* en *case*. Silvouple, demann en kestyon si ou annan.

HON WALLACE COSGROW

Mr Speaker, mwan mon santi ki bomaten, Minis pa'n vin donn nou tou laverite.

MR SPEAKER

Ok. Demann li son kestyon.

(laughter)

HON WALLACE COSGROW

Mon kestyon Minis; eski dan zot lenvestigasyon, eski i annan posibilite kot sa *statement* ki mon ti fer dan SONA - kot lapolis, larme i annan *container* laba kot CCCL, eski sa in ganny resorti *or* pe ganny resorti dan zot lenvestigasyon?

E se pour sa rezon ki ozordi ou pa pe vin donn nou tou laverite devan...

MR SPEAKER

Ou'n demann ou kestyon. Ou pa kontinyen – silvouple, lezot Manm, veye ki mannyer zot demann zot kestyon. Parey Minis in dir, sa i en lenvestigasyon ki dan lanmen lapolis. E mon konpran i en *ongoing investigation*.

(comments off-mic)

MR SPEAKER

Onorab, mon pe koze silvouple!

Avek sa, zot a konpran poudir i kapab annan serten size ki petet nou Lasanble pa kapab ekspekte repons lo la. Me selman mon pou les - zeneralman mon pou les kestyon dan lanmen Minis pour li zize ki sa ki i kapab reponn. Ki sa ki i pa kapab reponn. Minis?

MR SPEAKER

Mersi Mr Speaker e mersi Onorab pour ou kestyon. E i normal pour en pti leksitasyon dan sa sityasyon. E tou dimoun i enpasyante, e nou bezwen konpran sa.

Me selman sa ki enportan – sa ki tre enportan pour dimoun konpran, nou bezwen

en rezilta lenvestigasyon ki kler. Nou pa oule konmans koz lo keksoz ki nou pa ankor ganny *the facts*. Tou met ansanm. I pa zis en bout sa. I en lenvestigasyon. I en seri sityasyon ki'n arive.

E sa nou bezwen ase matir pou kontrol nou *impatience* si ou le, e annou ekout sa - esper sa rezilta akoz i enportan. I en sitasyon tre enportan. I pa en zouzou sa. En leksplozyon. E nou bezwen aprann dan tou sitasyon, so annou konpran sa lenportans sa *investigation*, e respe bann Lotorite ki pe *deal* avek sa. Mersi Mr Speaker.

MR SPEAKER

Mersi. Onorab Spiro?

HON RACHEL SPIRO

Mersi Mr Speaker. Bonzour tou dimoun ki a lekout. Bonzour bann dimoun ki envite dan Galeri. Bonzour Minis. Mon kestyon i koumsa;

Plizyer dimoun in ganny afekte e in ganny blese fizikman e ganny tromatize. Eski Gouvernman pe dir ek sa bann dimoun ki zot pa bezwen al rod rekour devan lazistis? E si zot pa pe kapab dir ek sa bann dimoun ki pe arive dan sa lenvestigasyon...

MR SPEAKER

Sorry. Sorry! Napa okenn rapor avek kestyon lenvestigasyon lapolis dan sa ki ou pe demande.

Silvouple Onorab, si ou annan en kestyon ki i annan rapor avek lenvestigasyon lapolis, ou kapab poz li la. Si non, nou *move on next question*.

HON RACHEL SPIRO

Mr Speaker, vi ki Minis in dir ki lenvestigasyon i ankor *ongoing* – i *ongoing*, eski sa bann dimoun i kapab ganny rekour ek lazistis? Si zot anv zot kapab al anmenn Gouvernman Ankour, oubyen lezot dimoun ki zot krwar i enplike dan sa zafer? Eski zot pa santi soufrans sa bann dimoun...

(Interruption)

MR SPEAKER

Sorry! Sorry! Zot pou demann en kestyon ki annan rapor avek lenvestigasyon parey kestyon orizinal i demande. Si non...

HON RACHEL SPIRO

Mr Speaker, sa kestyon i annan relevans.

MR SPEAKER

Si non, napa kestyon.

(Interruption)

MR SPEAKER

Onorab Monthy, ou kestyon?

HON PHILIP MONTHY

Mersi Mr Speaker. Bonzour Mr Speaker. Bonzour tou viziter dan Galeri e bonzour spesyal tou bann zabitan Cascade e prezizeman Petit Paris, Brilliant.

Kestyon; Minis, ki garanti ki ou pe donn bann zabitan Cascade pli prezizeman Petit Paris, Brilliant, ki lanket pou terminen o pli vit posibil? E ki baze lo rezilta ki sa lenvestigasyon a prodwi, ki Gouvernman pou fer sa ki nesesser pour ki sa bann viktim a ganny sa lazistis ki zot pe rode?

Dezyenm kestyon; eski Minis i kapab konfirman ki atraver bann led ek lasistans ki Gouvernman in donner, ki napa okenn zabitan ki'n ganny kit deryer baze lo zot afilyasyon politik, ki tou dimoun...

MR SPEAKER

Sorry!

HON PHILIP MONTHY

...ki tou dimoun in ganny ede san leksepsyon. Mersi.

(Interruption)

MR SPEAKER

Order!

(APPLAUSE)

MR SPEAKER

Minis! Minis, premye kestyon i annord. I an relasyon avek lenvestigasyon. Dezyenm kestyon napa relasyon avek lenvestigasyon, Minis, ou repons silvouple lo premye kestyon?

MINISTER ERROL FONSEKA

Mersi Mr Speaker. Mersi Onorab pour ou kestyon. Onorab, avan mon reponn ou kestyon, mon le rekonnèt sa travay entans ki ou'n fer ek lezot lasistans lezot dimoun ki'n donn ou ed. Mon ti war Onorab Zialor laba, pe ed nou dan son fason ki i ti kapab fer.

So sa sityasyon tre difisil e sa louvraz ki ou'n fer, nou bezwen rekonnèt sa. Nou bezwen rekonnèt sa. Me i pa zis ou, lezot dimoun osi in vin ladan. So nou bezwen rekonnèt tou bann dimoun ki'n travay for dan sa sityasyon.

Ou premye bout kestyon; si nou bezwen fer sa lenvestigasyon o pli vit posib? Non, nou pou fer li byen. Sa i pli enportan ki fer keksoz pli vit posib. E si ou pa ganny en bon rapor.

E sanmenm sa mon pe demann tou dimoun ozordi, annan sa pasyans. Sa i pa en pti zouzou sa. En keksoz serye. Annou fer keksoz byen, nou a konnen ki mannyer sa in arive.

E mon le reasir ou Onorab, ki sa Gouvernman i la pou defann byennet son sitwayen, espesyalman sa bann ki'n ganny afekte par sa leksplozyon. En lensidan ki'n arive ki pa zot fot ditou. I pa zot fot. Zot ti a pe dormi se zot ler sa ti arive. *Ok?* Nou konnen. Nou respekte ek sa. E nou bezwen pran tou sa bann zafer an konsiderasyon.

Me, lensidan in arive. La nou bezwen mars devan e fer sir ki nou ganny en bon *investigation*. Nou avans devan. E kot nou kapab, rod resours. Menm, nou'n fini donner resours lo sa premye zour. Nou ti a pe travay lo la. E nou pou kontinyen gete kot nou kapab eksplike anver tou viktim dan sa lensidan.

E i enportan pour nou dir ki nou ler nou travay dan sa bann sityasyon, napa malis parmi nou. Nou pou ed nenport dimoun. Menm *Leader* Lopozisyon la i pou kapab konfirm ek mwan ki sa zour i ti a pe travay li osi. I ti ape travay li osi. *Ok?* E menm Minis

Hoareau ti ed ou ek en pe *plywood*.

I normal sa. Nou bezwen ed – non, non. Nou bezwen ed tou dimoun. Normalman sa. E sa i enportan ozordi, ki si nou fer sa, nou fer keksoz byen, i ler pour nou bouz sa pei devan.

So, konpran nou sa sityasyon Onorab, nou bezwen fer sa lenvestigasyon byen. Mon krwar mon'n eksplik sa ase byen Mr Speaker. Mersi.

MR SPEAKER

Mersi Minis. Onorab Woodcock?

HON WAVEL WOODCOCK

Mersi Mr Speaker. Bonzour Minis. Mon kestyon i konm swivan;

Minis, si apre ki lenvestigasyon i konplete e CCCL i ganny trouve responsab, eski bann zabitan sa 2 distrik; Cascade ek Pointe Larue ki'n ganny afekte avek sa lesplozyon, sirtou Petit Paris, pou kapab pourswiv sa de 2 propriyeter CCCL – sa 2 *shareholders* Mr Sunny Khan ki annan 99poursan *share* e Mr Leopold Payet ki annan 1poursan *share*, Minis? Mersi.

MR SPEAKER

Mersi. Mon war ki Onorab in lev en pwen ki Minis pa ti ankor

pronons li lo la. E sa se lekel ki responsab?

MINISTER ERROL FONSEKA

Mersi Mr Speaker.

MR SPEAKER

Minis, ekout mwan en pti kou Minis. Minis, realize poudir Manm i kapab demann kestyon lo ou repons ki ou donner osi. So sa i permet.

Me selman pwen ki mon'n fer se ki napa personn ki'n ganny deklare responsab dan sa. Sa i en pwen ki ou ou'n deza fer. Mersi.

MINISTER ERROL FONSEKA

Mersi Mr Speaker. Mr Speaker, mon ti pou al lo sa menm laliny. Konman Minis, mon pa kapab reponn *hypothetical question*. E sa i ti vreman en *hypothetical question*. Mersi Mr Speaker.

MR SPEAKER

Mersi. Onorab Lemiel?

HON SYLVANNE LEMIEL

Mersi Mr Speaker. Bonzour tou bann dimoun dan Galeri, tou sa ki pe ekout nou. Bonzour Minis.

Mr Speaker, mon kestyon i se ki; parey LOTO in anmennen, Mr Shah in vini in dir ki Gouvernman napa tor li dan sa zafer. Sa in ganny dir sa. Zot pa responsab, *ok?*

Si zot pa responsab, petet mon ti a kontan Minis i dir nou ozordi, i annan en Lagreman ki bann dimoun Cascade pe ganny demande pou sinyen par SIA lo lapar Gouvernman, ki konmkwa zot pou napa drwa pou pourswiv Gouvernman.

So mon ti a kontan konnen petet akoz ki sa Lagreman in ganny tire, i pe fer sa bann dimoun sinyen, si Gouvernman pe dir ki li i pa responsab pour sa zafer? Mersi.

MR SPEAKER

Mon pou les Minis. Minis, ou a zize si ou annan repons.

MINISTER ERROL FONSEKA

Mr Speaker, ozordi mon'n vin isi pou *answer* kestyon lo leksplozyon. E lo kestyon – lo lezot kestyon ki a vini, mon ti a kontan demann tou Manm Lasanble, si zot anvi *table* en lot kestyon, *please* fer sa e nou a vini.

(APPLAUSE)

MINISTER ERROL FONSEKA

Be ozordi mon pa pe – mon pou *deal* ek sa. E i enportan ki mon pe al dir zot. Nou letan nou vin dan Lasanble pou ed zot ek lenformasyon, si zot konmans *stray* lo sa topik, nou pe gat en ponnyen travay.

E nou'n ganny en kantite *complain* lo letan ki nou gate dan Lasanble. Dimoun pe get nou. So annou *focus* lo kestyon. Si zot annan okenn lezot kestyon apre, *by all means*, prepare anvoye. Nou pou *deal* ek sa. Mersi Mr Speaker.

MR SPEAKER

Mersi Minis. Si ou zize sa kestyon pa apropiye, ou kapab evite reponn. Onorab Vidot?

HON AUDREY VIDOT

Mersi Mr Speaker. Mon a dir bonzour Mr Speaker, Minis, tou Manm Onorab, travayer Lasanble e osi bann dimoun ki dan Galeri sorti English River, *welcome*.

Mon kestyon Mr Speaker, prenan kont tou sa ki pe ganny dir, eski - zabitan Roche Caiman, Cascade, Les Mamelles ek Point Larue ki viktim lensidan le 7 Desanm, zot le konnen Minis; kwa ki Gouvernman pe kasyet zot? Akoz ki Gouvernman pe ezite pou vin devan pou dir laverite? Mersi.

MR SPEAKER

Mersi. Mon pa krwar poudir sa kestyon i apropiye. Ou pe *assume* ki Gouvernman pe kasyet keksoz. Minis, ou annan okenn repons pour sa?

MINISTER ERROL FONSEKA

Wi Mr Speaker. Parey mon'n dir, mon'n vin la pour nou serye lo en louvraz serye. Annou serye ek nou kestyon osi. Mersi.

MR SPEAKER

Mersi. Onorab Loze?

HON JOHAN LOZE

Mersi Mr Speaker. Mr Speaker, Mr Jitesh Shah ki mon *assume* i form parti menm Gouvernman ki Minis, in fer li en *unequivocal statement*, konmkwa ki Gouvernman pa responsab pour sa leksplozyon kot CCCL. Sa i tre kler.

Now, kestyon ki mwan mon annan pour Minis; Minis, nou pe ganny diferan lenformasyon. Mr Shah i pe azir konmkwa ki li i annan en repons final. E ou, ou pe dir nou napa repons final. Pa ankor pare, pa ankor fini.

I annan dimoun an se moman Cascade ki ankor pe *struggle*, pa ankor ganny okenn lasistans.

MR SPEAKER

Bon, poz ou kestyon Onorab.

HON JOHAN LOZE

Minis, mon kestyon i senp. Eski ou Gouvernman pa'n tro tarde, tro anpaye, tro gaspiy letan e

zot in *bungle* sa sityasyon ek son lenvestigasyon, e ki prezan sa pep pe soufer?

E mwan mon anvi konnen, eski nou pe ganny laverite ek ou ozordi Minis, ouswa ou pe dir...

(APPLAUSE)

MR SPEAKER

Minis, Onorab in konmans avek en pwen ki ti valab. Si ou kapab zis adres sa ki valab pour lenvestigasyon.

MINISTER ERROL FONSEKA

Mr Speaker, mersi. Onorab, mersi pour sa kestyon, Me i paret mwan le 7 Desanm ou ti a pe dormi lazournen lazournen antye, akoz tou sa lasistans ki menm zour nou'n donn dimoun lo sa premye zour. Mwan menm mwan...

(laughter)

(APPLAUSE)

MINISTER ERROL FONSEKA

Mon menm mwan, menm sa bann biznes Providence, nou'n travay, nou'n travay. Ler in ariv 3er, tousala ti an sekirite depi bomaten. Be, mon pa le al dan bann lezot zafer. Me selman si ou *compare* ek lezot sityasyon

ki'n arive, konbyen letan dimoun in espere pour...

Mon pa konnen konbyen lakaz – 80 plus keksoz koumsa, ki Onorab in *deal* avek. So i totalman fo sa ki ou pe dir. Nou'n la pour ed tou dimoun. Nou pou kontinyen ed tou dimoun. E nou'n montre sa legzanp. Nou'n montre sa legzanp e nou pe fer li.

Menm ozordi zot konnen kwa? Nou pe ganny kritik. Menm par nou siporter, aköz nou pe ed tou dimoun. E nou pou kontinyen fer sa. Aköz sa i nou bi pou ed tou Seselwa dan ler en problem i arive. Mersi Mr Speaker.

(APPLAUSE)

MR SPEAKER

Nou a sey – nou a sey gard kestyon...

HON AUDREY VIDOT

(Off-Mic)

Point of order Mr Speaker! *Point of order.*

MR SPEAKER

Mon pa pe pran *point of order.*

HON AUDREY VIDOT

(Off-Mic)

Point of order Mr Speaker!

MR SPEAKER

Onorab – Onorab Gabriel...!

HON AUDREY VIDOT

(Off-Mic)

MR SPEAKER

Sorry! Onorab, mon pe dir ou aret deranz Lasanble, sansan mon pe met ou deor! Arete! Arete!

HON AUDREY VIDOT

(Off-Mic)

MR SPEAKER

Onorab! Onorab ou a sorti dan Lasanble silvouple, ziskan - ziskan lafen kestyon. Ziskan lafen *Private Notice Question*. Ou kapab antre apre si ou annan lot kestyon.

(Interruption)

MR SPEAKER

Onorab Gabriel?

HON CONRAD GABRIEL

Mersi Mr Speaker. Bonzour tou dimoun dan *Gallery*. Bonzour tou mon bann frer, ser dan Lasanble.

Mon'n ekout Minis atantivman, e *seriously* mon santi Gouvernman i en pe *very* retisan ek lenformasyon ozordi bomaten.

So, Minis ou'n dir nou ki i en ka lapolis, lenvestigasyon pe

ganny fer. E mon panse zot pe *rely* bokou lo sa CCTV ki zot ankor pe espere pou sey rekiper bann zimaz pou ganny en konpran, *what really happened?* Ki'n arive egzaktaman?

Minis, si ler sa prosis i konplete e napa naryen ki zot in vwar atraver CCTV, ki lot rekour ki Gouvernman i annan pou konplet sa lenvestigasyon? Mersi.

MR SPEAKER

Mersi Onorab. Minis?

MINISTER ERROL FONSEKA

Mersi Onorab. En kestyon rezonnab ki ou pe demann mwann. Napa okenn lenvestigasyon ki *rely* lo en keksoz. CCTV i en bout dan plizyer keksoz ki zot bezwen regard ladan. So byensir, pou annan lezot *evidence* ki ou bezwen *correlate*.

Me, parey mon'n dir, nou bezwen fer li byen. Nou bezwen pran nou letan fer li byen. En kestyon enportan sa. Mersi Mr Speaker.

MR SPEAKER

Mersi. Onorab Aglae?

HON EGBERT AGLAE

Mersi Mr Speaker. Bonzour Minis. Mr Speaker, Minis i

bezwen konpran poudir rol en Manm Parlman se pou kestyonnen kwa ki Gouvernman i fer e bann desizyon.

Minis, premye parti kestyon se lekel ki responsab? Sa nou pa ankor tann dir naryen. Me selman, dan diferan lenstans nou'n tann serten dimoun dan Legzekitiv i monte, zot fer bann lakizasyon lo lekel ki responsab, *without* annan en *proper investigation* ki'n terminen.

So Minis, eski ou ti prepare, aköz mon war ou ou'n vin ou tousel devan sa Lasanble la, pou vin reponn en kestyon ki ou pa le donn nou lenformasyon - ki ou ti kapab anmenn lezot antite konsernen baze lo kestyon ki *LOTO* in mete?

E eski Minis ou'n prepar ou pou vin reponn sa kestyon pou kapab donn Manm Lasanble - ki nou rol pou demann kestyon, bann lenformasyon pour nou eklersi lo sa bann ka? Mersi.

MR SPEAKER

Mersi. Les mon a eklersi Onorab avan ou reponn Minis. Kestyon, Manm i annan drwa demann kestyon. Be, i annan en kestyon ki'n ganny mete an ekrire. E se sa kestyon ki

Lasanble pe *deal* avek ozordi. Mersi. Minis, eski ou annan en repons pour Onorab?

MINISTER ERROL FONSEKA

Wi, mersi. Mon ankouraze mon'n demann kestyon, akoz sa i *healthy*. Ou bezwen demann kestyon. So napa okenn problem lo la. Me nou bezwen osi swiv serten prosedir.

E kestyon in ganny demande, in ganny reponn. E sa *investigation* napa okenn lenvestigasyon ki nou pou anmenn dan Lasanble pou diskrit, menm sa enn, menm en lot. Nou pa pou fer sa. Mersi Mr Speaker.

MR SPEAKER

Mersi. Bon, se tou Kestyon Siplemanter pour Manm. Mon envit Onorab *Leader* Lopoziyon pou poz son siplemanter?

HON SEBASTIEN PILLAY

Mersi Mr Speaker. Mr Speaker, mon ava apresye ki mon ganny loportinite pou demann mon siplemanter san lenteripsyon, e san...

MR SPEAKER

Si ou fer li annord Onorab!

HON SEBASTIEN PILLAY

Mersi Mr Speaker. Mr Speaker ler Minis in konmans reponn kestyon- li ki'n entrodwir sa, in dir pou dir sa lenvestigasyon pe depan lo sa *CCTV footage*.

Onorab Gabriel i demann li; si i pa ganny *CCTV footage*? I vire i dir ek Onorab Gabriel poudir i annan lezot fason ki i pou ganny larepons.

So, sa lenvestigasyon i sipoze pa ankor kapab fini. Pa ankor konnen kot in arive. Me selman en o zofisye Gouvernman in fer en *statement* kategorik ki Gouvernman pa responsab.

E zabitan Cascade pe ganny en Lagreman – en Lagreman ki mon annan la lo mon telefonn Mr Speaker, ki in *share* avek bokou dimoun. Ki zot pe ganny dir pa pourswiv Gouvernman. E en *statement* ki Prezidan in fer dan SONA ki in dir ek dimoun pa bezwen pourswiv Gouvernman.

Alors, eski i akoz Gouvernman ki responsab par lefe ki ti annan bann *container* pour larme e lapolis kot CCCL, se sa rezon ki Gouvernman pa oule donn lenformasyon lo sa lenvestigasyon?

Eski sa i leka Mr Speaker? Si non, Mr Shah pa ti ava vin devan pou dir Gouvernman pa responsab. Kote Mr Shah li in ganny son lenformasyon?

Mon dezyenm kestyon Mr Speaker; mon ti a kontan ki Minis i klarifye en pwen enportan pour nou. I annan bann *businessmen* osi ki'n ganny afekte. I annan zabitan ki'n ganny blese. Tou sa bann dimoun pou bezwen al rod rekour devan lazistis.

I annan dimoun pou bezwen al kot Lasirans. E i annan serten lakonpanyen – mon repete, i annan serten Lakonpanyen Lasirans pe dir; zot pe esper rapor sa lenvestigasyon.

E mon war i drol *MNA Cascade* pa'n koz lo la, akoz sa bann dimoun in koz ek li egalman.

MR SPEAKER

Onorab, Onorab, prosede avek ou kestyon.

HON SEBASTIEN PILLAY

Mr Speaker, sa ki mon le Minis i klarifye; ki pou arive ek sa bann dimoun ki pe esper rekour avek bann Konpanyen Lasirans ki pe dir zot, zot bezwen ganny rapor lenvestigasyon? Kan ou, ou pa ankor kapab menm fini sa lenvestigasyon, Mr Speaker.

Mon bezwen konklir Mr Speaker, ki rezon akoz nou pa pe ganny en larepons dan Lasanble se akoz sa

Gouvernman i en
Gouvernman...

HON SEBASTIEN PILLAY

(Off-Mic)

...lalang, Mr Speaker!

(APPLAUSE)

MR SPEAKER

Onorab, bann lakizasyon lalang, silvouple rode landrwa kot i apropiye pou fer li. Minis, si ou annan en repons pour bann pwen?

MINISTER ERROL FONSEKA

Yeah. Mr Speaker, mon krwar mon kestyon in ganny – kestyon Onorab in ganny reponn tre kler. Tre kler. E ou pa kapab met *the cart before the horse*. So, *basically* sa in ganny reponn tre kler.

Me selman, fason Onorab in demann son kestyon i vremen – vremen *sad* parey nou dir. Akoz nou la pou sey anmenn en pe dinyite dan sa Lasanble, e fer bann kestyon serye, demande.

Be selman, nou'n *stray* lo sa legzanp ki nou bezwen pe donn dimoun. Alor mon krwar mon'n fini reponn tou sa bann kestyon. E mon ti a kontan ki nou annan en serten *decorum* dan sa Lasanble Mr Speaker. Mersi.

MR SPEAKER

Nou'n termin sesyon kestyon la. Mon a permet Minis - mon a permet Minis pou fer son depar. Mersi Minis.

HON SEBASTIEN PILLAY

(Off-Mic)

MR SPEAKER

Tre byen. Onorab Pillay, ou annan en *matter of privilege* wi, ki privelez?

HON SEBASTIEN PILLAY

Mersi Mr Speaker. Mr Speaker, wi mon annan en *matter of privilege*. I paret poudir sak fwa mon pou anmenn en kestyon devan sa Lasanble, ou pou zize. Ou pou determinen kwa ki Minis i devret reponn, kwa ki pa devret reponn. Ki lenformasyon piblik pou gannyen.

Eski ou war li normal Mr Speaker, ki en o zofisye dan Legzekitiv i fer en *statement* an piblik kot i dir ek dimoun poudir Gouvernman pa responsab, e Minis pa kapab adrese *whether* sa zofisye in fer en fot. I zis dir nou lenvestigasyon pa ankor fini.

Me si lenvestigasyon pa ankor fini, akoz sa zofisye in fer sa *statement*, e akoz dan sa Lagreman zot in met sa *clause*

ki dimoun pa kapab pourswiv Gouvernman?

Be Minis pa kapab reponn sa! So ki lenformasyon i pe rode? Ki *decorum*...?

MR SPEAKER

Mersi. Mersi. Mersi. Ou'n demann – ou'n fer en *matter of privilege*. E sel privilege ki ou'n mansyonnen se; si Speaker pou kontrol mannyer ou demann kestyon? E larepons lo sa *matter of privilege* se; wi, Speaker pou kontrol mannyer ou demann kestyon. Mersi.

(APPLAUSE)

MR SPEAKER

Leres ou remark napa naryen pou fer ek *matter of privilege*. Onorab Vidot?

HON AUDREY VIDOT

Mersi Mr Speaker. Mr Speaker, mon annan en *point of order*. Minis in fer serten *statement* dan Lasanble apre ki in reponn kestyon Onorab Loze. Minis pa'n donn lenformasyon ki korek.

Mon le met lo rikord Lasanble; Roche Caiman i annan dimoun ki'n ganny afekte avek lensidan le 7 Desanm. Ni Lotorite Distrik, ni SIA, okenn lezot Lazans pa'n

pas kot sa bann dimoun depi ler lensidan ti arive...!

(APPLAUSE)

MR SPEAKER

Mersi.

HON AUDREY VIDOT

Ler mon ti pas kot zot le 10. Ler mon ti antre dan pei le 9, son le 10 mon ti lo teren kot sa bann dimoun. Zot pa'n - napa okenn zofisye Gouvernman! Zot pa'n....

MR SPEAKER

Mersi.

(Interruptions)

MR SPEAKER

Mersi. Mersi. Pwen...*Order!* Pwen, si bann zabitan Roche Caiman oubyen lot landrwa in ganny vizite, i pa reflekte dan kestyon ki lo *Order Paper*. Mersi. Onorab Monthy?

HON PHILIP MONTHY

Mersi Mr Speaker. Mon le zis koriz en mis apreansyon ki *LOTO* in fer apropo Lasirans. Mon le zis fer kler ki i annan plizyer zabitan ki Lasirans in deza fini pey zot.

E ki Gouvernman in *come in*, in aziste sa bout ki manke, pour zot kapab konplet zot

reparasyon oubyen rekonstriksyon zot lakaz.

So sa ki in dir i fo, akoz la aktyelman i annan plizyer zabitan ki Lasirans in fini pey zot. E donk i fo sa ki in dir Mr Speaker.

(APPLAUSE)

MR SPEAKER

Mersi. Nou'n terminen. Nou'n terminen lo sa size. Nou pa pe antre...

(Interruptions)

MR SPEAKER

Onorab *LOTO*. Onorab!

(Interruptions)

MR SPEAKER

Order! Order! Onorab *LOTO*, nou'n terminen avek sa size. Mon pa pe antre dan en deba ant Manm lo nenport size la. Mersi. Madanm raporter, nou ava apel Minis pou kontinyen kestyon.

(Interruptions)

MR SPEAKER

Non. Onorab Pillay, *Order* silvouple! Mersi.

(Interruption)

MR SPEAKER

Onorab! Onorab, si ou anvi kit lasal, kite, ale.

(laughter)

(APPLAUSE)

MR SPEAKER

Order!

(Interruptions)

MR SPEAKER

Order! Bonzour Minis Jean-Francois Ferrari, Minis pour Lapes e *Blue Economy*. Nou annan 3 kestyon pour Minis. Nou annan apepre 15 minit par kestyon. Nou a konmans avek nimero 12, kestyon Onorab Egbert Aglae.

HON EGBERT AGLAE

Mersi Mr Speaker. Bonzour Minis avek *CEO SFA*. E osi mon rekonnèt zabitan La Rivière Anglaise. Kestyon i konm swivan;

Eski Minis i kapab dir ek sa Lasanble akòz ki i ankor annan bokou konplent par peser lo size mankman *ice* pour zot al lapes? Mersi.

MR SPEAKER

Mersi Onorab. Minis, ou repons?

DESIGNATED MINISTER
JEAN-FRANCOIS FERRARI

Mersi Mr Speaker. Bonzour Mr Speaker. Bonzour tou bann Manm Onorab. Onorab mersi pour ou kestyon.

Mr Speaker, avek respe pour Lasanble Nasyonal, mon bezwen demande kote Onorab Aglae in ganny sa lenformasyon?

Lo kote *SFA* avek Departman Lapes, ziska Vandredi pase ler mon'n ti resevwar kestyon Onorab, mon pa ti'n resevwar okenn kominikasyon, okenn konplent.

Ouswa okenn rapor konmkwa i annan mankman *ice* resaman, ki pe anpes bann peser al lapes. Sa se lenformasyon ki mon pe donn Lasanble ki dat pa pli tar ki yer, Lendi.

Mon'n osi kontakte *MNA* ki annan *ice plant* dan zot distrik, pou gete si zot in resevwar konplent lo sa size. Me larepons se ki, napa okenn konplent.

Pour ou lenformasyon Onorab e Lasanble, sel landrwa kot nou pe aktyelman fer *maintenance* pour nou bann masin, se Providence. E laba nou'n met an plas en sistenm *booking*, akòz nou bezwen fer sir ki tou bato i ganny en pe *la glace*. Pour lemoman sa

sistenm pe mars byen e tou peser pe korpere.

Alors Mr Speaker, si Onorab i kapab dir Lasanble kan e avek lekel in ganny sa bann alegasyon? Mon pou napa okenn lezot larepons pou donn li. Mersi.

MR SPEAKER

Mersi. Ou siplemanter Onorab?

(Interruption)

HON EGBERT AGLAE

Mersi...

HON SEBASTIEN PILLAY

(comments off-mic)

MR SPEAKER

Onorab Pillay, eskiz mwan. Mon pou demann ou kit lasal.

HON SEBASTIEN PILLAY

(comments off-mic)

MR SPEAKER

Onorab Pillay, ou a sorti dan lasal ziskan lafen sa peryod. Ou kapab tournen apre pour lezot kestyon. Onorab silvouple! Silvouple, sorti dan lasal.

HON SEBASTIEN PILLAY

(comments off-mic)

HON EGBERT AGLAE

Mr Speaker?

MR SPEAKER

Onorab...

HON EGBERT AGLAE

Mr Speaker, mersi. Minis, mersi...

MR SPEAKER

Onorab! *Sergeant*, mon pou demann ou ed Onorab Pillay sorti dan lasal silvouple.

DESIGNATED MINISTER

JEAN-FRANCOIS FERRARI

Mr Speaker? Mr Speaker?

MR SPEAKER

En moman Minis.

DESIGNATED MINISTER

JEAN-FRANCOIS FERRARI

Mon pa'n apresye sa menas ki Onorab Pillay in fer mwan. E mon fer ofisyelman, ofisyelman en konplent konmkwa Onorab Pillay in dir mwan; "mon annan sans i pa la pour li dray mwan." *Ok?* I en menas.

(Interruptions)

MR SPEAKER

Lezot Onorab silvouple, mon demann zot ankor enn fwa pou gard lord. Onorab Aglae, ou siplemanter?

HON EGBERT AGLAE

Mersi Mr Speaker. Mon note manner sa Lasanble pe ale. Minis, i kler ki i annan en dekoneksyon avek bann peser.

Premyerman Minis, letan nou pe koz mankman *ice*, i annan bokou *longliners* ki pe ganny *delay*, akoz zot pa pe ganny sa kantite *volume ice* ki zot bezwen pour zot al lapes. E zot in ganny dir pou dir lapes artizanal pou pran *ice* pli boner ziskan 10er. Apre si zot gannyen, zot a ganny *ice*.

Minis, lo por *SFA* Viktorya, i annan 2 fasilite *ice*. I annan enn ladan pa marse. Eski ou kapab get ladan si sa ki mon pe dir i vre, *ok*? E i annan, parey Providence – i annan landrwa plis ki 6 mwan zot pe esper pyes, pa pe ganny pyes. E sa pe fer ki sa bann *ice plant* pa pe mars lo *full capacity* ki zot sipoze ete. E se sa ki enn bann koz osi ki pe fer ki i annan *delay ice*.

E peser Mr Speaker, i perdi larzan akoz zot bezwen...

MR SPEAKER

Bon...

HON EGBERT AGLAE

...reste de a trwa zour...

MR SPEAKER

Bon, ou'n demann ou kestyon.

HON EGBERT AGLAE

...pou zot kapab stok lakantite *ice* pour zot kapab ale. E sa i kout zot transportasyon, mendev ki bezwen ganny peye. Eski Minis i kapab dir mon lalang sa ki mon pe dir silvouple?

MR SPEAKER

Ale, ou'n demann ou kestyon. Les minis reponn. Minis?

DESIGNATED MINISTER
JEAN-FRANCOIS FERRARI

Mersi Mr Speaker. Mr Speaker, mon ti a kontan dir avek Lasanble ki dan tou bann landrwa kot nou annan *ice plant*, *ice* pe ganny prodwir e *ice* pe ganny donner e pe ganny vann avek bann peser. Dan tou landrwa.

I annan en sityasyon kot ler letan i bon, ler lanmer i bon, i annan en kantite bann peser prive, bann peser okazyonnel ki vin rod *ice*. E sa i met en presyon lo sistenm.

Me nou sistenm ki an plas pour lemoman i permet ki; enn, nou fer sir ki tou bann peser artizanal i ganny dekwa *ice* pour zot al lapes. E sa i ant 7er ziska apepre 10er bomaten.

E apre sa, nou met an plas en sistenm pour nou donn *ice* avek bann peser semi-

endistriyel. Donk nou, sa ki nou pe fer, se en sistenm kot tou dimoun i benefisye. Tou dimoun i ganny ase *ice* pour li al lapes.

E parey mon'n dir e mon repete; dan *SFA*, dan Minister Lapes e lo bann por lapes, nou pann ganny okenn konplent konmkwa pa pe ganny *ice*. Nou pe fer sir ki tou dimoun i ganny dekwa pour li al lapes. Mersi.

MR SPEAKER

Mersi. Onorab Labonte, ou kestyon?

HON ANDY LABONTE

Mersi Mr Speaker. Minis, mon kestyon i plizoumwen – vi ki ou'n dir ki napa mankman *ice*, eski Gouvernman pe war nesosite pou entrodwi nouvo fasilite *ice* pour peser. E si wi, ki bann landrwa ki zot pe mazin fer sa? Mersi.

MR SPEAKER

Minis ou annan repons?

DESIGNATED MINISTER

JEAN-FRANCOIS FERRARI

Avek ou permisyon Mr Speaker, mon ava reponn. Mr Speaker, Lendistri Lapes i en lendistri ki pe bouze e ki pe agrandi toulezour. E toulezour nou bezwen met nouvo fasilite pour nou kapab *cope* avek bann

nouvo demann. Sa i normal dan en lendistri ki pe grandi.

Alors wi, toultan nou annan, par egzanp la nou annan en *ice plant* ki'n fini arive, ki nef. Ki pe al ganny mete Bel Ombre.

E i la. I dan pei, akoz nou'n war poudir demann pe ogmant dan en fason eksponansyel pour Glacis avek Bel Ombre. So nou pe met en nouvo fasilite.

Mon krwar nou annan en nouvo masin ki fek arive – *anyway*, Mr Speaker, pour mwan pa dir keksoz ki pa korek, mon ava donn laparol avek *Deputy CEO SFA*, e i ava donn zot leta ki mannyer nou pe fer sir ki nou *meet* tou kapasite tou demann.

Me selman mon ti a kontan dir ki, ou pa kapab zis konplent. Tou sa travay ki nou'n fer pour nou fer sir ki bann peser i ganny bann fasilite, ou ti a ekspekte ki zot konman bann dimoun ki apel zot lekor bann konpatriyot, zot ava omwen rekonnnet poudir i annan travay ki'n ganny fer.

Zot pa kapab zis rod lipou lo lezar! Zot bezwen kapab rekonnnet poudir travay i ganny fer e travay pe ganny fer toultan. Donk, annou ankouraz bann travayer *SFA* ki pe travay tre dir, pou met an plas sa bann

fasilite. Se sa ki nou pe demann zot.

E demann pou kontinyen ogmante. E alors, mon ava pas laparol Mr Speaker, avek *Deputy CEO* pour li donn zot bann detay en pe pli presi. Mersi.

MR SPEAKER

Mersi. *Deputy CEO*, ou annan laparol.

DEPUTY CEO SFA ASHIK HASSAN

Mersi Mr Speaker. Minis mersi pou pas laparol avek mwan. Wi, parey Minis in dir, nou pe fer nou mye pour nou kontinyen met nou azour avek demann ki kontinyelman ogmante dan en lendistri ki pe vreman *improve over the years*.

E parey Minis in osi abord lo la, Bel Ombre nou'n ganny en nouvo *ice plant* 5 tonn ki dan sa bann zour ki pe vini la, lenstalasyon pe al konmanse.

Providence, wi nou'n osi annan en masin 5 tonn osi ki nou pe al enstale dan bann mwan ki swiv. E Anse Aux Pins osi avek nouvo fasilite ki nou pe anvizaze ouver dan milye sa lannen, pou annan en masin 2.5 tonn.

Parey Minis in dir, sa i pa vedir ki i annan en mankman *ice lo market*. Me senpleman,

nou, nou pe met nou – nou pe met nou an plas ki demen ler sekter i agrandi, nou nou'n pare pou deservi sekter. Mersi.

MR SPEAKER

Mersi. Repons in ganny donner pour kestyon ki'n demande. Nou pou termin la lo sa kestyon. Onorab, nou a avans lo prosen kestyon. Onorab Egbert Aglae, ou dezyenm kestyon.

HON EGBERT AGLAE

Mersi Mr Speaker, mon note. Mon dezyenm kestyon;

Swivan vizit ki Minis ti fer lannen pase dan Port Glaud, eski Minis i kapab dir ek sa Lasanble ki zistans lo ouver sa *channel* bato dan rezyon Lapas trouve dan rezyon legliz Port Glaud? Mersi.

MR SPEAKER

Mersi. Minis, ou repons?

DESIGNATED MINISTER JEAN-FRANCOIS FERRARI

Mersi Mr Speaker. Mr Speaker, mon Minister ansanm avek Lotorite Lapes, i rekonnet ki i annan serten lenkonvenyans ki pe ganny rankontre par bann peser ki servi sa *channel* e osi sa *slip*. E nou konpran zot difikilte.

Wi, i korek ki lannen pase egzakteman le 28 Septanm 2023, *MNA* pour Port Glaud ti demann mwan pou vin Port Glaud, pour ki ansanm avek bann peser konsernen, nou met latet ansanm pou gete ki nou kapab fer avek sa lapas kot Legliz.

Mon ti mont Port Glaud ek en lekip. Me ler mon ti ariv laba, ti annan zis *MNA* avek en sel peser. E sa en peser ki sorti Takamaka. E sa se Mr Mirabeau ki mon konn li tre byen. En bon peser. Alors, nou pa ti kapab fer sa rankont parey ti'n prevwar.

Mon bezwen fer kler Mr Speaker, nou kot *SFA* nou nepli travay parey lontan anba ansyen rezim, kot nou zis vini aköz nou annan lotorite e nou deside kote, ki mannyer nou pou fer proze. Nou bezwen diskite e dyaloge avek bann peser. E si napa peser, nou pa kapab pran bann desizyon diktater parey dan lefase.

Alors, swivan sa, nou ti al dan Biro Ladministrasyon Distrik sa menm zour. E mon ti eksplik Onorab Aglae ki pour nou kapab bouze nou bezwen premyerman, en Lasosyasyon Peser ki reprezant tou peser Port Glaud. Mon ti met sa responsabilite lo li, aköz se li ki

MNA, pa mwan. E ziska ozordi, mon ankor pe espere.

Dezyenmman, mon ti *advise* li pou osi pran kontak avek Lotel *Ephelia* pou gete si nou kapab ganny en *partnership* avek zot. Aköz sa i en proze ki kapab anmenn bokou lentere e valer pour bann kliyan sa lotel e lotel li menm. Mon ankor pe espere.

Alors Onorab – atraver ou Mr Speaker, si *MNA* pa fer son bout, proze pa pou zanmen bouze. 2025 pe aproz ek en lavites enkrwayab. Alors, mon konsey pour Onorab Aglae, se ki i leve i sekwe li, aköz i riske pri dan sa menm lapas ki i pe demande pou ouver, si i pa fer son louvraz. Mersi.

(laughter)

(Interruptions)

MR SPEAKER

Order! Order! Minis! Onorab, *Order*. Minis, mon pou zis demann ou pou evit bann lakizasyon anver bann...

(Interruptions)

MR SPEAKER

...anver bann Manm pour nou kapab *focus* lo kestyon ki devan nou. Onorab Aglae, ou siplemanter?

HON EGBERT AGLAE

Mersi Minis pour ou larepons. E mon ti ekspekte ou pe vin ek en kalite larepons parey Minis.

Minis, zis anvi met lo rikord poudir; sa demann ki mon ti fer, sa ti ganny fer pour nou vwar bann *issue* ki annan pou fer avek peser. Me pa *meeting* pou zwenn peser. Dan mon *mail* ti kler ki mon ti anvoy kot ou date le 21. 06. 2023.

E Minis, letan ou ti vin vizit, sa bann peser i antre la e se Mr Mirabeau ki en zabitan Port Glaud, i en peser Port Glaud. I pa en peser Takamaka Minis. *Sorry* mon dir ou sa.

(Interruptions)

HON EGBERT AGLAE

I en zabitan Port Glaud ki ti la a sa moman letan. E ou ti fer demann pour nou zwenn pou fer en lasosyasyon.

E Port Glaud i en pti kominote e mon'n koz ek plizyer peser Minis. E bann peser i dir pou dir zot, zot menm pou zwenn en lasosyasyon – aköz napa zot bokou, i a pli bon pou zwenn...

MR SPEAKER

Onorab? Onorab?

HON EGBERT AGLAE

Mon pe eksplik Minis. Minis in donn...

(Interruptions)

MR SPEAKER

Sorry! Bon. Si – mon krwar Minis – Minis in konpran ki mannyer ou pe met sityasyon. Si ou annan en kestyon – si ou annan en kestyon pou demann li, demann li. Si non, nou pe termin la.

(Interruption)

HON EGBERT AGLAE

E Mr Speaker, Minis i rapel byen poudir i ti dir avek mwan; i pou al koz ek *management Ephelia*. Aköz i paret mwan zot in blok mwan *Ephelia* ozordi. Pa ganny okenn led ek *Ephelia*. Eski Minis ou ti koze ek *Ephelia*? Ou ti dir ou pou al koze ek *Ephelia*, ou annan en bon lantant.

MR SPEAKER

Non. Non, non, non, non. Non! *Stop.*

(Interruptions)

MR SPEAKER

Sorry! Minis, mon pe termin – mon pe termin sa sesyon kestyon la. Kestyon in

terminen. Minis mon pou demann ou fer ou depar. Mersi.

(Interruption)

MR SPEAKER

Nou pou *adjourn* ziskan 11er. Mersi.

(BREAK)

MR SPEAKER

Bon. Bonzour ankore tou bann Manm. Zis en pti leksplikasyon. Mon'n termin sesyon kestyon bomaten avan son ler, aköz mon ti santi poudir Lasanble pe al an dezord.

E mon pe fer en lapel avek tou Manm, pour zot remet nou lekor annord. Si zot bezwen koze, zot koz ler zot ganny rekonnèt par Speaker. E mon demande pou evit bann komanter *off-mic*, kriye, isi laba.

Lo size kestyon Onorab Uranie, mon rekonnèt son drwa pou annan en kestyon. Son kestyon ti lo *Order Paper*. Ti'n devret ganny pran. Mon pou aranze pour Minis vin reponn son kestyon o si vit ki posib. So, mon pou fer li osi vitman ki nou kapab *fit* li dan en moman dan nou *Question Time*. So, sa i lo kestyon Onorab Uranie.

Bon, mon pa anvi pran en kantite *point of order, matter of*

privilege, ki mon santi souvan i zis enteronpe e met retar avek travay Lasanble. Me selman pou *set* nou – pou *reset* lord, mon pou pran kestyon Onorab – mon pou pran pwen Onorab Aglae aköz li ki ti pe koze. Onorab Aglae?

HON EGBERT AGLAE

Mersi Mr Speaker. Mr Speaker, mon respe ou *ruling* dan sa ki ou'n donner pou etabli lord e disiplin dan Lasanble.

Be selman Mr Speaker, mon ti a kontan met lo rikord poudir, i pa premye fwa ki mon konman en Manm Parlman depi 6enm Lasanble, mon'n ganny denigre dan en fason.

E fason ki Minis in reponn serten mon bann kestyon, kot mon santi mon'n ganny maltrete. Mon pa konnen aköz si mon kouler lapo. Me mon ti a kontan ki a lavenir...

(APPLAUSE)

HON EGBERT AGLAE

Mon ti a kontan ki a lavenir *the onus* i tonm lo ou konman Speaker. Okenn Minis ki reponn dan en fason pou sey denigre en Manm Parlman, i ganny arete desito posib, pour nou anpese ki i annan sa bann eskalman dan Lasanble. Mersi.

MR SPEAKER

Mersi. Mon rezet akizasyon ras oubyen tel sipozisyon kont Minis. Me, mon *note* ou pwen ki ou'n fer lo respe. Onorab Uranie, ou pwen?

HON ROCKY URANIE

Mersi Mr Speaker. Bonzour tou koleg Onorab. E en bonzour spesyal pour zabitan Zil Pros ki a lekout.

Mr Speaker, mwan mon kestyon ti napa naryen ek sa ki pou fer avek Onorab Aglae. E mwan mon santi ki petet ou desizyon ki ou ou'n fer ti en pti pe *unfair*. Ou ti ava aret sesyon kestyon pour Onorab Aglae. Ou ti a devret kontinyen lo sa ki pour mwan.

Petet mwan mon krwar Mr Speaker, ou ki bezwen vreman gete ki mannyer ou reazir anver lafason ki keksoz i deroule dan Lasanble. Pou fer sir ki i annan lord. Ki ler Minis i ganny demande en kestyon, i donn en bon larepons. I pa *cut corners*, ki apre keksoz i vin tout en fason. Mersi.

MR SPEAKER

Mersi Onorab. Ou'n fer ou pwen lo ou kestyon. Mon'n eksplike akoz mon'n aret sesyon Lasanble e mon'n eksplike ki sa ki mon pou fer pou rebran ou kestyon.

Bon, nou ava envit Minis pour nou kontinyen kestyon ki lo *Order Paper*.

Bon bonzour Minis pour Transpor, Antony Derjacques. E osi bann zofisye ki akonpany li; Mr Patrick Andre Sekreter Prensipal pour Transpor lo Later. Mr Parinda Herath, *CEO Land Transport Agency* e Mr Bertrand Loze, Direkter *Policy* ek *Strategy* dan Minister Transpor. Mersi zot tou pou zwenn nou e byenveni dan Lasanble.

Nou a pas lo bann kestyon. Premye kestyon i dan non Onorab Rocky Uranie.

HON ROCKY URANIE

Mersi Mr Speaker. Bonzour Minis avek ou delegasyon. Ankor en fwa, bonzour bann koleg Onorab e tou zabitan Zil Pros ki a lekout. Mon kontan mon kestyon i premye, pangar taler Minis i ava ale i pa a ganny sans reponn.

Mon kestyon i lir koumsa; Eski Minis i kapab enform sa Lasanble si Polisi pour *club cars* lo La Digue in sanze, pou les plis *club cars* antre? Mersi.

MR SPEAKER

Mersi Onorab. Minis ou repons silvouple?

MINISTER **ANTONY**
DERJACQUES

Mersi Mr Speaker. Bonzour tou ki pe ekout nou. Bonzour Mr Speaker, *Leader of Government Business, Leader of the Opposition*. Bonzour tou bann Manm Lasanble.

Mr Speaker, Polisi pour *club car* lo La Digue pe ganny revwar. Annefe, Departman Transpor i fek prezant sa Polisi devan Konsey Minis Merkrede pase. E nou pou retourn ankor devan *Cabinet* dan detrwa semenn.

Pour lemoman, tou dimoun ki annan en *electric buggy*, nou'n fer en pti sanzman. Zot kapab repar zot *buggy* nenport landrwa, enkli Praslin avek Mahe. E zot osi kapab ranplas zot *buggy* ler zot tire sorti La Digue. Zot kapab anmenn enn nef La Digue.

Pour bann ki ti annan *buggy* ki pa lo semen e ki pa pe marse, zot osi zot kapab ranplas zot *buggy* e anmenn li La Digue. Selman lo menm kondisyon.

Savedir zot bezwen *still* annan sa bann kondisyon, par egzanz; sa letablisman touris ki zot ti annan ki ti *allow* zot pou annan en *electric buggy*.

Nou pou retourn parey mon'n dir, devan *Cabinet* dan detrwa semenn pour nou

kontinyen a diskisyon avek Prezidan ek son bann Minis. Mersi Mr Speaker.

MR SPEAKER

Mersi Minis. Ou siplemanter Onorab Uranie?

HON ROCKY URANIE

Mersi Minis, pour ou larepons. Minis, eski dan sa Polisi ki ou pe retourn avek devan *Cabinet*, i annan provizyon ladan ki pou les antre bann dimoun ki annan lotel, *guesthouse*, ki'n deza fer laplikasyon pour *buggies* avan – eski ou pe les antre nouvo *buggy* apard sa ki ou'n dir? Mersi.

MR SPEAKER

Mesi. Minis?

MINISTER **ANTONY**
DERJACQUES

Mr Speaker, tan ki en Polisi pa ankor ganny diskite e *Cabinet* pa ankor aksepte, i difisil pou dir kwa ki *Cabinet* pou fer. Solman nou konman Minister Transpor, nou annan bann sizesyon ki pou ede anmenn en pe plis sanzman.

Ki mon oule dir; nou, nou bezwen balanse. La Digue i en *green island*. I en zil touristik. E deza ler nou ti vin dan Gouvernman nou ti vwar ki sa 51 *buggy* ek sa kantite *load*

transpor ki annan La Digue ti pe *cause* par egzanp, bann *traffic jam* dan La Passe. E ti pe sanz La Digue.

E si nou al tro vit e nou entrodwir tro bokou, La Digue pou vin parey Grand Anse Praslin ouswa Baie Ste Anne Praslin. E touris pou soufer. Lendistri pou soufer. Bann Digwa pou war ki zot zil in ganny transformen. Alor, toultan i en balans.

E Mr Speaker, mon ti ava kontan an konfidans avek bann lot koleg dan *Cabinet* pou diskite, e sa pou dan detrwa semenn. Apre nou pou kapab anonse ki bann sanzman. Selman wi, nou pe propoz enn de sanzman. Mersi.

MR SPEAKER

Mersi Minis. Bon, nou a bouz lo prosen kestyon. Onorab Uranie, ou dezyenm kestyon, numero 16?

HON ROCKY URANIE

Mon dezyenm kestyon i lir koumsa; Eski Minis i kapab enform sa Lasanble ki plan son Minister i annan pou refer semen La Digue? Mersi.

MR SPEAKER

Mersi Onorab. Minis, ou repons silvouple?

MINISTER ANTONY DERJACQUES

Mersi Mr Speaker. Onorab, nou konsyan ki i annan en bon pe semen lo La Digue ki dan move kondisyon an rezilta sa Proze *Sewage* ki ti nesaser, vreman nesaser e enportan pour La Digue.

Sa Proze *Sewage* ou konnen se pou konnekte tou bann *sewage* La Digue, e pou anmenn li dan en pozisyon. En *central point*. E malerezman tou bann tiyo i bezwen pas dan semen. E alor kontrakter in bezwen fouye e met bann nouvo tiyo, e re fer sa bann semen.

Kantmenm dan bann transe pe ganny ranpli e refer dan son kondisyon oparavan, nou'n idantifye serten seksyon ki travay i bezwen ganny fer pli byen. E sa pe ganny kominike avek *PUC*. Nou an konsiltasyon avek *PUC* ki mannyer pou fer li pli byen.

E dan *Mid-term Review* an *juillet*, nou pou koz ankor avek *Cabinet* avek *Ministry of Finance*, pou gete si nou kapab ganny en larzan, en Fon pour nou kapab ede refer sa bann semen.

Selman dan Bidze 2024 nou pou negosye avek Gouvernman, tou bann lot Minis, pour nou kapab met en serten sonm pour nou refer tou

bann semen ki esansyel pour La Digue - 2025. Mersi.

MR SPEAKER

Mersi. Wi, ou siplemanter Onorab Uranie?

HON ROCKY URANIE

Mersi Mr Speaker. Petet en sizesyon pour Minis; kote nou pou ganny larzan? Akoz mon konnen i annan 25 milyon *Euro* atraver sa ki pe ganny servi pou al touy sat ek lera Aldabra parey mon'n dir. Petet laba i en landrwa ki nou kapab ganny en pti...

MR SPEAKER

Onorab, silvouple. Silvouple. La tipik sa ki mon pa anvi Lasanble fer. Sa size lera, sepa kote in ganny leve, in ganny demanti, in ganny *argued*, in ganny soz.

Mon pa war akfer nou bezwen lev li dan en kestyon ki annan pou fer avek semen La Digue. Kot nou pe ale silvouple? *Ok*, mon sipoze zot anvi proteste. Silvouple enn...

Anr ou pe leve pour ou kestyon? Mersi bokou. Eskiz mwan. Mersi.

HON SANDY ARISSOL

Mersi Mr Speaker. Bonzour Minis avek ou delegasyon. Mr Speaker mon ti a...

MR SPEAKER

Hold on en pti kou.

HON SANDY ARISSOL

Yes?

MR SPEAKER

Non, non Onorab. Mon pa ti ankor fini avek kestyon Onorab Uranie. Si i annan en kestyon i a demann li. Selman mon ava ankor dir, *go to the question*. Mersi. Mon pe sey fer mannyer... Onorab Uranie, ou kestyon?

HON ROCKY URANIE

Non, i *ok* Mr Speaker. Mon a les Onorab Arissol demann son kestyon. Mersi.

MR SPEAKER

Ok. Ou'n fini. Mersi bokou. Mersi. Kestyon – Onorab Arissol ou kestyon prezan?

HON SANDY ARISSOL

Mersi Mr Speaker. Bonzour Minis ankor enn fwa. Bonzour tou dimoun, Minis avek ou lekip. Mon ti anvi demann kestyon an relasyon avek larepons ki ou'n donner Minis, letan ou'n koz an relasyon avek sistenm *sewage* lo La Digue.

Mon ti a kontan osi demann ou dan sa kestyon ki Onorab Uranie in demande an

relasyon avek refer semen La Digue, si sa osi i pou enkli sa *refurbishment of road* anler Belle Vue ki ti pou annan, pou asir *proper* semen pour bann dimoun ki reste sa zistans anler avek *proper street light* osi?

Pour ki zot fasilite transpor i kapab anmenn zot pli o posibil, sirtou avek letan lapli ki zot ganny en pe difikilte. Mersi bokou Mr Speaker.

MR SPEAKER

Mersi Onorab.

**MINISTER ANTONY
DERJACQUES**

Mersi Mr Speaker. La Digue napa zis sat ek lera. I annan nouvo por. I annan *sewage*. I nouvo lopital.

E Mr Speaker wi, dan sa Bidze ki nou pe negosye pour 2025, nou pou refer tou bann semen ki esansyel depan lo ki Bidze nou gannyen, enkli pour Belle Vue. Wi.

MR SPEAKER

Thank you. Onorab Georges, ou annan kestyon?

HON BERNARD GEORGES

Non Mr Speaker, mon ti anvi ou permisyon pour mwan reponn Onorab Uranie lo...

MR SPEAKER

Ou krwar i nesese? Mon krwar i pa nesese Onorab. Mersi bokou.

HON BERNARD GEORGES

Akoz si nou pa reponn li, toultan i pou demann sa kestyon. Sak fwa ki i ouver son labous, i retourn lo sa size.

MR SPEAKER

Ou'n deza reponn Onorab. Permet mwan prosede avek kestyon. Mon konpran. Mon konpran sa size i monte inapropo. E vi ki ou annan en langazman avek sa proze, mon konpran aköz ou fristre. Me selman nou a les li. Mon'n reponn dan ou plas. Onorab Pillay, ou kestyon?

HON SEBASTIEN PILLAY

Mersi Mr Speaker. Mr Speaker, lannen pase pandan sesyon Bidze, Minis ti eksprim konsern ki li menm e bann zofisye *SLTA* in rankontre, letan travay ki ti pe ganny fer lo semen La Digue vizavi remet bann brik e ki en kote semen ti'n desann.

Now, e ou ti donn nou en langazman ki pandan sa lannen zot pou fer en pli bon *monitoring* pou asire ki sa semen i ganny fer, ki sa sirfas i *flat*. Pou *avoid* ki delo i reste, i al dan sa de kote, i vin en nwizans pour bann zabitan.

Eski ou kapab dir nou, dan lespri ek sa bann travay ki zot pe refer, eski zot in kapab fer sa travay pou fer sa bann kontrakter fer sa *refurbishment* parey i devret ganny fer? Mersi Mr Speaker.

MR SPEAKER

Thank you. Minis, ou repons silvouple?

MINISTER **ANTONY**
DERJACQUES

Mr Speaker, eski CEO SLTA i kapab pran sa?

MR SPEAKER

Byensir. CEO, ou annan laparol.

CEO SLTA PARINDA HERATH

Mersi Mr Speaker. Bonzour tou dimoun. Mersi pour ou kestyon Onorab. Bon, i annan plizyer landrwa ki nou'n diskite avek PUC parey Minis in mansyonnen avan, kot nou'n war spesifikman parey ou'n mansyonnen, i annan bann *differential settlement* parey nou dir, letan semen in ganny *reinstate* apre sa proze.

Kot sirtou bann landrwa ki annan bann *bricks* - ki ti annan *bricks*. E letan *bricks* i ganny re mete, i vremen difisil pour nou ganny li - I pour reste plat pour en pe letan. Me

selman avek *settlement*, i pou annan serten depresyon ki arive.

Sanmenm sa ki i annan plizyer landrwa kot nou'n idantifye. Nou'n deza enform PUC pour zot refer. I annan landrwa ki zot in re tire e refer sa baz. E remet bann brik.

Me selman *still*, nou war i annan serten landrwa ki nou pa satisfè avek *final product* ki nou'n gannyen. E zisteman, se pour sa ki i annan bann lezot travay an plis ki nou pou bezwen fer.

E sirtou, nou pou bezwen fer – nou pou bezwen tir sa bann brik konpletman dan serten landrwa e refer sa bann semen avek beton – *reinforced concrete*. Ki sa, menm si later anba li pou *settle*, i pa pou afekte sa sirfas. Mersi Mr Speaker.

MR SPEAKER

Thank you. Tan ki nou annan letan, zis en klarifikasyon lo ou kestyon Onorab.

HON SEBASTIEN PILLAY

Mersi Mr Speaker. *Straight forward*. Eski Minis i kapab dir nou, lefe ki zot annan plan fer sa *remedial work* avek beton, kan eski zot annan plan pou fer li - pour ki bann dimoun La Digue ki pe ekout nou, i ava

konnen poudir pandan sa peryod letan i pou al annan en lot *disruption* vizavi sirkilasyon lo La Digue, an relasyon ek sa *proposed* travay *remedial* ki bezwen ganny fer - pour ki nou kapab donn en *timeframe* lo la? Mr Speaker, avek ou permisyon.

MR SPEAKER

Thank you. Minis, oubyen CEO? Minis ou a dirize.

MINISTER ANTONY DERJACQUES

Mersi Mr Speaker. Mr Speaker, nou lenformasyon sorti kot *PUC* se ki zot sipoze ouswa zot voudre fini lafen sa lannen avek sa Proze *Sewage*.

Ler zot in fini, *SLTA* li i pe prepar son bann plan. Prezan nou dan Minister, nou bezwen negosye avek Minister Finans konbyen larzan i disponib pour nou kapab refer sa bann semen.

Mon konnen *SLTA* pou dir i anvi fer 6 a 7, a 5 kilomet. Kekfwa Bidze pou permet nou 2 ouswa 3 kilomet. Selman i depan lo sa diskisyon.

Mon oule fer tou dimoun rapel ki Bidze i sorti dan bann *tax* ki nou peye. E nou tou nou ganny en lanvlop. Sakenn e sak proze i annan son lenportans. E nou revwar tou bann program,

tou bann proze, e apre, nou donn priyorite.

Wi, La Digue in tonm dan priyorite pour lannen prosen. Selman mon pa kapab dir *to what extent* konmsi, konbyen kilomet. I pou depan lo konbyen ki nou pou kapab *afford* atraver Bidze. Mr Speaker, kekfwa CEO i annan en mo pour li dir osi?

MR SPEAKER

CEO, okenn detay? Yes, ou azoute.

CEO SLTA PARINDA HERATH

Mersi Mr Speaker. Annefe, i pou depan lo Bidze parey Minis in dir, ki nou pou gannyen pour lannen prosenn. E avek sa Bidze, nou pou bezwen refer en letid pou gete ki bann landrwa ki pli priyorite. Ki bann semen ki'n ganny pli andomaze pour nou kapab travay dan en fason sistematik. Mersi.

MR SPEAKER

Mersi. Prosen kestyon nimer 17. Onorab Egbert Aglae?

HON EGBERT AGLAE

Mersi Mr Speaker. Bonzour Minis, CEO, Mr Andre e lezot zofisye.

Minis, kestyon i konm swivan; eski minis i kapab dir ek sa Lasanble, konbyen larzan in mete dan Bidze 2024 pour

maintenance semen Cap Ternay? Mersi.

MR SPEAKER

Mersi. Minis?

MINISTER ANTONY DERJACQUES

Mersi Mr Speaker. Mr Speaker, Bidze ti ganny prezante an Novanm lannen pase. Savedir tou *MNA* i konn egzakteman kwa ki dan Bidze, kwa ki pa dan Bidze.

An plis ki sa, parti *US* ti toultan dir pa fer okenn proze kapital. Selman par kont, i enportan note ki napa en Bidze spesifik ki'n ganny dedye pou fer bann travay *maintenance* lo semen Cap Ternay sa lannen.

Sepandan, apre ki bann analiz in ganny fer par *SLTA* pou bezwen antreprann serten travay pour ki sa semen i vin pli o sekirite. E bann travay i konm swivan;

Premyerman, nou pou repar semen - bordir semen a en kou R500 mil, ki pou sorti anba nou Bidze *Road Maintenance*. Nou pou repar en gran porsyon sa miray ki borde ek delo sale ki'n ganny afekte par lerozyon. E sa i a en kou R3.6 milyon. Travay in fini konmanse swivan finisyon prosedir *tender*. Finansman

pour sa proze i anba *Contingency Fund*.

Nou pou enplimant en proze proteksyon semen dan zanmerant premye pti lans ki apel Anse l'Amour, kot sa lerozyon sever pe pran plas. Kou estimen pour sa proze i R2.6 milyon.

Me a sa moman finansman pa ankor ganny konfirman. Nou pe negosye ki sa proze i osi ganny konsidere anba *Contingency Fund*.

Mr Speaker, *tender* pour sa proze in fini ganny fer e bann dokiman pe ganny analize. Mersi Mr Speaker.

MR SPEAKER

Mersi. Onorab Aglae, ou siplemanter?

HON EGBERT AGLAE

Mersi Minis. Mon pou zis met lo rikord poudir; *vote* pour Bidze *SLTA* lo kote *US* nou ti vote pour 2024.

Minis, mon le refer ou lo paz Bidze 2024 ki nou ti pase lannen pase paz 36 anba *Land Transport Agency*.

Road Improvement Port Launay Cap Ternay, zot in met 2024. Zot in *stretch* li ziska 2026 R4milyon Minis. I dan liv Bidze. Mon pa konnen si mon ki mal. Gete.

Minis, baze lo sa – mon pa le fer okenn polemik, mon ti a kontan demann ou premyerman, eski zot annan en plan? Akoz letan nou ti fer bann demann Lotorite Distrik, ti pou konsern bann *road edges*, bann *layby* ki ou ganny fer. Apre negosyasyon ek bann propriyeter.

Sa ki mwan mon pe demande, sa larzan ki pou ganny etale lo sa peryod 2 an, kwa ki i pou konpri si nou pou servi sa menm larzan?

E dezyenmman, eski i annan en plan ki'n ganny soumet pour sa semen li menm dan son totalite ki'n ganny aprouve par *Planning Authority*? Mersi.

MR SPEAKER

Mersi. Minis?

MINISTER ANTONY DERJACQUES

Mr Speaker, mon a konmanse apre *CEO* i a kontinyen. Sa 4 milyon ki Onorab pe mansyonnen, i sipoze pour 2024 ziska 2026. Selman i pa'n *allocate* pour 2024.

Ler ou ti vote Onorab, i pa ti enkli 4 milyon pour 2024. I pa'n enkli okenn. Se pour sa rezon, ki nou pe tir larzan anba *Road Maintenance* 500 mil e 3.6 anba *Contingency Fund*. E sa

dernyen proze kot Anse l'Amour 2.6, nou pe al negosye pou li sorti ankor anba *Contingency Fund*. Mersi Mr Speaker. Eski *CEO* i annan okenn pou *add*?

MR SPEAKER

CEO? Non, *CEO* in fer siny i napa naryen pou azoute. Kestyon Onorab Pillay. Ou ti annan en siplemanter?

HON SEBASTIEN PILLAY

Yes, mersi Mr Speaker. Mr Speaker, mon pe demann mon kestyon – avan mon demann mon kestyon, bomaten ou'n fer en pledwari ek nou. E nou nou'n ekout sa pledwari.

E mon le alert ou poudir se ou Minis ki'n vin devan la, ki'n fer polemik. En Manm i demann li en kestyon ki i annan en larepons pour li donner. E sa ki i ti annan pour li fer se reponn sa kestyon. Pa *belittle* sa Manm konmsi i pa'n get son liv Bidze, kan sa Manm i get son liv Bidze.

MR SPEAKER

Non, non, non.

HON SEBASTIEN PILLAY

Sa i apel en mank respe pour en Manm Lasanble. Mon kestyon pour li - mwan mon pa pou al dan son rigol ki i le ale, akoz i

pa kontan ler nou, nou dir li sa bann keksoz.

MR SPEAKER

Onorab! Wi, wi, wi, wi. *Ok.*

HON SEBASTIEN PILLAY

Mon kestasyon pour li se – non, mon pe dir sa akoz bomaten, Minis, pa kapab reponn.

MR SPEAKER

Onorab silvouple, kestasyon?

HON SEBASTIEN PILLAY

Mr Speaker, eski Minis i kapab dir nou, lefe ki Bidze ki ou ti'n met anba *Road Maintenance*, e ki ti an prensip sipoze al ver sa semen, *ok* - ki ou'n menm *belittle* en lot frer Seselwa konmsi *as if* ou, ou pli konnen, li i pa konnen, konbyen larzan ki zot pou annan la?

Dir nou la, la, la, la, la *as we speak* la, konbyen larzan ki zot pou annan pour sa travay ganny fer, pour ki zabitan Port Glaud – sa rezyon, i a konnen poudir travay pe al ganny fer. Pe al konmanse tel zour, tel dat, tel kantite larzan pou ganny depanse.

Donn nou bann larepons *fixed* e detaye Mr Speaker lo sa size. Akoz nou'n ganny dir poudir sa larzan pa ti dan Bidze ler nou ti *vote*. Mersi Mr Speaker.

MR SPEAKER

Mersi. Manm pa kontan letan mon entervenir, e mon ganny akize mon reponn kestasyon dan plas Minis.

Me selman Onorab, mon pe dir ou, Minis in adrese sa kestasyon. E in donneren ki mannyer Bidze pou ganny divize. Minis, eski ou annan okenn leklersisman pou donneren?

MINISTER

ANTONY

DERJACQUES

Mon pe asir tou bann zabitan Port Glaud ki, parey mon'n dir, nou pe sey tou pour tou. E nou pe met 500 mil pou sorti anba Bidze *Road Maintenance* pou repar bordir semen.

Nou pe repar sa porsyon kot lerozyon in atake 3.6 milyon sorti *Contingency Fund*. Nou pe repar semen kot Anse l'Amour 2.6 milyon ki nou pou re negosye pou sorti dan *Contingency Fund*.

An plis ki sa, mon anvi dir ki parey tou bann lot distrik, *SLTA* i pase i regarde. Napa en *capital project* pour sa distrik pour lemoman. Selman nou pe servi *General Maintenance Fund*. Apre nou pe servi *Contingency Fund*. Savedir nou pe regard Port Glaud e nou pe

fer bann proze Port Glaud. Nou pa pe *ignore* Port Glaud. Mersi.

MR SPEAKER

Mersi. Mersi Minis pour repet sa bann langazman. Bon, nou a pas lo prosen kestyon. E nou annan numero 18, Onorab Egbert Aglae.

HON EGBERT AGLAE

Mersi Mr Speaker. Kestyon numero 18;

Eski Minis i kapab dir ek sa Lasanble ki plan son Minister pou elarzi bann kontour danzere dan rezyon Sans Souci, Port Glaud?

MR SPEAKER

Mersi Onorab. Minis?

MINISTER ANTONY DERJACQUES

Mersi Mr Speaker. I dan plan stratezik *SLTA* pou idantifye e enplimant bann proze, ki asir pli bon sekirite pour motoris ek pyeton, lo en baz priyorite e Bidze ki disponib.

Lagrandisman bann kontour e semen an zeneral, i form par bann proze ki kontinyel e ganny enplimante. Plizyer kontour in deza ganny idantifye. E semen Sans Souci i enn parmi en long lalis kot semen travay lagrandisman i nesese.

Me i enportan note ki sa bann proze lo semen Sans Souci Port, Glaud pa form par dan Bidze pour sa lannen 2024. Me, bann travay ki ganny fer ler napa en *Capital Project*, i kontinyen. Par egzanp; nou met laglas kot i nesese. Nou met bann baryer sekirite kot i nesese. Nou met bann siny ek bann markaz lo bann semen kot i nesese.

Mon anvi re dir Mr Speaker, ki nou ganny en lanvlop avek Minister Finans lo konbyen larzan nou kapab depanse. Nou met bann *capital projects* dan Bidze e nou met sa bann sonm. Lasanble i *vote* lo la e Lasanble i fek *vote* lo la an Novanm.

Alor bann travay ki nesese, par egzanp Sans Souci, Port Glaud i bann travay ki nou kapab fer an servan par egzanp, *General Maintenance Fund*.

Kot i annan en keksoz ki ekstrememan *urgent*, parey nou'n idantifye 2 proze pour distrik Onorab, Port Glaud. Nou pe pran 3.6 e nou pe al negosye pour 2.6 milyon sorti dan *Contingency Fund*. Mersi Mr Speaker.

MR SPEAKER

Mersi. Onorab Aglae, siplemanter?

HON EGBERT AGLAE

Mersi Minis pou ou larepons. Minis, pete la mon a fer en pledwari avek ou. Anvi ki i annan enn sa bann *bend* ki mon pe koz lo la, ki i vin zis avan ou al *Mission Lodge*, ki li bokou zabitan, menm motoris, menm pasaze dan bis tata ki pas dan transpor piblik, zot met konsern devan e zot per tou letan zot pas sa landrwa.

Eski nou kapab ganny en langazman en vizit, akoz nou ti fer lannen pase? E eski nou kapab ganny langazman avek *SLTA* pou nou vwar en diskisyon lo sa *bend* as a *priority* sa landrwa? Akoz i en danze, e i *prompt* pou aksidan. E nou pa anvii lanmor i arive. Mersi.

MR SPEAKER

Mersi. Minis?

MINISTER ANTONY DERJACQUES

Yes, Mr Speaker. Mon fek annan en parol la avek mon *CEO SLTA*, Mr Herath in dir mwan wi zot ava vizite, e zot ava prezant en *concept* avek Minister. E prezan nou ava gete, si prezan nou deside i en priyorite, nou ava met li dan Bidze pou 2025.

MR SPEAKER

Thank you, Minis. Onorab Arissol, Sandy.

HON SANDY ARISSOL

Mersi Mr Speaker. Lo menm laliny Mr Speaker, mon ti a kontan demann avek profite dir ek Minis mersi kontrèr avek zot bann, zot bann zofisye. Parske letan nou pe koz bann kontour danzere, dan rezyon Nor nou'n ganny en bon pe travay an relasyon avek bann kontour. Spesifikman Beau Vallon an desandan, e la osi lo kote Lotorite Distrik nou'n mete pou Le Niolle osi ganny sa latous.

Me mon ti a kontan demann ou, eski ou Minister i priyoritiz en pe sa bann kontour danzere, lo par egzanp kantite sirkilasyon trafik, lo ki groser transpor zisteman pou zot kapab ganny sa travay fer an relasyon avek Bidze ki ou annan?

Dezyenmman mon ti a kontan demann ou. Eski dan bann travay par egzanp dan bann kontour danzere, menm lo *maintenance* lo bann semen parey nou'n tann nonmen taler pou kaptenn.

Eski zot ganny osi led avek bann prive par egzanp? Kot mon rapel Cap Ternay ti annan en Lanna ki ti donn en R100 mil, kekfw an relasyon avek sa

bann proze. Eski zot ganny led avek sa bann prive parey Port Glaud zot ti gannyen oparavan? Mersi.

MR SPEAKER

Mersi Onorab. Minis?

MINISTER ANTONY DERJACQUES

Mr Speaker, nou sey fer sa lapel avek piblik. Par egzanp *road widening* kot Pascal Village, Beau Vallon. Nou'n negosye avek en fanmir, aköz nou'n bezwen fer en pti *encroachment* kot li, kot nou'n fer sa gran *retaining wall*. Nou elarzi.

Prezan kot Beau Vallon nou'n seye. O bor SAVOY nou'n travay en pe, nou'n pran en pe zot later kot nou'n *extend* en pe.

I annan piblik ki ed nou, e i nou priyorite pou fer *road widening* e pou fer bann semen vin *safe and secure* pou tou nou bann *pedestrians* avek nou bann drayver.

Dan Sid, nou pe negosye avek apepre 500 dimoun pou nou kapab ganny teren pou nou ganny later pou nou kapab fer sa bann *road widening*, bann *pavements* avek bann pli bon semen posib.

Mon ti a kontan dir ki kekwfa zot in trouve, nou'n fek ganny en nouvo laboratwar avek en *donor*. E sa pou ed nou

en kantite pou fer bann semen ki o standar, kot bann semen i pli larz.

Kot parey ou'n dir bann kontour, nou kapab sey fer en fason. E mon kontan ki bann *MNA* parey ou Mr Arissol, pe travay tre pre avek nou Minister, avek *SLTA*. Zot pe donn nou lide. E St Louis Onorab Naidu menm parey, ou vremen aktiv lo teren nou vwar. E mon trouve mon vwar, mon *follow*.

E se zot ki donn nou bann lide, e se zot ki dir nou kot nou bann *constituents* i vwar i annan en traka, i annan en danze. E nou sey fer tou pou tou pou nou kapab akt lo la e fer semen pli *secure*. Mersi Onorab.

MR SPEAKER

Onorab Roucou?

HON MICHEL ROUCOU

Mersi Mr Speaker. Bonzour Minis. Minis, nou osi nou anvi dir ou mersi pou sa bon travay ki ou pe fer ek ou lekip. Kontinyen, nou war nou bann semen i annan bokou *improvement*.

Minis, Onorab Aglae in koz lo semen Sans Soucis. E semen Sans Soucis i pran komansman anba Bel Air pou monte. I annan en bout ki tonm

Mont Fleuri, nou ti ava apresye ki ler sa travay pe ganny fer ki i pran li en pti pe pli ba ki i kit Sans Soucis ki an zeneral nou konnen poudir sa bann bout kot i annan bann bout danzere i osi ganny *take up*. Mersi.

MR SPEAKER

Mersi. Sa i en sizesyon, mon asire ki Minis in note. Nou a bouz lo prosen kestyon, nimero 19 Onorab Churchill Gill.

HON CHURCHILL GILL

Mersi Mr Speaker. Bonzour *panel*, e tou dimoun prezan. Kestyon i lir koumsa;

Eski Minis i kapab dir ek sa Lasanble kan eski son Minister i anvizaze antreprann sa travay *road improvement* kot komansman kot La Reserve ziska Anse Possession? E ki kalite travay ki *SLTA* i anvizaze fer lo sa morso semen? Mersi.

MR SPEAKER

Mersi Onorab. Minis, repons.

MINISTER **ANTONY**
DERJACQUES

Mersi Mr Speaker. Mr Speaker, mon anvizis fer en pti komantr ki Onorab Doyace Porice in toultan mansyonn bann tel proze avek mwan. E finalman, apre bokou lannen, nou kapab demar avek en tel proze. Mon

kontan son pasyon pou son distrik Baie Ste Anne Praslin.

(APPLAUSE)

MINISTER **ANTONY**
DERJACQUES

Sa semen ki Onorab in mansyonnen, in aktyelman en seksyon lo semen Anse Possession ziska Anse Boudin, ki ti'n ganny idantifye pou nou amelyore dan lefitir. Sa seksyon semen i apepre 1 kilo met longer, avek en larzer ki donn environ 5.5 met. Ki fer ki bann veikil i kapab rankontre serten difikilte, pandan ki zot pe servi sa seksyon semen.

Pou adres sa sityasyon, solisyon ki'n ganny propoze i pou elarzi sa semen par apepre 2 met. Konstri son drenaz, konstri bann miray nesese lo kote montanny e met *crash barriers* lo kote lakot.

An vi ki sa proze par form par Bidze pou sa lannen, i nou dezir pou enkli li dan Bidze 2025.

Sa i pou kout environ R8 milyon ki pou ganny enplimante par faz. Nou pou komans bann plan nesese pou sa proze. E son lenplimantasyon pou depan si nou ganny osi bann *wayleaves* ki nesese. Mersi Mr Speaker.

MR SPEAKER

Mersi Minis. Siplemanter Onorab Gill?

HON CHURCHILL GILL

Mersi Mr Speaker. Mr Speaker, zabitan Baie Ste Anne i dir mwan dir Minis bann konversasyon ki pas deryer rido, ki zot pa tande la zot pa krwar ladan.

(APPLAUSE)

HON CHURCHILL GILL

Minis, pou ou leksplikasyon bann travay ki sipoze fer lo sa semen, zis mon a *remind* ou, mwan Churchill Gill Manm Elekte pou Baie Ste Anne ler nou ti pe diskit Bidze 2023, mon ti demande travay pou fer lo sa semen. Ou ti dir mwan napa Bidze, mon ti dir ou akoz nou pa servi lannen 2023 pou negosye avek bann propriyeter. E fer ou bann zofisye Praslin fer letid.

E sa mon ti dir dan Lasanble, sa dimoun Baie Ste Anne in tande. Sa ki ou, ou'n dir pa'n vini. E dan ou preparasyon pou sa travay, dan lenstans ki nou pa ganny *wayleave*, ki alternativ ou pe mazine pou negosye avek sa bann dimoun prive ki annan later dan sa rezyon an kestyon? Mersi.

MR SPEAKER

Mersi Minis.

MINISTER ANTONY DERJACQUES

Mr Speaker, *CEO SLTA* i kapab donn en pti mo lo la. Selman sey keksoz mon a dir atansyon Onorab Porice pe pas devan ou. Mersi.

MR SPEAKER

Ok. Annou evit sa bann konparezon silvouple.

(comments off-mic)

MR SPEAKER

Order! Annou evit bann konparezon, nou a aksepte, nou aksepte kestyon Onorab Gill. E *CEO* ki pou reponn. *CEO* ou ava adrese.

CEO SLTA PARINDA HERATH

Mersi Mr Speaker. Mersi Onorab pou ou kestyon. Si nou pa ganny *wayleave* i pou fer nou travay vin bokou pli konplike. Akoz i annan serten landrwa ki nou pou kapab fer sa bann amelyorasyon. Me selman serten landrwa nou pou bezwen *skip*. E i annan travay par egzantp *crash barrier* ki nou

pou kapab fer. Drenaz osi nou kapab enplimante.

Me selman kot nou anvi fer *widening* ki en bout ki pli enportan, mon kapab dir dan sa proze se *widening*, aköz semen i deza etrwat. So, i pou fer li en pti pe difisil.

So, mon ti a kontan demann avek Lotorite Distrik osi pou vin avek nou pou nou kapab negosye sa bann *wayleave* avan nou komans sa travay pou nou kapab fer li dan en fason ki i konplet. Mersi.

MR SPEAKER

Mersi. Avan nou al dan en move tournir, mon pe dir nou pa la pou konpare lekel ki'n fer. Lekel ki pa'n fer, nou reste lo size kestyon. Onorab Porice ou annan en siplemanter?

HON DOAYCE PORICE

Mersi Mr Speaker. Mr Speaker, Minis avek ou delegasyon, tou bann Manm Onorab e tou dimoun ki a lekout bonzour. Mr Speaker, mon pou remerisi e felisit Minis, avek son lekip pou sa bon korperasyon ki nou'n gannyen pou rezourd bann problem lo Praslin, espesyalman dan mon distrik Baie Ste Anne.

(APPLAUSE)

HON DOYACE PORICE

Minis, Konbyen letan sa proze *road improvement*, La Reserve ziska Anse Possession i egziste? Mersi.

MR SPEAKER

Mersi. Minis?

MINSITER ANTONY DERJACQUES

Mr Speaker, ler mon'n antre 3 an pase koman Minis mon'n vwar ki sa proze i lo latap pou en kantite lannen. E nou 2025, nou pou komans li. Mersi bokou.

MR SPEAKER

Mersi.

(APPLAUSE)

MR SPEAKER

Siplemanter Onorab Pillay.

HON SEBASTIEN PILLAY

Mersi Mr Speaker. Mr Speaker, mon kestyon i enn tre senp. 2025 ou pa pou la, ou pe ale ou.

(APPLAUSE)

HON SEBASTIEN PILLAY

Pas mon mesaz ek Mr Ramkalawan, dir li Dokter Herminie osi pe pas devan li. Mr Speaker, lo size sa semen e *regarding size wayleave*, eski

Minis i kapab donn nou en garanti ki an sa ki konsern tou bann prosedir an deor konstriksyon ki sipoze ganny fer, donn nou en garanti ozordi ki tousala in fini ganny fer, e ki nou pa pou tann okenn naryen ki retournen ki met okenn retar sa proze. Mon ti a kontan ganny sa garanti avek ou dan Lasanble Mr Speaker.

MR SPEAKER

Mersi. Minis, ou repons.

MINISTER ANTONY DERJACQUES

Mr Speaker, *SLTA* pe travay lo bann plan. E ler in *cost* bann plan e in finaliz bann plan, prezan i vin parti bann proze ki anmenn kot Minister. E Minister prezan i get son priyorite, e i get son *public interest issue*.

E apre nou met li dan nou demann avek nou bann negosyasyon avek *Ministry of Finance*. Savedir pou le moman bann *concept* pe ganny regarde. Mersi Mr Speaker.

MR SPEAKER

Mersi. Bon, Onorab Woodcock.

HON WAVEL WOODCOCK

Mersi Mr Speaker. Minis, i annan plizyer rankont, vizit in fer ansanm lo Praslin avek

bann *MNA* Praslin regardan bann *issue* semen e ki'n pertinan pou bokou lannen.

Ou'n mansyonnen sa semen non selman pou sorti La Reserve pou ariv Anse Possession. Me zot pou al en pti pe pli lwen ziska Anse Boudin.

Me mon ti pe ekspekte ki petet Onorab Gill ti devret anmenn sa en pti pe pli lwen. Akoz sa *issue* semen la, i donn nou akse avek enn bann pli zoli lans ki nou annan Sesel Anse Lazio.

Me le problemm i pa zis ziska Anse Boudin. Pli gro semen deteryorasyon semen i pli *worse* ki sa bout osi Anse Boudin pou mont lo oter pou desann anba pou al Anse Lazio.

Eski sa bout osi pe ganny konsidere dan sa proze? Apre dezyenmman, pou Mr Herminie pas devan Prezidan Ramkalawan, fodre i kapab marse. Mersi Mr Speaker.

MR SPEAKER

Minis....

MINISTER ANTONY DERJACQUES

Mr Speaker, mon a les *CEO SLTA* pou eksplik ankor enn fwa, ki mannyer bann proze i ganny konsevwar. E ki mannyer i ganny planifikasyon i ganny fer. E apre ki mannyer

nou travay ansanm avek *SLTA* avek Minister Transpor. Kekfwa sa osi i ava ede pou nou konpran ki manner bann *capital project* i ganny planifye.

E si i pa ti'n ganny enkli dan en Bidze par egzant 2024, ki manner i kapab e i posib pou ganny mete dan Bidze 2025 ouwa 2026. Kekfwa *CEO* osi i ava ranforsi sa ki mon pe dir. Mersi.

MR SPEAKER

CEO, ou annan laparol?

CEO SLTA PARINDA HERATH

Mersi Mr Speaker. Bon pou eksplik sa ki Minis in dir. Pou bann *capital project* i annan bann demann ki vini. Oubyen bann ki nou menm nou bann teknisyen i al lo *site* fer bann *investigation*. E kot nou war i annan bann *improvement* ki bezwen ganny fer i ganny idantifye.

E premyerman i annan bann *survey* ki devret ganny fer pou nou travay lo en plan detaye ki proze ki nou pou fer. Ki nou pou fer dan sa proze egzaktaman. E avek sa plan detaye, nou pou annan nou en *costing*. Nou pou konnen ki bann later prive ki bezwen ganny *encroach* par egzant kot i nesaser.

E la avek Lotorite Distrik e osi Minister *Lands*, negosyasyon i ganny inisyavek bann propriyeter prive pou nou kapab ganny konsantman pou nou kapab *encroach* lo zot later pou enplimant sa proze. E anmezir ki sa bann travay ki pe ganny fer, nou osi normalman nou *request* ki sa bann proze i ganny enkli dan bann Bidze ki vini, par egzant dan lannen prosenn.

E si nou ase konfidan ki bann travay preliminar i kapab ganny fer sa lannen, pou nou kapab enplimant sa proze lannen prosenn. So, sa i bann staz ki nou swiv normalman letan nou pe met en proze kapital lo Bidze *PSIP*.

Pou reponn kekyon Onorab Woodcock, sa seksyon ki ou'n mansyonnen i pa enkli dan sa ki mon'n eksplike taler. Me selman i en seksyon ki nou tou nou konnen ki ganny *flood*. E i annan en Komite Gouvernman ki pe travay *jointly* anefe. I annan en *issue wayleave* osi laba pou nou *sort out*. So, me selman i pa dan Bidze pou *SLTA*. Mersi.

MR SPEAKER

Onorab Cosgrow.

HON WALLACE COSGROW

Mersi Mr Speaker. Bonzour Minis avek ou tim. Minis, Mr Speaker, mon santi ki ou a krwar nou pa pe war ki Minis pe donn tou laverite ozordi bomaten, an sa ki konsern sa proze. Mon a eksplike aköz.

Onorab Gill i dir ki dan preparasyon Bidze 2023, i ti demann zot pou zot kapab fer bann travay preliminar pou ki ler sa proze i kapab vini zot pa ava bezwen annan sa bann diferan zafer *wayleave*, preparasyon.

Dan manner ki zot a kapab demar sa proze. Minis i dir 2025 nou pou fer sa proze. Apre zot dir *SLTA* ankor pe travay lo bann plan, bann plan neser. E dapre kestyon ki *LOTO* in demande, nou ankor pe travay lo bann plan neser.

Be Minis, be dir nou kwa ki laverite. Kwa zot konnen, zot konnen konbyen Bidze zot pou gannyen 2025, konbyen pou koute?

So, dir nou laverite Minis. Aköz sanmenm sa dimoun i dir partou zot koz lalang, pa mwan ki dir dimoun ki dir.

(APPLAUSE)

MR SPEAKER

Wi. Be sa bann zafer, mon'n deza eksplike. Si ou annan en diferans avek sa ki Minis in dir,

ou *state* ou diferans e ou demann lo son kestyon ki i bezwen pou eklersi. Ou pa bezwen antre dan bann zafer ou pa pe koz laverite, ou pe koz lalang.

Sa i vin en lakizasyon, en lakizasyon ki i annan keksoz mal. Mwan mon pa krwar ki Minis pe kasyet laverite. Mon'n ekout son repons, in donn serten lenformasyon. La i la sityasyon kot li i pe war.

Minis, si ou annan okenn keksoz pou azoute, ou kapab azoute. Me selman mon pa pe antre dan sa bann zafer Minis pa pe dir laverite.

MINISTER ANTONY DERJACQUES

Mr Speaker, mon pou lir ankor sa ki mon fek lir koman en larepons 2 minit pase ki pa ti pe ganny ekoute. *Quote*" An vi ki sa proze pa form par Bidze pou sa lannen, i nou dezir pou enkli li dan Bidze 2025. Sa i pou kout environ R8 milyon."

Nou'n dir apepre konbyen i pou koute. E pou pa ti pe ekoute. Mersi Onorab.

MR SPEAKER

Mersi. Onorab Bistoquet, ou annan kestyon?

HON ANNE BISTOQUET

Mersi Mr Speaker. Mon kestyon in plizoumwen ganny reponn. I ti kestyon Onorab Woodcock. Me selman mon oule zis fer en pledwari avek zot. Akoz mon osi mon ganny en kantite *call regarding* sa semen ziske Anse Lazio ki kas bokou transpor. Silvouple gete si zot kapab met dan Bidze travay lo la. Akoz dimoun Praslin pe vremen demande.

E Mr Speaker, mon ti a voudre osi remersi Minis, vi ki in koz lo proze semen Praslin pou felisit zot ansanm avek bann lezot Minister pou sa semen Fond Beaufais ki'n fek komanse. Mon fek ganny portre, e sa i en proze plis ki 47 an promes ki mon i pli vye ki mwan. E mon'n kapab vini pou mwan kapab fer en diferans ladan. Mersi bokou.

(APPLAUSE)

MR SPEAKER

Mersi. Mon asire Minis in note ou rekomandasyon. Nou ava avans lo prosen kestyon; limero 20 Onorab Churchill Gill.

HON CHURCHILL GILL

Mr Speaker, avan mon demann mon lot kestyon. Vi ki *CEO* in eksplik prosedir pou kapab ziska ler zot finalman fer sa semen, mon ti anvi zis demann

li dapre son leksperyans sa kantite letan i *CEO*, konbyen letan sa prosedir ki li in eksplike pou pran pou kapab konplete. E si 2025 sa semen pou vremen komanse.

MR SPEAKER

Nou'n ariv lo ou kestyon. Nou'n ariv lo kestyon limero 20, Onorab poz ou kestyon.

HON CHURCHILL GILL

Non, non be mwan loter...

MR SPEAKER

Pos ou kestyon Onorab.

HON CHURCHILL GILL

Ok, mon a demann mon kestyon Minis. Avan ler mon demann mon kestyon parey li i ti demande pou fer komanter. Pou mwan dir li pou dir sa *kiosk* ki i ti dir Onorab Porice in fini koz ek drayver *taxi*, zot ankor pe espere.

(APPLAUSE)

MR SPEAKER

Onorab, ou poz ou kestyon limero 20 silvouple?

HON CHURCHILL GILL

Mon pe al poze la. Eski Minis i kapab dir sa Lasanble, kan eski son Minister i ekspekte fer sa travay *footpath* avek *drain* depi

Baie Ste Anne ziska Cote D'Or e konbyen letan sa travay i ekspekte pran pou konplete? Mersi.

MR SPEAKER

Mersi. Minis, repons.

MINISTER **ANTONY**
DERJACQUES

Onorab pe tay deryer en *kiosk* akoz i konnen nou'n vini. E nou'n fer sa terminal e nou'n ouver por Praslin.

(APPLAUSE)

MR SPEAKER

Minis...

MINISTER **ANTONY**
DERJACQUES

Mersi Mr Speaker...

MR SPEAKER

Mon'n dir les *kiosk* de kote. Annou prosed lo sa kestyon, silvouple.

MINISTER **ANTONY**
DERJACQUES

Mersi Mr Speaker. Onorab Anne Bistoquet, nou nouvo zenn madanm dan Lasanble ti mansyonn sa proze dan son larepons *State of the Nation Address* deza.

(APPLAUSE)

MINISTER **ANTONY**
DERJACQUES

Mon kontan vwar bann nouvo zenn Manm Lasanble avek vizyon. Annefe, son vizyon ki sa *footpath drain* i ariv ziska Anse Lazio. Sa proze *footpath* mansyonnen par *MNA*, ti en proze enportan ki pou ranforsi sekirite lo semen dan sa landrwa.

Lazans Transpor lo Later i an se moman angaze dan prosedir planifikasyon pou premye faz sa proze, ki ekspekte ganny enplimante pli tar sa lannen - sa lannen.

E sa ti avek zot pandan plis ki 10 an. Be nou, nou pou enplimant li sa lannen. Premye faz pou komans kot *Lone Self-Catering Guesthouse*, ziska larantre Marie-Jeanne Estate. Nou plan i pou konstrir en trotwar ek son drenaz. Kou estimen pou premye faz i R1.4 milyon.

An vi ki sa proze total pe ganny estimen pou en lavalier R10 milyon. Alors an 2025, nou pou met en larzan pou son dezyenm faz. E answit an 2026 pou trwazyenm faz. Nou ekspekte ki sa proze total ava konplete dan 2 ouswa 3 an, depan lo disponibilite finansman dan Bidze. Mersi Mr Speaker.

MR SPEAKER

Mersi. Ou siplemanter Onorab Gill?

HON CHURCHILL GILL

Mersi. Mon krwar Minis i kontradir son lekor. I dir sa proze fek ganny koz lo la dan SONA, la i dir ti ek nou 10 an.

(laughter)

MR SPEAKER

Onorab, siplemanter.

HON CHURCHILL GILL

Bon. Alors Minis ou'n dir poudir sa i pou komans sa lannen. E eski vi ki ou dir pou an faz, eski ou kapab dir nou sa premye alokasyon ki pou ganny komanse, ki zistans i pou arive? Ou'n dir nou ki bor i pou komanse, me selman sa premye faz si ou kapab dir nou ki zistans i pou arive?

E si sa bout ki ou pe koz lo la kestyon i drenaz avek *footpath*, eski tou lede pe ganny *simultaneously*, oubyen ou pou fer enn apre lot? Silvouple eklersi. Mersi.

MR SPEAKER

Mersi. Minis?

**MINISTER
DERJACQUES****ANTONY**

Mr Speaker, drenaz i toultan anba *footpath*. Onorab, fodre ou fer letour distrik e ou gete ki manner nou pe konstrir. Tou dimoun ki vwar bann proze pe ganny fer, nou met en drenaz apre nou met *footpath* lo la.

Nou'n dir e mon repete, premye faz pou komans depi *Lone Self-Catering Guesthouse* ziska larantre Marie-Jeanne Estate. Nou estimen e i pou 300 met longer. Mersi Mr Speaker. E i pou R1.4 milyon. Mersi Mr Speaker.

MR SPEAKER

Bon. Nou'n ariv a lafen sesyon kestyon pou sa peryod.

HON SEBASTIEN PILLAY

(Off-Mic)

MR SPEAKER

Ou ti'n lev lanmen? Mon pa'n war. Ale mon permet ou en kestyon.

HON SEBASTIEN PILLAY

Mersi Mr Speaker. Mr Speaker, prenon kont presyon ki sa bann proze pe mete lo kapasite bann kontrakter ki lo zil, *ok*. E posibilite ki bann kontrakter sorti Mahe ki'n mobilize pou fer proze lo zil i ganny sans pou vizit sa bann proze, ki garanti ou kapab donn Lasanble ki bann kontrakter Praslin,

Pralinwa pou ganny menm loportinite egal pou kapab *bid* pou sa bann proze, san ki i annan en *unfair advantage* ki ganny donnen avek bann kontrakter ki pli gro sorti Mahe pou mobilize pou serten proze.

Me pa ankor mobilize parey i annan en kondisyon ki dir zot, zot bezwen mobilize avan ki zot kapab *bid* pou sa bann proze. Akoz ou pe koz lo pa mal proze ki sipoze ganny fer. I pa mal milyon ki sipoze ganny fer. Nou pa ti a kontan ki serten kontrakter i ganny lavantaz lo lezot. Mersi Mr Speaker.

MR SPEAKER

Mersi. Minis, repons silvouple.

MINISTER **ANTONY**
DERJACQUES

Mersi Mr Speaker. A lafen laverite i sorti. In rekonnèt ki pa mal proze pe ganny fer.

(APPLAUSE)

MINISTER **ANTONY**
DERJACQUES

E in osi dir ki pa mal milyon pe ganny depanse par Prezidan ek son *Cabinet*.

(APPLAUSE)

MINISTER **ANTONY**
DERJACQUES

Nou pou kontinyen ed tou dimoun, tou Seselwa. Mr Speaker, anba Lalwa *POU* nou fer bann *open tender*. E bann *open tender* i *lease* ki tou dimoun lo en plan egal i *compete*. E nou, nou regarde bann kondisyon *of course* dan zot *bid*. E nou swazir *the best bidder*.

Prezan an partikilye pou Praslin, spesifikman pou reponn sa dernyen bout ou kestyon. Mon ava les *CEO* pran sa bout. Mersi Mr Speaker.

MR SPEAKER

Mersi. *CEO*?

CEO SLTA PARINDA HERATH

Mersi Mr speaker. Mon krwar Minis in fini dir lo prosedir *tender* ki nou swiv normalman i anba *Public Procurement Act*, nou bezwen fer sirtou ler i sot bann *threshold*. Nou kontan fer bann *public tender* kot tou dimoun kontrakter Mahe avek Praslin i kapab partisipe lo tou sa bann proze.

E evalyasyon i ganny fer lo en baz egal. E normalman sa evalyasyon i ganny fer par en *independent evaluating body*. E apre sa ki ganny swazir, dapre *the best evaluating bid* ki ganny *award* sa kontra. Mersi.

MR SPEAKER

Mersi. Ou annan en klarifikasyon sa ki ou'n demande?

HON SEBASTIEN PILLAY

Wi, sa ki nou ti pe rode avek Minis, ki se ki nou kapab ganny en serten garanti ki pou napa zwe dalon sak fwa bann milyon Gouvernman *LDS* i depanse la. Zwe dalon i antre, zot donn dalon bann proze.

MR SPEAKER

Sa kestyon pa apropiye. Sa kestyon pa apropiye. E ankor enn fwa, mon fer lapel pou Manm gard lespri *Standing Order* ler zot demann kestyon. Nou a termin sa sesyon la. Mon remersye Minis e son delegasyon pou zot partisipasyon.

E mon swet zot bon kontinyasyon. Mersi bann Manm pou zot kestyon ki'n annord. Nou ava pran poz la, e Lasanble i a rebran 2er. Mersi.

(BREAK)

MR SPEAKER

Bonn apre midi tou dimoun. Nou pou kontinyen avek nou sesyon kestyon. Madanm raporter nou ava apel Minis. Bon, bonn apre midi Minis

Rose-Mary Hoareau, Minis pou Gouvernman Lokal e Servis Kominoter. E son zofisye avek li Mr Kevin Perine Sekreter Prensipal pou Gouvernman Lokal e *Community Services*. E Mr Romano Songor, *Executive Director* dan sa *Ministry*. Mersi pou zot partisipasyon.

Nou a pran bann kestyon, nou komans avek kestyon 21 Onorab Egbert Aglae.

HON EGBERT AGLAE

Mersi Mr Speaker. Mon a dir bon apre midi Misni, *PS*, e *Executive Director*, e tou dimoun ki a lekout. Kestyon i lir konm swivan;

Swivan bann gro lapli dan mwan Desanm, eski Minis i kapab dir ek Lasanble konbyen ka dezas dan distrik Port Glaud ki'n fini ganny rezourd e konbyen ka ki ankor dan diskisyon? Mersi.

MR SPEAKER

Mersi. Minis ou repons silvouple.

MINISTER ROSE-MARY HOAREAU

Mersi Onorab. Mersi Mr Speaker. Mr Speaker, Gouvernman in ed plizyer fanmir e endividi ki'n ganny afekte avek gro lapli ki ti koz dega le 7 Desanm dan rezyon

Nor. Notaman Bel Ombre, Beau Vallon, Glacis, Anse Etoile, St Louis, English River, e Port Glaud pa'n ganny eparnye.

Gouvernman in asiste tou dimoun san eksepsyon, egalman san prenon kont zot afilyasyon politik. An total Mr Speaker, nou'n rikord 29 ka zis pou Port Glaud. 10 fanmir in ganny asiste avek en sonm R25 mil, atraver bann dosye ki nou'n remet avek Lazans Proteksyon Sosyal. 4 fanmir in ganny lasistans finansyel depandan lo gravite zot sityasyon e sirkonstans.

4 ka in ganny lasistans kontrakter menm zour pou retir debri e kas ros lo zot propriyete. E 11 ka dan plato Port Glaud, i ankor dan lanmen diferan lazans, tel parey *DRMD*, *SIA*, Minister Lanvironnman, e *CAMS* kot bann evalyasyon pe kontinyen. Bann rapor i ava byento ganny soumet, e en desizyon a ganny pran. Mersi Mr Speaker.

MR SPEAKER

Mersi Minis. Onorab Aglae?

HON EGBERT AGLAE

Minis, mersi pou ou larepons mon kapab dir byen detaye. E vre ki nou'n annan *cases* 29 *cases* dan distrik. Minis mon kestyon premyerman. Premye

kestyon i bann *pending cases* *ok*, kot parey in annan *flooding* ek bann lateras.

Eski dan bann diskisyon ki pe ganny fer aköz nou konnen ki nou'n vot en Bidze pou sa lannen. Nou pa ti ekspekte pou annan sa bann lensidan ki'n arive. Me in arive.

So, baze lo sa Minis, eski bann *outstanding cases* i annan en diskisyon an term laliny Bidze pou kapab ganny finansman, pou kapab *mitigate* menm si pa dan son totalite, *ok*.

Akoz i annan mon konpran poudir ou pou bezwen annan serten responsabilite avek sa endividi osi. Me selman kot bann mwayen pa permet pou zot kapab osi ganny sa sipor. Eski bann diskisyon lo kote laliny Bidze premyerman i an fors pou kapab konnen?

E dezyenmman Minis, dan bann ka par egzantp kot i annan bann menas ki kontinyel kot in arive. E nou konnen ki nou ankor pe ganny en pe lapli, i annan *prone* pou *danger*. Eski zot pe pran kont osi irzans serten sa bann ka, ki pa pe dir i bezwen pas avan. Me selman i annan serten priyorite pou kapab *deal* avek sa bann sityasyon, en mannyer ki ler zot pe dormi aswar zot pa bezwen enkyet. Mersi.

MR SPEAKER

Mersi Onorab. Minis, ou repons?

MINISTER ROSE-MARY HOAREAU

Ok. Mr Speaker, mon ti a avek ou permisyon, mon ti a kontan *Executive Director* Songor i reponn sa kestyon silvouple.

MR SPEAKER

Mersi.

EXECUTIVE DIRECTOR ROMANO SONGOR

Mersi Mr Speaker. Bonn apre midi tou bann Onorab. Onorab pou ou premye kestyon, dan sa bann ka *assessment* ki pe ganny i pe montre poudir ki bann kriter ki pe ganny servi, nou pe swiv direksyon avek *hydrologist*, e osi avek *DRMD*.

Par kont sa bann ka ki vreman vwar ki i kritik, i annan en prosedir ki'n ganny mete an plas pou nou kapab antre an dyalog ant sa propriyeter avek Gouvernman, pou nou kapab anmenn lasistans le medya. E dan sa bann ka ki dan plato Port Glaud, in deza annan en *design* ki'n deza ganny fer.

E i annan en kou ki pou ki'n fini diskite pou kapab fer en miray. Me selman nou sityasyon la aktyel ki nou annan zis en *hydrologist* ki pe

travay avek nou. So, nou pe *prioritize* baze lo bann merit. Mersi Mr Speaker.

MR SPEAKER

Mersi *Director*. Onorab Arissol.

HON SANDY ARISSOL

Mersi Mr Speaker. Bonn apre midi minis ek ou lekip. Mon ti a kontan profite pou dir Minis avek ou lekip mersi pou ou bann led ki ou'n dir ki ou'n mansyonnen dan ou repons pou Onorab Aglae an relasyon avek Nor. Pou mon bann koleg, mersi bokou pou zot bann lasistans. E mon swete ki nou bann ser ek frer Port Glaud osi zot lasistans i adekwa pou ki zot lavi i retourn normal.

Mon ti a kontan demann ou en kestyon an relasyon avek letan ou'n mansyonn 29 ka, ou'n dir poudir i annan 10 ka kot zot in ganny asiste avek sa 25 mil. Me apre i annan 4 ka kot ou'n koz lo la, kot zo tin ganny serten lasistans me zot pa'n dir ki kalite lasistans?

Eski lasistans finansyel? Oubyen bann lasistans ki nou osi Bel Ombre nou ti devret gannyen, me nou pa'n gannyen ou'n donn zis Port Glaud. Mon ti a kontan konnen ki Port Glaud in gannyen ki nou, nou pa'n gannyen? Mersi bokou Mr Speaker.

MR SPEAKER

Mersi Onorab. Minis?

MINISTER ROSE-MARY HOAREAU

Mr Speaker, mon ti a les... avek ou permisyon PS Perine a pran sa larepons *please*.

MR SPEAKER

PS, ou annan laparol.

PS KEVIN PERINE

Mersi Mr Speaker. Bonn apre midi tou Onorab. Onorab, bann lezot lasistans ki ou'n gannyen byensir letan en dezas i arive, ou konnen i preliminar kot nou, nou antre nou sey ede avek prela ek lezot keksoz. Me osi i annan en *file* separe ki ganny fer.

Letan ti ariv sa ka le dan rezyon Bel Ombre, tou dimoun ti ganny asiste. Mazorite dimoun ti ganny asiste avek R25 mil, akoz ti'n osi ariv sa dezas lo kote Cascade. E la bann ki vreman lakaz ti'n andomaze ti ganny sa R25 mil parey bann Cascade; e bann lezot ki pa'n vreman ganny afekte totalman, la en *file* separe i ganny fer kot evalyasyon i ganny fer, vwar kwa ki'n perdi. Nou anvoy sa *file ASP*. *ASP* i donn zot en larzan 10 mil, 15 mil depandan lo

sirkonstans. *Thank you very much.*

MR SPEAKER

Mersi PS. Onorab Pillay.

HON SEBASTIEN PILLAY

Mr Speaker, prenon kont ki sa larepons i ganny entrodwir *regarding* 25 mil pou distrik Bel Ombre. Eski Minis pe dir nou la ozordi ki tou dimoun ki ti sipoze ganny asiste avek sa R25 mil Bel Ombre, in fini ganny asiste?

MR SPEAKER

Wi Minis.

MINISTER ROSE-MARY HOAREAU

Mersi Onorab. Wi, tou dimoun ki'n vin devan ki lo merit apre bann vizit ek bann evalyasyon; tou dimoun ki mon kapab dir ki'n tonm dan bann kriter neserer zot, zot in ganny asiste. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Mr Speaker, mon pa konnen si nou kapab entrodwir petet letan ki nou lasistans R25 mil, si nou kapab entrodwir sa size Cascade osi. Akoz i annan bann group dimoun dan Cascade ki pe dir

ki zot osi zot pa ankor ganny sa R25 mil. So, si Minis i kapab konfirm sa avek nou. Or si petet i pa leka. Mersi bokou.

MR SPEAKER

Mersi. Nou pe al en pe lwen avek kestyon orizinal. Me selman Minis i kapab donn en repons, si i annan enn pare.

MINISTER ROSE-MARY HOAREAU

Mersi Mr Speaker. Mersi Onorab. PS Perine i ava pran larepons silvouple.

MR SPEAKER

PS?

PS KEVIN PERINE

Wi, nou kapab konfirmen poudir tou dimoun ki'n *call* ki zot *case* in ganny anrezistre Cascade, zot R25 mil in fini ganny *disburse* avek zot. Bann ki'n konfirmen, bann ki'n fer rapor ki zot sityasyon ti arive. R25 mil in fini ganny donnen a ler aktyel. *Thank You*.

MR SPEAKER

Mersi. Mersi PS. Nou al lo prosen kestyon, i osi dan non Onorab Egbert Algae.

HON EGBERT AGLAE

Mersi Mr Speaker. Kestyon i lir konm swivan;

Eski Minis i kapab dir ek sa Lasanble si son Minister i annan en formil kot i konsern rotasyon bann DA? Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Mr Speaker, rotasyon DA i en mekanizm ki an plas depi ki mon'n pran *portfolio* Minister Gouvernman Lokal ek Zafer Kominoter. E sa dan diferan lenstans in en sikse, atraver pli meyer servis ki pe ganny ofer lo nivo Ladministrasyon Distrik.

Distrik i pli vibran an term aktivite, partisipasyon lakominote eksetera. Rotasyon DA, i anliny avek nou plan reform ki'n ganny site dan nou *strategic plan 2022/2026* ki nou pe kontinyen enplimante e konsolide.

Benefis *rotate* en DA se ki sa DA i aprann konn en nouvo distrik, anmenn son lekspertiz dan en nouvo lanvironnman.

I vin pli *innovative* e i ede dan son devlopman profesyonnel. Tout an prenon kont stabilite e kontinite travay sa distrik. Mersi Mr Speaker.

MR SPEAKER

Mersi Minis. Onorab Aglae, ou siplemanter?

HON EGBERT AGLAE

Minis mersi pou ou larepons. E mon pou parsyelman dakor avek ou larepons ki ou'n donn mwan Minis. Sa i premyerman akoz dan travay ladministrasyon i kapab dan *management*, i pran en pe letan. Normalman parey mon'n swiv *management* apepre 2 an pou *master* sa ki ou pe fer, *ok*?

E en *DA* son travay i pa fasil, akoz i bezwen travay bokou avek dimoun e i bezwen konn dimoun. Minis, letan ladministrasyon in vini, zot in fer sa travay rotasyon, napa problem ek sa.

Me apre ou pe war *along that line* dan bann distrik ki zot in deza fer rotasyon zot ale zot fer rotasyon ankor. Se sa ki mon anv konnen, *what is going on*? Akoz i pa ankor fer ni 1 an dan en distrik, ou pe tir li ankor pou anvoy li dan en lot distrik, kot i pou bezwen re aprann dimoun, re konn dimoun malgre metod travay i reste parey.

So, sa i mon kestyon akoz ki letan ou'n fer en landrwa en rotasyon apre ankor apre dan lespas pa menm 1 an ou fer rotasyon? Mersi.

MR SPEAKER

Mersi. Minis?

MINISTER ROSE-MARY HOAREAU

Onorab mersi. Ki mon kapab dir ou, se ki dan distrik keksoz i *evolved* toulezour. E nou, nou pa pran sa bann desizyon a la lezer san fer bann analiz ki neserer. Alor, ler ou vwar nou koman *management* nou pran en desizyon pou *rotate* en *DA* pou anvoy li dan en lot distrik, i en desizyon ki nou'n fer li avek - ki mannyer mon kapab dir ou - ki nou'n fer li pou nou pou benefis *for the betterment of* tou lede distrik.

Alor i enn bann keksoz ki i pou toultan arive sa. I pa pou ariv souvan, i pa pou ariv ler en dimoun in dan en landrwa 1 mwan ouswa 2 mwan. Me selman i en keksoz ki ou vwar se ki bann keksoz bann aktivite bann ... (zot mon pe rod sa mo Kreol) dan nou travay i toultan annan nou toultan pe evalye ki mannyer nou kapab fer pli byen.

Ki mannyer nou kapab fer nou distrik bouz pli devan. Kote en dimoun i pou pli ede dan en lot landrwa? Si par egzanp nou war poudir in vreman fer tou sa ki i kapab pou en distrik.

Nou war poudir son lekspertiz i kapab anmenn li

dan en lot pou li ede ankor. Tousala i ganny pran kont. Rotasyon *DA* i pa en keksoz negativ sa. I en keksoz ki pozitiv e ki toultan i anmenn sa nouvo souf, pa senpleman dan en distrik me osi dan devlopman personnel.

Sa dimoun, i ganny pou li pran son lekspertiz anmenn dan en lot landrwa re ankadre en lot *team* pous devan pou ki tou keksoz nou... Annefe i pou benefis tou bann distrik konsernen. Mersi.

MR SPEAKER

Mersi. Minis? *PS* Kevin in lev lanmen pou ganny laparol. Avek ou permisyon mon a donn li laparol.

MINISTER ROSE-MARY HOAREAU

Mersi Mr Speaker.

PS KEVIN PERINE

Mr Speaker, mersi. Mersi Minis pou donn mwan permisyon pou esey elabore lo sa ki ou'n dir regardan rotasyon *DA*. E parol Onorab in mansyonnen rotasyon *DA* i la, i pou egziste pou reste la. E i pa zis *DA*, i osi nou pe tous bann lezot *staff* dan distrik *at the same time*. Nou pe koz *office assistant* e osi *office managers*.

E en legzanp Mr Speaker, souvandfwa nou vwar kot gard i ganny *rotate* dan Kordgard sanz en distrik al dan en lot. Nou vwar *teacher* ganny *rotate*, nou vwar *nurse* i ganny *rotate*, me selman napa kestyon ki ganny poze lo la. Alor, mon pa vwar pou ki rezon ki nou bezwen vin demann permisyon sak fwa nou pe fer rotasyon nou bann *staff*. Mersi Mr Speaker.

MR SPEAKER

Mersi. Mon a zis dir...

(Interruption)

MR SPEAKER

Order please! Order!

HON SEBASTIEN PILLAY

(Off-Mic)

MR SPEAKER

Wi, be Onorab Pillay i pa ou tour koze silvouple. *Ok*, mon mon santi mon bezwen dir poudir kestyon Onorab Aglae i pa ti en kestyon demann permisyon. Ti en kestyon demann leksplikasyon. Onorab Algae, si sanmenm sa ki ou pe fer pwen.

Si sanmenm sa ki ou pe fer pwen.

(Interruption)

MR SPEAKER

Order! Si sanmenm sa ki ou pe fer pwen, mon'n *deal* avek. Si ou annan en lot klarifikasyon mon a permet ou poze la.

HON EGBERT AGLAE

Mr Speaker, mon pa pou al

MR SPEAKER

Ale.

HON EGBERT AGLAE

Antre dan sa rigol la mwan, sa ki mon anvi demann Minis la. Eski enn bann rezon osi ki zot pe fer bann formil? Ou kapab dir mwan wi ouswa non Minis, se sa relasyon travay ant sa *DA* ek sa *MNA* ki parfwa ou tande poudir i annan bann *clashes*. Eski sa osi i en fakter ki zot gete letan zot fer rotasyon ouswa plasman bann *DA*? Mersi.

MR SPEAKER

Mersi Onorab. Wi Minis?

MINISTER ROSE-MARY HOAREAU

Mersi Onorab. Mersi Mr Speaker. Annefe non. Sa i enn bann kriter ki nou pa pran kont ditou, senpleman akoz depi zour mon pe vin kot sa Lasanble, toultan mon'n dir *DA* avek *MNA* zot 2 adilt. *No matter*

ki zot afilyasyon politik, zot ase adilt pou kapab vwar ki zot bezwen travay ansanm pou byennet zot distrik.

Alor, si i annan en keksoz ki nou pa pran kont, se zisteman sa. Akoz en dimoun i sipoze delivre, en dimoun i sipoze delivre dan son travay byen. San pran kont kote sa dimoun son lapartenans politik i ete, donn menm servis tou dimoun alaoter. Mersi Mr Speaker.

MR SPEAKER

Tre byen Minis. Onorab Pillay.

HON SEBASTIEN PILLAY

Mersi Mr Speaker. Mr Speaker, vi ki mon drwa koze, mon bezwen dir ki ler en Minis in reponn en kestyon, Minis in reponn kestyon, in reponn son kestyon byen. Nou pa ekspekte okenn lezot zofisyé vin dir donn okenn *telling off* dan Lasanble.

MR SPEAKER

Ok.

HON SEBASTIEN PILLAY

Sa msye i devret ganny *told off* dan Lasanble, i malelve. I malelve devan Lasanble, i en *stranger in The House* i devret annan respe.

MR SPEAKER

Nou'n *deal* avek sa pwen Onorab. Nou'n *deal* ek li.

HON SEBASTIEN PILLAY

Me *deal* ek li parey ou *deal* ek mon bann Manm!

MR SPEAKER

Mersi. Ou kestyon...

HON SEBASTIEN PILLAY

Non be li...

MR SPEAKER

Ou kestyon silvouple.

HON SEBASTIEN PILLAY

La anndan i pou vin reponn kestyon toultan, si fodre vin reponn kestyon. *Minister*, ou'n prezant nou en plan ki ou annan dan ou *Minister* manner pou rotate ou bann *DA*. E mon konpran ou plan. Me selman i annan serten keksoz ki arive ki fer bann sitwayen *raise* serten kestyon.

Par egzantp, mon pran en legzanp tipik distrik Glacis in annan pres 3 sanzman *DA* la. E i pa'n en rotasyon, in en *sort of* en *breakdown* ou a dir. E prezan menm bann sitwayen pa'n konnen poudir en nouvo in antre. So, ki ou pe fer pou adres sa bann problem ki arive. Kot par egzantp nou'n vwar Mr Kenenth Pierre in ale, en lot *DA* in antre.

I annan ankor problem, ler en lot *DA* i antre. Konmsi pou adres bann problem. Rezon aköz Lasanble i bezwen reponn kestyon an sa ki konsern *DA*. Konpare avek en *nurse*, en lapolis avek en *teacher* en *DA* pe pran bann *case* dimoun. E i annan bann *file* ki bezwen ganny swiv, annan bann swivi lo la.

So, si en dimoun pa konnen lekel ki pe fer swivi bann swivi kontinyel e en dimoun ki pa konn sa distrik, i pe antre dan sa distrik.

Obviously sitwayen i bezwen reponn kestyon lo la. Se pou sa rezon pou nou demann ou, sey regarde eski i annan bann problem ki ou *Minister* pe rankontre ki ou bezwen adrese?

E ki ou pe fer pou adres sa bann defayans, pou asire ki sitwayen i ganny enformen deswit, i annan en sanzman *DA* ki sa lenformasyon i filtre parmi tou kous popilasyon dan distrik, pou ki nou konnen kwa ki pe pase Mr Speaker. Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Detrwa pwen, annefe

ou kestyon taler ou ti pou ganny en pti pe pli elabore. Par egzanp, wi Mr Pierre, Mr Kenneth Pierre nou *DA* avan in swazir pou li pran en transfer pou li retourn dan ledikasyon. E nou kot Minister Gouvernman Lokal nou pa pou zanmen debout dan semen en dimoun pou le avanse.

Nou *last DA*, li in *resign*. Alor mon'n war mwan bezwen anvoy en lot *DA* dan distrik. Mon toutafe dakor avek ou, ki distrik bann sitwayen i bezwen konnen lekel ki la. E sa i ganny fer ler sa *DA* in antre petet dizon 1 semenn, 2 semenn in etabli li in konpran son tim apre la zot komans al lo teren ansanm. Byensir avek zot *MNA*, ki i kapab profit sa lokasyon osi pou entrodwir zot *DA* dan zot distrik.

Kot i konsern kontinyasyon, kot Minister *Local Government* ek Zafer Kominoter nou annan, nou ensiste e nou annan en bon *handing over procedure*. Ki sa 2 *DA*, sa enn sortan, sa enn ki pe rantre i rankontre dan prezans *management*. I kapab Direkter *Zeneral Committee Affairs*, i kapab en lot manm *management* avek *HR*. E la zot *handover* tou bann keksoz.

Zot eksplik kanmarad bann *outstanding cases*, bann

ki'n fini, bann ki *file* i anba kot Minister. Bann ki *file* i kot *ASP* eksetera, eksetera. Alor, nou fer sir akoz nou konpran ki i bezwen annan sa kontinite ek kliyan fodre pa sa kliyan i ganny *inconvenienced*.

Alor, nou fer sir ki sa i pran par. Alor, *rest assured* Onorab ki nou pran kont sa bann zafer ler nou sanz en *DA*. Mersi Mr Speaker.

MR SPEAKER

Mersi. Dernyen kestyon Onorab Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Mr Speaker, vi ki nou pe koz lo rotasyon *DA*, Bel Air in en distrik ki pandan 1 an, 4 *DA* in ganny *rotate* e Onorab Spiro in enn. E i pa'n zanmen en problem, akoz *as long* ki sa *DA* i konn son rol koman en *DA* dan en distrik.

E mon kestyon Mr Speaker, vi ki i annan bokou bann nouvo *DA* la dan sa rotasyon ki pe ganny fer, i annan bokou bann nouvo *DA* ki'n rantre dan bann lezot distrik parey mon konnen Pointe Larue i enn. Beau Vallon mon krwar i annan enn;

Eski sa bann *DA* ler zot antre la, eski zot plas in fini

garanti koman sa *DA* respektif ouswa i annan en probasyon ki ganny mete lo la, kot i annan en serten *assessment* ki ganny fer lo zot, avan ki zot ganny konfirman koman sa vre *DA*?

Eski i annan sa ki pe ganny arive avek bann nouvo *DA* ki'n antre? Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Onorab, tou *DAs* ler zot antre, tou nouvo *DAs* ler zot antre zot lo en probasyon 6 mwan. E avan zot antre dan zot distrik, zot ganny en *induction* avek en *DA* eksperyanse. Sa la nou fek fer detrwa semenn. Sa *DA* nouvo i ganny atase avek en *DA* eksperyanse dan en lot distrik, pou li konpran ki savedir louvraz *DA*.

E menm safwasi nou'n fer *DA*, menm *DA* atase avek 2 diferan distrik. 2 diferan distrik ki totalman diferan, pou li konpran ki pa tou distrik ki parey, alors zot ganny sa leksperyans.

E wi, probasyon apre *induction* se tou. Apre pandan zot probasyon 6 mwan, tou lede mwan nou fer en *appraisal* lo zot nou gete ki mannyer zot pe

perform nou ganny *feedback* avek bann dimoun konsernen dan distrik si fodre.

E la nou pa esper lavey son probasyon i fini pou nou dir li nou regret ou pa pe fer byen. Me nou atrap ou depi boner pou nou kapab fer ou ankadre dan sa nivo ki *Local Government* i ekspekte. Mersi Mr Speaker.

MR SPEAKER

Mersi Minis. Wi Onorab Gabriel, ou ti'n lev ou lanmen?

HON CONRAD GABRIEL

Mersi Mr Speaker. *Welcome* Minis ek ou delegasyon. Mon a dir bonn apre midi tou dimoun ki a lekout, spesyalman bann zabitan Pointe Larue. Dabor Mr Speaker, atraver ou mon ti a kontan sezi loportinite pou *welcome onboard* Nadine Ah-Kong ki nouvo *DA* pou Pointe Larue.

Mon swete ki nou a travay byen ansanm pou byennet zabitan. E Minis i enportan note ki i fer nou 4enm *DA* la depi 2020. So, savedir in kre bokou fristrasyon ki'n arive dan mon distrik, mon pa pou dir otreman. Mon krwar ki sa in vin en gro defi dan li menm. Nou senserman remerci Miss Claudette Harrison ki'n reisi fer en bon travay pandan ki ti napa *DA*.

So, Minis tou sa ki mon'n ekoute la dir mwan ki garanti safwasi ki nou annan ki nou pou'n kapab mentenir sa *DA*. E keksoz i ava annan kontinyite, e dimoun pa ava kre sa gran fristrasyon. Mersi.

MR SPEAKER

Minis, wi?

MINISTER ROSE-MARY HOAREAU

Mersi Mr Speaker. Mersi Onorab. Onorab, nou bi, nou bi se pou fer sir ki nou annan kontinyasyon. Nou bi se fer sir ki distrik i ganny en bon servis. E nou bi se fer sir ki i annan bon korperasyon ant *MNA*, *DA* ek *secretariat* ki nou tou nou kapab travay ansanm pou nou bouz devan. Mersi Mr Speaker.

MR SPEAKER

Mersi Minis. Bon, prosen kestyon limero 23 Onorab Rocky Uranie.

HON ROCKY URANIE

Mersi Mr Speaker. Bonn apre midi Minis avek ou delegasyon. Ankor enn fwa bonn apre midi bann koleg Onorab e tou zabitan Zil Pros ki a lekout. Minis, mon kestyon i al koumsa;

Eski Minis i kapab eksplik sa Lasanble, dan ki sirkonstans

ki son Minister i asiste en dimoun pou repar son lakaz ler en pye dibwa in tonm lo la e andomaze? E si wi, dan ki dele letan zot pran pou fer sa bann reparasyon lo lakaz? Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Mr Speaker, kan pye dibwa i tonm lo lakaz en dimoun i annan en prosedir ki ganny fer avan ki en desizyon i ganny pran vizavi lasistans. Me par kont, dan limedya Gouvernman Lokal i ede avek koup sa pye dibwa, tanporiz sityasyon.

Par egzanp fer provizyon pou asiste avek prela pou anpes plis domaz. Ede pou retir bann debri, fer sir ki sa fanmir i an sekirite eksetera.

Aprè sa, en *file* i ganny prepare par Biro Ladministrasyon Distrik avek bann detay nesaser. Tel ki lenformasyon lo sa fanmir ki'n ganny afekte, lokasyon kote sa pye dibwa i ete, si ti lo en later prive, oubyen lo propriyete Gouvernman.

Koman zot tou zot konnen, i mandatwar ki en *socio economic assessment* i

ganny fer avan ki en desizyon i ganny pran.

Si pye dibwa i lo later Gouvernman, Minister i pey tou fre pou retir sa pye dibwa. E osi fer prosedir pou aranz lakaz sa dimoun. Si pye dibwa i lo later prive, la en konsiltasyon i ganny fer ek sa met later pou ki i pran son responsabilite e pey bann kou domaz. Mersi Mr Speaker.

MR SPEAKER

Mersi Minis. Yes Onorab Uranie, ou siplemanter.

HON ROCKY URANIE

Mersi, mersi Minis pou repons. Me Minis, parey ou konnen i annan bokou bann propriyeter prive ki pa Sesel, i difisil ganny kontak avek zot. E parey en spesifik La Digue ki mon krwar ou bezwen okouran. Kot pye dibwa, Pye Frisiter in tonm lo lakaz en dimoun. E sa dimoun li menm i en *carer*, i napa en gran reveni.

E kot son lakaz i ete, i lo en propriyete prive. Konmsi nou pe rode ki zot pe fer pou ed bann dimoun koumsa? Eski ou pou rod sa propriyeter? Be si ou pa ganny li ditou, ki zot fer dan sa letan ki la? Mersi.

MR SPEAKER

Mersi. Minis?

MINISTER ROSE-MARY HOAREAU

Mersi Onorab. Onorab, mon okouran sa *case* ki ou pe fer referans avek. Mon pa pou mansyonn non dimoun dan Lasanble. Me selman mon'n get sa *file* byen, mon'n menm sey al fer en pe resers lo pou ki sa later kot sa madanm pe reste.

E dapre lenformasyon ki mon'n gannyen, i en later fanmir. I en later prive wi, me i en later fanmir. E nou pe pran kont selman ki parey ou dir sa madanm i en *carer*, e nou pe sey fer demars premyerman pou ed li kot nou kapab avek en lasistans. Akoz la, pye dibwa in fini ganny tire. *Fire Brigade* ti vini, ti vin ede tir pye dibwa, koupe tir debri.

La prezan nou letan in pran nou en pe letan pou nou al rode pou ki sa later. Parske li son ka i spesifik, akoz i lo later fanmir. E sa fanmir, sa bann fanmir pa la. En gran bout later sa, sa fanmir pa la. E selman dan bann ka kot annan parfwa i annan bann pye dibwa lo later prive, ki nou fer... la pou li dan son ka pou li son pye dibwa in fini tonbe.

Me selman dan bann ka ko ti annan pye dibwa lo later prive, me i pa ankor tonbe, me i en danze potansyel. La nou,

nou travay avek *DRMD* ki annan sa pouvwar, sa lotorite pou antre tir sa pye dibwa, koup sa pye dibwa si i poz danze en dimoun, en lot dimoun lo lakaz en lot dimoun.

Me selman sa sityasyon ki nou pe *discuss* la lo pou La Digue, i en keksoz ki mon *aware*. Nou pe *handle* li pou nou kapab ed sa madanm. Akoz son sir konstans i diferan avek leres dan ka kot son lakaz i ganny *located*. Me selman nou pe ed li, nou pou ed li. Mersi.

MR SPEAKER

Mersi Minis. Onorab Vidot?

HON AUDREY VIDOT

Mersi Mr Speaker. Minis, bonn apre midi avek ou delegasyon. Mon keston an referans avek keston Onorab Uranie. Ki dele letan ki normalman zot donn Ladministrasyon Distrik, pou zot travay lo bann *case* parey?

E prenon kont, eski i aplik sa prosedir la, eski i aplik zis pou bann pye dibwa danzere oubyen i enkli osi bann lezot menas?

Akoz ou'n dir poudir zot travay avek *DRMD*. Eski, mon konnen lontan ti annan en prose kot Ladministrasyon Distrik dan bann ka kot zot war ki swa en pye dibwa danzere, oubyen en gro ros. Zot ti rod

gidans avan ler zot *put up* en *case* avek Minister. Eski sa i ankor marse? Si bann prosedir i diferan. Mersi.

MR SPEAKER

Mersi Onorab.

MINISTER ROSE-MARY HOAREAU

Mersi Onorab. Mersi Mr Speaker. Mon ava les *Executive Director* Songor reponn sa silvouple Mr Speaker?

MR SPEAKER

Mersi. Mr Songor.

EXECUTIVE DIRECTOR ROMANO SONGOR

Mersi Mr Speaker. Mersi Onorab. Onorab wi, nou annan en prosedir an plas. Se ki letan sa pye dibwa i pa ankor tonbe ki ou dir pye dibwa danzere. *Actually*, nou annan en program ki apel *District Tree Felling program* e kot en *file* i ganny monte, i ganny submit avek sekretariat. E la bann prosedir *procurement* i ganny fer pou ki sa pye dibwa i kapab ganny koupe.

Me si par kont sa pye dibwa in fini tonbe parey ou pe fer referans, nou fer en proze. Nou fer Ladministrasyon Distrik fer en *file* proze, e prosedir i ganny fer *to the*

process pou nou kapab enplimant sa proze.

Dan lot kote kot bann *assessment*, normalman i annan letan ki nou travay avek *DRMD* i ant 30 a 60 zour pou nou kapab konplet sa proze.

Me par kont enn ler nou ganny bann difikilte osi avek korperasyon, sirtou bann *third party* ki *involved* avek sa propriyete pou kapab enplimant sa proze. Mersi.

MR SPEAKER

Mersi *Executive Director*.
Onorab Pillay.

HON SEBASTIEN PILLAY

Mersi Mr Speaker. Mon'n ekout atantivman larepons Minis. Mon ti a kontan ki Minis i klarifye, akoz mon annan en konsern. An relasyon avek bann pye dibwa ki nou konnen par egzanp, nou konnen i annan 3 ka. En pye dibwa lo later en dimoun i pou ou, i ou pye dibwa e ou responsabilite, ou ki bezwen koupe. I lo ou later, i menas ou lakaz ou bezwen koupe.

Si ou pa kapab koupe, ou sey *put a case*, ou sey rod en led eksetera ou bezwen sey rod en fason. Akoz i ou later, i ou lakaz ou bezwen sey protez li.

Dezyenm ka, pye dibwa lo later Gouvernman, e la Minister

i al kot *MLUH*. E *MLUH* i bezwen fer prosedir pou koup son pye dibwa.

Ou'n dir nou 60 zour ki en pye dibwa i kapab *by then* fini tonm lo sa lakaz. Nou pe war i annan en defayans dan sa dele letan, *ok?* Dan trwazyenm ka, i en ka kot ou annan bann later prive. En gran later prive otour en *estate*, en landrwa kot dimoun i fer lakaz. Sa bann propriyeter i kapab diferan pei otour lemonn, pa fasil pou ganny zot.

E Minister pa kapab rezonnableman servi resours rod avoka, pou al rod sa bann dimoun, met en *case*. I pou *probably cost more at the end of the day* ki pou koup sa pye dibwa.

So, eski ou pe revwar sa mekanizm ki egziste, pou ou kapab *deal* avek sa lo en *case-by-case basis rather than* dir ouver en laport.

Akoz si ou ouver en laport, tou dimoun pou vin kot ou pou dir ou koup pye dibwa. E nou bezwen rezonnab dan sa konteks. Akoz nou riske pe anpes en lot dimoun ki bezwen led gannyen. So, eski ou pe travay lo en mekanizm en pe pli direk ki ou kapab *deal* avek sa bann *case* ler pe arive pou *avoid* ki war ou pe bezwen *not only* al

tir pye dibwa ki'n deza tonbe fini tonm lo lakaz.

Prezan al ed sa dimoun pou fer reparasyon lakaz kot en pye dibwa in tonbe. Akoz ou, ou santi ou *beholden* akoz ou krwar poudir in ariv en fot lo par Minister ki zot pa'n fer sa.

E an pasan Mr Speaker, mon le gard repons *Local Government* mon konsernen ki *DRMD* pou mwan ki *DRMD* pou mwan i *AWOL* konpletman. Nou menm pa war son Direkter Zeneral ditou dan okenn *scene* dezas.

So, I'm concerned about the mitigation ki *DRMD* pou fer Mr Speaker. Mersi.

MR SPEAKER

Ok, Minis i ava reponn lo son responsabilite pou li.

MINISTER ROSE-MARY HOAREAU

Mersi Onorab. E mersi Mr Speaker. Onorab, ou detay bann pye i kouver tou sa ki nou *handle* vreman. E, selman kot nou, nou annan nou annan 2 keksoz ki gid nou. Se irzans sa sityasyon e osi *socio economic assessment* si sa propriyeter i la.

Me parey mon'n dir, nou rod lasistans *DRMD* akoz se zot ki annan sa lotorite pou antre pou koup en pye dibwa menm

ki sa propriyeter i la, i pa la. Ki nou'n sey rod ou, nou pa'n war ou. Me osi selman mon bezwen fer resorti laplipar *contents* ou kestyon i relye plis avek Minister Lanvironnman ek *DRMD*.

Nou kot *Local Government* nou plito get bann pye dibwa *emergency*. Me selman bann pye dibwa ki kapab esper 2 semenn pou ganny koupe, sa bann *files* i ganny fer. E nou travay tre pros avek Minister lanvironnman. Akoz se sa bann pye dibwa koumsa i zot responsabilite. E laba zot annan bann divizyon spesyal ki *deal* avek sa bann kalite sityasyon. Nou kot nou, nou plito get lo *emergency cases*. Mersi Mr Speaker.

MR SPEAKER

Mersi. Onorab Sandy Arissol.

HON SANDY ARISSOL

Mr Speaker, mersi. An vi ki Onorab Rocky Uranie ki'n anmenn sa kestyon, dan lespri pou siport bann zabitan La Digue. Mon ti a kontan demann avek Minis, kekfwa lo pwen ki in anmennen lo bann pye dibwa tonm lo lakour bann dimoun andomaze, eski zot annan en rikord kekfwa pou La Digue konbyen bann ka koumsa ki'n vin devan, kot bann pye dibwa

in andomaz bann lakour propriyete prive bann dimoun, ki bann dimoun i vin rod led? Mon premye kestyon.

Dezyenmman, an vi ki ou'n mansyonn *DRMD*, mon anvi fer resorti poudir Direkter *DRMD* mon'n zwenn li 2 fwa dan dezas Le Nirole ki nou ti pas atraver Desanm, avek son bann zofisyete pe vizit nou bann *site*. Ansanm avek lezot lazans.

Mon anvi demann avek ou Minis, alor si i annan en travay ki pe ganny fer ou Minister avek *DRMD* zisteman pou La Digue, an vi kestyon i anmennen par Onorab Uranie.

Si i annan en travay ki pe ganny fer pou ki i annan en travay ki pou vwar bann pye dibwa kekfwa ki en danze pou bann dimoun. Sirtou bann dimoun aze, oubyen bann dimoun ki en pe mwen fortinen dan lasosyete, pou ki nou kapab ed zot deza, olye esper danze arive pou apre kekfwa danze vin en tel reste lwen kou i en pe pli for ki lezot landrwa pou nou kapab ed zot dan sa sirkonstans, avan menm danze i arive. Mersi bokou Mr Speaker.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Pou mwan statistik egzakt pou La Digue la mon napa avek mwan Onorab. Me selman sa i en keksoz mon kapab fer ou gannye pa problem.

Me selman i enteresan ou'n demann mwan sa kestyon. Akoz pou le moman la nou annan 10 ka. 10 ou 8 ka bann pye dibwa ki an danze potansyel. E la zisteman avek lasistans Lanvironnman, avek lasistans *DRDM*, nou pe al fer en legzersis pou apros sa bann propriyeter.

Laplipar propriyeter i isi Sesel. E laplipar sa bann propriyeter zot bann propriyeter ki annan sa mwayen pou fer zot devwar pou koup sa pye dibwa pangar i afekte lakaz. Akoz evantyelman i pou afekte lakaz en lot dimoun.

Alor, nou koman *Local Government* parey toultan mon dir nou bann fasiliter. Nou bezwen met tou sa bann lazans ansanm, avans devan sey rod - pa seye - me rod sa bann dimoun konsernen.

Fer zot pran zot responsabilite, e pou zot kapab koup sa bann pye dibwa ki en danze potansyel. La pou le moman, nou annan detrwa non

lo nou liv e nou pe al travay lo la tre byento avek lasistans nou *DA* byensir. E ki li toultan i fer nou konnen sa bann ka tel ka parey. E se atraver mon *DA* osi ki mon a fer sir ki mon fer ou ganny sa bann *statistics*. Mersi Onorab. Mersi Mr Speaker.

MR SPEAKER

Mersi Minis pou ou repons. Onorab Spiro, wi?

HON RACHEL SPIRO

Bonn apre midi Minis avek ou delegasyon. An referans avek repons ki ou'n donner lo sityasyon *socio economic* sa *assessment* ki ganny fer. E i vre ki kekfw letan pye dibwa in tonbe oubyen i en danze potansyel, *socio economic assessment* i ganny fer kot sa enn fanmir ki sa pye dibwa in tonbe oubyen pou tonbe.

Be, eski i mars osi pou kot sa pye dibwa i ete lo sa propriyete sa endividi, ki li petet li i napa le mwayen pou li koupe. Eski Minister i *step in* la?

MR SPEAKER

Mersi. Minis?

MINISTER ROSE-MARY HOAREAU

Mersi Onorab. Mersi Mr Speaker. Wi, en konversasyon i

kapab ganny fer. Parske *socio economic assessment* i bezwen lo tou lede kote. Ou bezwen pran ka tou lede kote, tou lede parti konmsi pou fer sir ki nou fer en travay ki byen. Mersi.

MR SPEAKER

Mersi Minis. Nou a bouz lo prosen kestyon. Minis in fer mwan remarke ki son repons pou kestyon limero 25 ki lo *Vulnerable Home Repair Scheme* pou bezwen tous osi kestyon 28 lo *Home Repair Scheme* dan non Onorab Roucou.

Akoz son repons pou *cross the line over* tou lede soz. Mon'n agree pou pran tou lede kestyon ansanm. E fotespere bann Manm pa ava obzekte, zot ava konpran nesesite pou fer sa pou nou pa bezwen repet nou lekor. Alor mon pou demann Onorab John Hoareau poz son kestyon, e osi Onorab Michel Roucou.

HON JOHN HOAREAU

Mr Speaker, i annan limero 24 avan.

MR SPEAKER

Oh sorry, mon'n sot enn. Wi, limero 24 premye wi. *Sorry*.

HON JOHN HOAREAU

Mersi Mr Speaker. Bonn apre midi Mr Speaker. Bonn apre

midi Minis e tou dimoun ki pe ekoute. Mr Speaker, dabor permet mwan remersi Minis pou son travay ki in fer le 7 Desanm Beau Vallon. Avek son 2 Zeneral la o bor li. Sa travay ki in fer i en travay rekomande si oule ki ti deswit vin lo teren, e deswit etabli en sant komann. E tou keksoz in de-koul apre dan en fason tre, tre byen.

Mr Speaker, mon kestyon i lir koumsa' swivan levennman le 7 Desanm kot rezyon Nor Mahe ti sibir en movetan ek gro lapli, eski Minis pe kontanple annan en Polisi kler lo ki baz Gouvernman i antre pou donn lasistans finansyel pou ed sitwayen dan le fitir? Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Onorab, i deza annan en Polisi e prosedir kler ki an plas. Me selman mon kontan ou'n demann sa kestyon. Akoz i permet mwan eksplike koman nou *deal* avek bann ka dezas. Dan ka en dezas, imedyatman vizit i ganny fer par DA respektif akonpanyen par son tim ek osi diferan lotorite ek lazans konsernen.

En *file* i ganny prepare avek *socio economic assessment*. E lasistans i ganny donnen lo merit ek gravite sityasyon. Nou pou kontinyen ed tou dimoun egalman. E sa i ganny fer san faver ni lapreferans ou apartenans politik, se sa prensip sa Gouvernman. Mersi Mr Speaker.

MR SPEAKER

Onorab Hoareau, ou siplemanter.

HON JOHN HOAREAU

Mersi Mr Speaker. Mr Speaker, en pti pe parey dan leka kot anba fors mazer, kot Gouvernman ti etabli en Komite permanan pou etidye pou gete ki mannyer zot kapab *alleviate* en pti pe *financial stability* dan pei apre COVID. So, mon pe gete si Minis pe mazin osi annan en Komite petet permanan ki kapab etidye bann *social stability issues*.

Pou permet par egzanp ler i annan *natural, National Disaster Fund* pou kapab zer bann keksoz koumsa. E osi pou petet kapab osi *expand, expand* led ki zot donn nou i bann sitwayen dan lefitir. Olye zis petet pou get dan ka lakaz oubyen lateras dezas. Petet pou get en pti pe pli larz ki mannyer

sa bann led i kapab ganny donnen avek nou bann dimoun. Mersi.

MR SPEAKER

Mersi Onorab. Minis, ler ou pare.

MINISTER ROSE-MARY HOAREAU

Mersi Onorab. E mersi Mr Speaker. Kote *Local Government* ek *Community Affairs*, nou, nou menm nou annan nou Komite Dezas *internally* dan Minister. E parey ou'n fer resorti, nou annan nou *Business Continuity Plan* ki ler en dezas i arive nou ouver nou bann *command center*. DA i konnen ki mannyer i marse, e tou dimoun i konnen ki limero pou kontakte.

Plito lo bann levennman nasyonal, mon ti ava les *Executive Director* Songor reponn ou. Akoz li i byen *involved* lo bann Komite Nasyonal. Mersi Mr Speaker.

MR SPEAKER

Mersi Minis. *Director*?

EXECUTIVE DIRECTOR ROMANO SONGOR

Mersi Mr Speaker. Mersi Onorab. So, Onorab lo Komite Nasyonal atraver Minister Finans, wi zot annan en

mechanism pou vwar ki mannyer bann lasistans pou ganny donnen finansyel sirtou letan dezas in arive.

Me selman o nivo nasyonal pou *response* nou annan en Komite ki ganny *chair* par Direkter Zeneral *DRDM*, osi byen ki nou osi nou asiz lo la avek bann lezot lazans. Sa pou kordin *response* dan en serten letan rezonnab pou nou kapab asiste piblik. Mersi.

MR SPEAKER

Mersi. Onorab Romain.

HON GEORGES ROMAIN

Mersi Mr Speaker. Bonn apre midi Minis ek ou delegasyon. Mwan osi mon ti a kontan profite Mr Speaker, pou dir mersi *Local Government* pou asiste nou *2 weekend* pase, avek sa dezas ki nou ti gannyen dan Anse Etoile. San osi oubliy bann lezot *MDAs* ki ti la osi prezan.

E nou konnen ki Mr Romano ti la lo sote ek nou Sanmdi. Mersi pou sa.

Mon kestyon i koumsa Mr Speaker. An i nou konnen ki sa lasistans ki nou pe donn bann dimoun ki pe ganny afekte nou war in ariv Cascade, nou war dan Nor, nou tann in ariv osi Port Glaud. Mwan pou mwan i byen ki Gouvernman pe fer,

akoz ou ed sa dimoun. Akoz pa li ki'n kre sa dezas kot li.

Me selman mon pe demann Minis ki vreman son Minister pe fer anvì ki byensir nou pou kontinyen gannyen sa bann parey nou pe dir sanzman klima nou pou kontinyen ganny sa bann movetan.

E dimoun pe ekspekte plis. Ki Minis pe fer, son Minister pe fer pou ed ankouraz dimoun kekfwa pran en lasirans sa i enn.

Aprè dezyenmman parey Onorab Arissol in fer sorti pli boner, kot ansanm avek *DRMD* fer plis vizit dan distrik kot pou get bann kapab dir bann risk ki kapab evite ki si an ka en gro lapli, divan ki nou pa war nou ler in fini arive aprè nou bezwen *compensate* sa dimoun ankor.

Alors pou mwan sa mon ti a kontan konnen ki vreman ou Minister pe fer pou en pti pe dan sa laliny pou pa zis *matter* nou donn larzan. Be an menm tan kekfwa sa bann dimoun pou en pti pe lo zot menm pran en lasirans, aprè *DRDM* osi antre ladan. Mersi Mr Speaker.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Onorab ler nou al lo teren, e mwan mon bann *DAs*, Mr Songor bann lazans ou menm ou, ou'n vwar poudir depi *Desanm* nou lo teren souvan avek diferan kalite lapli dan diferan rezyon pei.

E ler nou fer sa bann vizit la, i toultan nou koz ek sa bann dimoun kot sa bann problem i ete. Nou get en pti e a lantour, nou koz ek bann dimoun otour e nou donn konsey.

Pa konsey konmsi mwan mon vin donn konsey mon pa konn naryen ladan. Bann teknisyen i donn konsey, lo ki manner zot kapab eparye zot propriyete, *prevent it* pou ganny afekte ek en dezas.

Si ou bezwen fer en pti rigol la, si fodre ou koup sa pye dibwa la. Zot gannyen sa bann konsey e prezans i *down* i depan lo sa dimoun pou li prezan pran sa bann konsey e egzekut li pou protez son propriyete.

E en keksoz ki ler nou lo teren, *staff Local Government* ler i lo teren ki *management*, ki *staff* nou pe toultan ankouraz parey ou dir ou dir ek en dimoun ou war safwasi ou'n ganny en sans petet domaz pa tro bokou.

Me selman pran kont ki ou kapab fer ou ed ou lekor. E ler

ou pou ed ou lekor, enn bann keksoz ki ou bezwen konsidere se get en lasirans pou ou lakaz.

Sa i vin en ledikasyon ki kontinyelman nou fer, e nou pou bezwen kontinyen, kontinyelman fer. E *it comes down to* nou koman bann endividyel, nou bezwen pran responsabilite nou propriyete, nou lakaz, nou lakour.

Nou bezwen *assess* en pe nou menm. Nou'n ganny enn fwa, nou'n war leksperyans pete ki'n arive ek nou vwazen. I bezwen fer ou kestyonn ou lekor osi, be sa in ariv ek mon vwazen. Petet, *next time* i pou ariv ek mwan, alor mon bezwen fer en fason pou protez mon propriyete. E pa zis esper maler arive, e Gouvernman i antre pou ede.

So, i en travay ki pou toultan kontinyel. E ledikasyon osi pou bezwen vin en keksoz kontinyel ki nou fer. E sa i pa pou depan zis lo *Local Government* sa, sa i annan en kantite lazans parey Minister Lanvironnman, parey CAMS, parey DRDM. En kantite nou, nou bezwen vin ansanm pou kontiny sa ledikasyon ki nou pe fer. Mersi Mr Speaker.

MR SPEAKER

Mersi. Mersi Minis. Onorab Romain, ou siplemanter.

HON GEORGES ROMAIN

Mersi Mr Speaker. Wi, Minis ler in reponn in annan sa bout ki mon'n tous *DRMD*. Mon konnen ou'n dir letan ou'n pase ou'n dir zot, aranz kot zot. Selman *DRMD* zot menm akoz zot bann dimoun ki sipoze bann *expert*, bann dimoun ki kapab war bann risk.

Alors, zot, zot kapab vremen ede ki ler zot al lo bann vizit dan bann distrik lo bann landrwa ki zot kapab *at least* donn bann konsey vremen en pti pe pli enportan, pou fer plis sans dan en fason pou kapab ankouraz sa dimoun pou kapab pran en pti pe plis aksyon. Mersi.

MR SPEAKER

Mersi. Bon Onorab in fer en rekomandasyon, i pa'n demann okenn kestyon spesifik. Mon asire Minis in note. Mon a pas lo prosen siplemanter. Onorab Georges.

HON BERNARD GEORGES

Mersi Mr Speaker. Bonn apre midi Minis avek ou delegasyon. Mr Speaker, le 7 Desanm 2023 pandan dezas, en *pick up* ti monte avek en dimoun dan en parti politik ladan ek en

kargezon *plywood* ki zot ti pe anmennen pou zis zot dimoun.

Eski dan ou Polisi ki ou pe koz lo la, sa Gouvernman pou fer parey? Oubyen eski sa Gouvernman pou ed tou dimoun, pe enport zot lapartenans politik ler en dezaz i arive. Eski ou kapab eksplik nou silvouple, si ou pou swiv sa bann vye sistenm ek nou pa ek nou? Oubyen si nou, nou pou la pou partaz nou benefis avek tou dimoun ki bezwen. Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Onorab, mon kapab garanti ou ki sa ladministrasyon nou, nou pa gete ek nou pa ek nou. E toultan mon pou ensiste dir tou dimoun i ganny asiste egalman, baze lo merit e gravite ou sityasyon. Alor napa ek nou, pa ek nou.

(APPLAUSE)

MR SPEAKER

Mersi Minis. Onorab Arissol.

HON SANDY ARISSOL

Mersi Mr Speaker. Anvi ki kestyon Onorab John Hoareau

pe koz le 7 Desanm dan rezyon Nor Mr Speaker. E parey zot tou zot konnen Bel Ombre nou osi ti ganny afekte an relasyon avek sa levennman.

E letan nou pe koze la, travay pa ankor fini. Parske nou, nou annan en Ros Le Niole ki nou pe lager avek, kre en kantite lenkonvenyans pou bann dimoun Le Niole.

E la zisteman koman Minis i la, zot anvi mon negosye avek Minis pou ki omwen semen i ouver omwen lerdan, pou ki bann dimoun aze i kapab al zot apwentman, bann zanfan, bann dimoun ki annan biznes pou al sers zot kliyan, pou ki dan sa peryod letan zot a kapab fer en pti keksoz pou zot lakour.

Me mon kestyon ki mon ti a kontan demann ou Minis, an relasyon avek travay ki ankor pe kontinyen fer avek Polisi ki Onorab John Hoareau in demande.

Eski premyerman zot satisfè atraver zot Polisi ki zot annan ki tou zabitan Bel Ombre enkli rezyon Nor tou lasistans neserer ki zot ti devret gannyen dapre sa ki'n vin devan, sa ki'n rikorde tou dimoun in gannyen e ou Minister i satisfè atraver ou Polisi ki tou dimoun ki merit ganny asiste in ganny asiste?

Dezyenmman, mon ti a kontan demann ou anvi ki nou

pe koz Polisi eski sa lasistans ki dimoun Cascade in gannyen, nou pe koz sa sonm depi R1 ziska 1 milyon pou repar zot lakaz eski i osi aplik pou zabitan Bel Ombre?

Par egzanp nou annan 3 fanmir, nou annan lafanmir Khan, Jumaye avek Mr Wills, ki zot osi zot lakaz atraver le 7 Desanm ti ganny andomaze. Eski nou pe osi konsider zot dan bann reparasyon an relasyon avek sa finansman ki ou Minister i donnen. Mersi Mr Speaker.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Premyerman sa sizesyon lo semen ouver, sa nou kapab anmenn pli devan avek lezot lazans ki pe travay pou konsidere. Alor nou a kapab *advice* ou pli tar. E pou sa 2 lezot bout kestyon, mon pou les PS Perine pran dezyenm. Apre *Executive Director* Songor i a pran sa trwazyenm bout silvouple Mr Speaker.

MR SPEAKER

Byen. PS?

PS KEVIN PERINE

Mersi Mr Speaker. An regardan kestyon kot Onorab pe poze sa lasistans 1 milyon, nou pa vremen dan en pozisyon pou nou kapab pronons nou lekor lo la an se moman.

Me selman en diskisyon i a kapab ganny fer plizoumwenn avek bann lazans konsernen, tel parey SIA vwar ki *better way* nou kapab asiste sa bann dimoun. *Thank you.*

MR SPEAKER

Thank you. Director?

MINISTER ROSE-MARY HOAREAU

Mr Speaker, permet mwan. Wi, Onorab tou dimoun ki'n vin devan ki zot dosye in konplet, tou dimoun merite in ganny asiste. Mersi.

MR SPEAKER

Thank you. Nou'n terminen. *Director* ti annan keksoz pou azoute, non? Napa. *Ok. Good.* Onorab Vidot.

HON AUDREY VIDOT

Mersi Mr Speaker. Minis, savedir si mon'n konpran ou byen lo kestyon Onorab John Hoareau repons ki ou'n donn li, savedir zot deza annan en prose bidzeter ki zot pe organize pou ki dan lesansyel kot i annan bann ka parey lensidan le 7, zot

dan lefitir ki zot pou *entertain* parey zot in fer parey dan sa lensidan le 7?

E dezyenmman Minis, lensidan le 7 ou'n dir ki zot *full* lekip lo nivo distrik, zot in organize pou ed bann distrik ki'n ganny afekte. Me par kont mon pou koz lo distrik Roche Caiman, ler lensidan le 7 ti arive i annan dimoun dan distrik Roche Caiman ki i pa'n war prezans Gouvernman Lokal pas kot zot dan sa bann peryod letan. Zot in war apepre 3, 4 zour apre.

E ler mon'n pas kot sa bann dimoun zot in konfirm sa. Alors, mon pe demande, eski bann lensidan parey le fitir si i annan bann ka kot zot konnen poudir dezas in afekte plis distrik, eski zot kapab release sa bann *DAs* sa bann *DAs* spesifik pou zot travay dan zot distrik e ki apre si zot war poudir zot in fini *sort out* zot bann *case*, i permet zot al ed lezot distrik? Mersi.

MR SPEAKER

Mersi Onorab. Minis?

MINISTER ROSE-MARY HOAREAU

Mersi Onorab. Mersi Mr Speaker. Nou kot *Local Government* ler i annan dezas nou servi en sistenm triyaz.

Bann ki annan priyorite, ki pli *urgent* ki nou bezwen al gete. Bann ki kapab atann, me selman nou'n pandan sa bann sirtou dezas 7 Desanm, nou ti annan bann *dedicated* laliny telefonn kot bann dimoun ti kapab *call*. E sa bann laliny ti dan biro kot mon dan *boardroom* kot mon Minister.

Ot mon ti annan apepre 8 *DA* pe travay, ki tou *calls* ki pe antre tou dimoun ki'n vin devan zot bann detay in ganny pran. Me si nou pe koz en dezas ki spesifik in arive dan izolasyon, en dimoun in ganny afekte, nou ekspekte ki tou dimoun Roche Caiman i konnen nou annan en Biro Ladministrasyon, zot annan en *MNA* tou, zot annan en *DA*.

E atraver ki zot *MNA* ki zot *DA* zot ka i bezwen, i devret ganny anmenn devan. *Either*, sa dimoun i vin kot biro ouswa i *call DA* ouswa i *call* son *MNA*, i dir mon annan tel problem mon ti a kontan ou led.

E si, e ler sa dimoun son non i ariv devan e byensir depandan parey ou'n dir lo gravite sityasyon, lo ki ler zot fini *deal* ek sa bann ki pli grav i pou arive kot sa dimoun li.

Me selman nou osi bezwen konpran koman bann zabitan nou bezwen vin devan. Akoz nou pa pou konnen si ou

bezwen led si ou pa vin devan. Wi, *DA* i kapab pase dan distrik. Me si *DA* i *busy* pe *handle* lezot keksoz pli irzan, e ou, ou santi be mon krwar mon ava sorti la dan mon lakaz mon ava al kot biro distrik mon a met mon problemn devan. Si *DA* i *busy* omwen mon a war sa *office manager* ouswa sa *office assistant*, mon *file* i a ganny monte e en vizit i a ganny fer.

So, nou travay an tim pou nou ed tou dimoun ki dan bezwen. Alor, mon pe pran sa lokazyon osi pou dir bann dimoun ki annan bann *genuine cases* vin devan, vin kot zot biro distrik koz ek zot *MNA*, koz ek zot *DA*.

E nou, nou ava ede kot nou kapab. Si sa keksoz i pa tonm anba nou responsabilite, nou pou gid ou kot ki lazans *or* ki departman ou bezwen ale pou ou ganny sa led. Akoz nou bann fasiliter e nou pou kontinyen ed tou dimoun. Mersi Mr Speaker.

MR SPEAKER

Mersi. Bon, nou'n pas en kantite letan lo sa kestyon. Mon pou pran sa 2 dernyen. En klarifikasyon? *Well*, silvouple zis klarifikasyon lo ou size.

HON AUDREY VIDOT

Zis pou mwan dir avek Minis, mon byen apresye ou larepons. Mersi. E mon krwar bann dimoun Brilliant ki'n pas dan sa sityasyon le 7 Desanm, in apresye larepons ki ou'n donner. Akoz zot in war lekel ki ti la akote zot. Mersi.

MR SPEAKER

Onorab Pillay, ou kestyon.

HON SEBASTIEN PILLAY

Mersi Mr Speaker. Mr Speaker, vre nou'n war lesansyel ki mannyer bann dimoun i ganny asiste en lasistans spesyal dan sironstans ki pa normal. Konmsi en keksoz abnormal in arive, e nou bezwen admet ki le 7 Desanm (Mr Speaker, eski Onorab Larue i kapab ferm son labous pou mwan kapab demann mon kestyon silvouple?)

MR SPEAKER

Onorab, Onorab demann ou kestyon. *Go ahead*.

HON SEBASTIEN PILLAY

Tro bokou malelve dan sa Lasanble Mr Speaker. Zofisye Gouvernman...

(Interruptions)

MR SPEAKER

Onorab, mon ava apresye si ou zis demann ou kestyon silvouple.

HON SEBASTIEN PILLAY

Mersi Mr Speaker. Mr Speaker, dapre sa ki Minis in dir nou zot etabli en kriter ki zot asiste tou dimoun, *ok?* E Minis ou pe dir nou la 100 pousan ou santi poudir sa sistenm i enfayib. E ki i *reach to* sa bann dimoun? Oubyen, akoz mwan mon'n *call* ou mon antretenir ek ou ler mwan mon ti Cascade vizavi bann landrwa kot bann dimoun pa ti ganny asiste, *regarding* sa.

So, ki plan ou annan, ki lesan ou'n aprann avek le 7 Desanm dan tou lede sirkonstans e Beau Vallon e Cascade ki lesan ou'n aprann. An se ki konsern ki mannyer pou anmenn sa lasistans e *setup* en striktir pou bann dimoun vin devan pou asiste?

Eski ou annan en sistenm *monitoring* dan ou Minister, pou ek sa bout dan ou Minister ki bann dimoun pe donn zot kont *deal* labank pou anvoy larzan ladan?

I annan en rezon mon pe dir ou sa Minis, fodre ou al gete zot ganny demande pou anvoy zot kont lazan ladan pou fer sir poudir lasistans a demann pou lasistans pa pe ganny servi

koman en loportinite pou serten dimoun fer serten keksoz.

So, eski ou annan bann striktir an plas Mr Speaker? Mr Speaker, akoz i bezwen ganny met lo rikord osi ki rezon akoz en *pick up plywood* ti bezwen monte, se ki akoz sa bann dimoun pa ti pe ganny asiste. Zis parey *MNA Les Mamelles* avek Prezidan in bezwen al vizit Dan Tol apre ki *US* in fer *blitz* laba, sa i koumsa.

(APPLAUSE)

MR SPEAKER

Bon mersi. Ou'n demann 2 kestyon. Nou a permet Minis reponn.

MINISTER ROSE-MARY HOAREAU

Mersi Onorab. Mersi Mr Speaker. Onorab, en keksoz ki mon bezwen dir avan mon pas laparol avek mon bann koleg la se ki nou, nou pa donner *financial assistance*. *File* i ganny, nou mont en *file* - en *file* i ganny *processed*.

E avan sa *file* i ganny *process* i annan vizit ki ganny fer, i annan portre ki ganny tire. I annan *socio economic assessment* ki ganny fer, kantite keksoz.

E apre la nou, nou *compile* sa *file* nou anvoy anba kot *ASP*.

E ler file i konplet, tou lenformasyon i ladan e annefe i osi enkli *bank details*. E mon kapab dir ou en keksoz ki nou'n fer dan dezas le 7 Desanm. Ler byensir premye zour tou dimoun i ganny met dan *shelters right?* Prezan sa detrwa zour, 3 a 4 zour apre mon tim in bezwen al *interview* sak fanmir dan tou sa *shelters*.

Ki *Beau Vallon Bay*, ki dan *Maison Football* ki dan stad Linite, ki dan bann *guesthouse* ki nou'n met zot mon tim in fer en konversasyon ek tou sa bann fanmir.

E premye keksoz nou ti fer parey ou'n dir pou anpes labi ouswa *misuse* nou ti etabli *who is the head of household?* Akoz ennler dan en fanmir i annan 8 dimoun dan en lakaz.

Prezan ou pa kapab *deal* avek tou le 8 dimoun. Enn bann keksoz ki nou ti fer, nou ti demann zot koman en fanmir lekel ki zot pe *nominate* koman zot *head of household*. Akoz apartir dela, tou konversasyon i ganny fer ek sa dimoun ki napa konfizyon.

E zisteman, ler Prezidan ti anons sa led finansyel R25 mil nou ti kontakte sak sa bann *head of household* pou demann sa *head of household* son *bank account*.

Ki en mannyer se li prezan ki responsab pou zer sa larzan dan son fanmir. So, nou'n enplimant keksoz ki nou'n vwar in mars byen. E lo bann sistenm ed dimoun avek materyo, mwan mon rapel pli tar ler mon ti'n fini Bel ombre bomaten mon'n mont Cascade apre midi. Mon'n vwar poudir ti annan bann dimoun ki ti annan bann donasyon *plywood*, louverz ki bann dimoun ti'n donneren.

E tou bann dimoun ki ti'n vin devan ti'n kapab ganny akse avek sa *plywood* avek sa louverz. E ti menm annan bann dimoun, bann *owners pickup trucks* ki ti'n apre pou anmenn sa bann *plywood* ou sa bann materyo. *Ok* louverz ti antre pli par dan loto zot ti al avek. Me fey *plywood* ti menm annan bann dimoun avek *pickup trucks* ki ti'n vin la volonterman pou anmenn sa kot sa bann lakour.

Alor, lasistans ti la. Me byensir koman ou konnen telman lakaz ti'n ganny afekte, anmezir ki *plywood* ti fini nou ti pe kontakte partou tou bann dimoun ki ti kapab ede in kontinyelman vini. Me selman ankor enn fwa led i la, nou osi nou ti bezwen vin devan. Akoz mazine nou ti annan 2 distrik,

detrwa distrik ki nou ti pe *handle at the same time*.

So, sa dimoun afekte li osi ti bezwen vin devan ed nou pou nou ed zot. Mersi Mr Speaker.

MR SPEAKER

Mersi. Kestyon Onorab Naidu.

HON SATHYA NAIDU

Mersi Mr Speaker. Bonn apre midi Minis ek ou delegasyon. Mersi pou sa bon travay ki zot pe fer kontinyen. An relasyon avek lasistans finansyel nou'n apresye poudir ki Gouvernman in fer tou sa ki i kapab a son dispozisyon, pou ed bann ki dan bezwen. Byensir nou pa pou neserman vwar en lot lensidan lo menm lanpler avek le 7.

Me sak fwa gro lapli i tonbe, lekspektasyon in ganny kree la deor avek dimoun ordiner, dimoun an zeneral konmkwa zot pou bezwen resevwar kek lasistans.

Alors lo sa size 25 mil, eski i annan en *cut off period* kot nou'n dir sa lasistans se zis pou bann viktim le 7 Desanm? Ouswa i pou annan bann lezot lenstans kot i annan gro lapli kot nou pou war bann zabitan pe ganny afekte. E alors en ekspektasyon ki zot, zot annan se Leta pou bezwen *entertain* zot demann.

Alors ki mannyer eski Gouvernman Lokal atraver bann lezot lazans i anvizaze regard sa sityasyon? En sizesyon ki mon pe soumet se kekfwa zot kapab ganny en konversasyon avek *HFC*, akoz zot annan bann diferan *line of credit* ki zot donn koman bann *loan*.

Me ozordi zour ki nou war? Dan bann lenstans kot lateras in desann e en lakour i bezwen en *retaining wall*. Napa mwayen finansman pou sa dimoun direktman finans en proze *retaining wall*. Me plito zot rod led ek Gouvernman Lokal, kekfwa la i kapab vwar en mwayen finansman.

E dernyen pwen Mr Speaker, sa zafer ki apel *socio economic report* ouswa *assessment*, kwa ki annan ladan? Kwa ki kriter ki dimoun i bezwen soumet an term lenformasyon, ki kalite *assessment* ki ganny fer pou determinen poudir ki en fanmir i kapab ganny sa lasistans si sa rapor i determinen poudir ki Leta i bezwen antre ladan. Mersi.

MR SPEAKER

Minis, wi, ou ava adres sa 2 pwen spesifik. *Cut off point* e son dernyen pwen.

MINISTER ROSE-MARY HOAREAU

Mersi Onorab. Mersi Mr Speaker. Mon pou tous zis lo premye pwen, apre mon pou les PS Kevin pran larestan. Onorab lekspektasyon piblik i enn nou bann pli gro travay, enn nou pli gro defi. E sa i pa en louvraz ki tonm zis lo *Local Government* sa. Sa i en louvraz ki nou tou nou bezwen ede, ki zot koman MNAs, ki mon bann *staff* letan zot al dan distrik, ki lezot lazans ki pase ki pe vin *handle* en dezans ki petet pa konsern nou me i konsern zot.

Tousala i en ledikasyon. Nou bann dimoun piblik i bezwen konpran, nou bann piblik i bezwen konpran. Wi, lasistans i la, ler i merite. Me nou osi nou bezwen fer fason ed nou lekor, si nou war kot nou lo nou propriyete nou vwar poudir sa lateras evantyelman pou degrennen, pa les li degrenn lo ou lakaz ki apre i pa zis fer en dezans, i abim ou lakaz tou apre i vin en lot pli gro depans.

Piblik an zeneral, bann dimoun i bezwen pran responsabilite. Zot osi azir dan en fason pou protez zot propriyete. E aprezan, ler menm si nou tou nou fer en bout Gouvernman i fer en bout, piblik i fer son bout. Si nou tou nou fer nou bout. Krwar mwan

nou pou ariv pli lwen ek sa Bidze ki nou annan.

Me si parey ou dir, nou esper dezans arive apre nou konnen nou ekspekte Gouvernman pou vini; bann zofisyete Gouvernman pou vini, be nou pa pou zanmen avanse. Annou fer en pe travay prevansyon. E sa, sa zafer, sa travay prevansyon i pou vin atraver ledikasyon.

E sa zafer edik piblik i responsabilite nou tou, pa zis kot nou *Local Government*. Tou dimoun i annan en rol pou zwe dan edik piblik lo son lekspektasyon. Mersi Mr Speaker.

MR SPEAKER

Mersi. PS pou azout lo kriter dan *assessment*? Silvouple annou al en pe vit. Nou'n depas bokou letan.

PS KEVIN PERINE

Mersi Mr Speaker. Pou reponn premye kestyon ki i R25 mil *cut off point*. E parey nou'n mansyonnen oparavan, a ler aktyel tou dimoun in fini ganny R25 mil ki ti merit ganny donner. E lezot lasistans ki vin letan i annan dezans i deza egziste. Kot *again* parey Minis in dir *file* i ganny fer, e la nou anvoy kot ASP en dimoun i

kapab ganny asiste *up to* R25 mil.

Savedir i pa vedir ki i pou ganny R25 mil *one go*, i kapab ganny R100, i kapab ganny R25 mil depandan lo sityasyon. E lot kestyon ti lo...

MR SPEAKER

Kriter ek *assessment social*...

PS KEVIN PERINE

Assessment, savedir sa dimoun i bezwen prouve ki i pe travay. Pare pou *share* son lenformasyon labank avek nou. Konbyen dimoun ki reste dan sa lakour? Konbyen larzan ki pe rantre dan sa lakour?

Sa i ganny fer Mr Speaker, akoz i enportan pou nou vwar si vreman lasistans pe al kot bann dimoun ki merite ganny asiste.

E prenon kont ki in deza annan bokou labi dan lepase. E sa i fer pou nou kapab asiste vreman dimoun *upon* merit.

E nou'n deza fer dan lepase atraver *social economic assessment*, nou war en dimoun ki annan R1.2 milyon dan son kont. Selman i ti pe demann led. Mersi Mr Speaker.

MR SPEAKER

Mersi *PS*. Bon, nou a bouz lo prosen letap. Mon'n eksplike lo kestyon 25 ek 28. Onorab John

Hoareau, poz kestyon 25 silvouple.

HON JOHN HOAREAU

Mersi Mr Speaker. Mr Speaker, mon kestyon i lir koumsa;

Eski Minis i kapab donn detay lo kriter ki son Minister i konsidere pou laplikasyon en lasistans anba *Vulnerable Home Repair and Improvement Scheme* e konbyen dimoun ki'n benefisy avek sa lasistans pandan lannen 2022 avek 2023?

MR SPEAKER

Tre byen. Onorab Michel Roucou poz kestyon 28 silvouple.

HON MICHEL ROUCOU

Mersi Mr Speaker. Bonn apre midi a tous. Mr Speaker, mon kestyon i koumsa;

Eski Minis i kapab dir avek nou Lasanble konbyen ka *Home Repair Scheme* ki'n fini anrezistre dan bann distrik e kan ki bann travay pou komanse? Mersi.

MR SPEAKER

Mersi. Minis ou repons.

MINISTER ROSE-MARY HOAREAU

Mersi tou lede Onorab. Mersi Mr Speaker. Mr Speaker,

permet mwan pou fer en pti koreksyon. Sa *scheme* son non i apel *Housing Repair Scheme*. Anba Gouvernman avan ti annan en zafer ki ti apel Pti Payot. Parey konteni bann *file* dan mon Minister, i montre pou vwar klerman bokou labi ek faver politik in ganny fer dan plizyer ka.

Ti annan lapliferans pou bann dimoun ki pa ti ni kalifye, ni merit lasistans anba sa zafer ki ti apel Pti Payot. Dan serten ka, i menm napa rikord pou prouve kote sa Pti Payot in ganny fer.

Koman en Gouvernman responsab, nou'n war li koman nou devwar e nou responsabilite pou re-evalye e diskite ki mannyer sa zafer Pti Payot i kapab ganny ranplase avek en *scheme* byen ankadre avek bann kriter byen kler e dan tout transparans.

E se la, kot *Housing Repair Scheme* ti ganny entrodwir. *Housing Repair Scheme* i aprezan en *scheme* pou soulaz dimoun ki vreman merite e dan bezwen, san preferans politik.

En *Cabinet Paper* ti ganny prepare, e soumet avek *Cabinet* pou laprouvasyon an Avril 2023. Apre sa, en Komite ti ganny apwente. PS Perine ti ganny apwente koman

Chairman sa Komite, e i annan 6 manm lo sa Komite.

Sa Komite i deza komans travay anba sa bann nouvo kriter byen kler e spesifik e dan latransparans. Atraver ou Mr Speaker, mon ti a kontan donn PS Perine laparol pou eksplik bann detay lo travay ki sa Komite pe fer. Mersi Mr Speaker.

MR SPEAKER

PS Perine?

PS KEVIN PERINE

Mersi Mr Speaker. Larepons pou en pti pe long, me nou a esey nou mye pou nou al pli vit posibil. Parey Minis in mansyonnen le 19 Avril 2023 sa Komite ti ganny etabli e aprouve par *Cabinet*. E la Komite ti ganny apwente le 25 Me 2023, ki konpri reprezantan diferan Minister e lazans. Bann manm sa Komite i konm swivan;

Mrs Brenda Morin ki *CEO ASP* i osi *Vice-Chairperson* lo Komite, Mr Jude Florentine ki PS pou lakaz, Mr Dereck Omath ki Direkter Zeneral kot Lazans Lenfrastruktir, Mr Marco Jerry Direkter Divizyon Dezabilite dan Departman Lafanmir, e Sabine Lafortune ki en *Senior Social Worker* dan Minister Sosyal.

E Sekreter sa Komite i Ms Elsie Pointe *Senior Public Relation Officer* kot Minister Gouvernman Lokal. E parey Minis in dir mon ti ganny apwente koman *Chairman*.

Pou kalifye anba sa *scheme* i annan bann kriter spesifik ki'n ganny etabli. Sa i si ou en dimoun ki pe viv avek en dezabilite, en dimoun aze, larzan ki pe rantre dan lakour e par anba R12 mil, ki fer li difisil pou sa fanmir kapab ganny asiste avek en *loan*.

Bann ka i ganny idantifye dan distrik par Lotorite Distrik. La en *file* avek detay nesese i ganny prepare par Ladministrater Distrik. File i bezwen annan kopi *NIN* sa aplikan. Detay lezot fanmir ki pe viv ek sa aplikan. Dokiman legal ki montre ki sa propriyete i pou sa aplikan oubyen dokiman *permission to build* i bezwen dan *file*.

En form konsantman *ASP* i bezwen ganny sinyen, sa i permet nou pou fer resers pou vwar ki vre sa aplikan napa le mwayen pou asiste son lekor. E tre enportan, nou'n koz bokou lo la en *socio economic assessment* i ganny atase avek portre bann domaz lakaz.

Vizit pou fer sa rapor i ganny fer par *DA* asiste par reprezantan diferan lazans, tel

ki *Public Health*, Departman Sosyal, Lazans Proteksyon Sosyal.

Aprè *file* i ganny soumet direkteman avek Ms. Elsie Pointe, Sekreter Komite. Komite i zwenn omwen en fwa par mwan pou evalye bann *case*. La *DA* i prezant son ka avek Komite, en desizyon kolektiv i ganny pran si sa ka i vreman annan merit ouswa non. Bann ka ki'n ganny aprouve i ganny transfer avek Lazans Lenfrastriktir pou bann vizit teknik e prepar *BOQ*.

Tou formalite prosedir *tender* i bezwen ganny fer avan ki proze i komanse. Menm si Komite i tonm anba parasol Minister Gouvernman Lokal e Zafer Kominoter, i bon note ki *budget line* pou sa *scheme* i anba Minister Later ek lakaz.

Mr Speaker, bann detay lo bann ka ki'n pas devan Komite an total 80 ka in pas devan Komite, 40 in ganny aprouve, 24 pa'n zwenn kriter e pa'n ganny aprouve, 16 ka pe *follow up* vizit pe ganny fer lo la atraver lazans lenfrastriktir avan en desizyon final i ganny pran.

5 proze ki ti komanse tar lannen pase in deza fini konplete. 5 lezot proze i ekspekte fini demare byento. Lo

la ki kontrakter in fini ganny prosedir *tender*.

6 proze pe esper laprouvasyon e sir lagreman avek kliyan. 10 proze pe ekspekte al lo *tender* semenn prosenn. 14 ka i dan diferan evalyasyon teknik par zofisye Departman Lenfrastriktir. Mr Speaker, bokou travay in ganny fer e Komite i reste angaze pou kontinyen revwar bann ka e aprouv sa ki merite. Mersi.

MR SPEAKER

Mersi. Mon a pran siplemanter Onorab Hoareau premye. Apre Onorab Roucou, apre sa 2 lezot.

HON JOHN HOAREAU

Mersi Mr Speaker. Mr Speaker, mon ti a kontan konnen, an vi ki bann lodit ki'n fer oparavan in montre ki pa tou sa larzan ki'n ganny bidzete ki'n ganny servi. Mon ti a kontan konnen si zot pou annan en evalyasyon zisteman, pou kapab etabli si sa lasistans pe ganny byen itilize. Si i pe ariv kot sa bann dimoun ki i bezwen?

Apre si Minis ti kapab dir nou, mon pa konnen si i en lenformasyon ki pou kapab *disclose*. Ki kantite ki montan lo dan labank ki zot konsider li koman sibstansyel pou diskalifye en dimoun *from the assistance*.

MR SPEAKER

Mersi. Minis.

MINISTER ROSE-MARY HOAREAU

Mersi Onorab. Mersi Mr Speaker. En keksoz ki mon oule dir, pangar nou bliye dir zot pli tar. Se ki parey *PS* in dir, ler *file* pe ganny deside konmsi *file* i lo nivo distrik, bann lazans i vin vizite eksetera, i enportan pou note ki bann *MNAs* zot bann *respective district* zot osi zot *involved* dan sa desizyon.

Selman *DA* ki ganny *mandate* pou prezante, ki en fason sa prezantasyon i reste enparsyal. Me selman zot bann *MNAs* dan zot distrik, zot annan en rol pou zwe zot osi dan sa *process* al war sa dimoun. *Come forward* avek bann sizesyon bann non ki zot vwar i merite. *Come forward so*, sa bann keksoz i ganny met devan, devan Komite.

Onorab, mon ti a prefere ki nou pa *divulged* sa sonm. Akoz sa i en keksoz personnel, i pa zoli pou anmenn li la. Me selman sa kliyan, sa aplikan li i ganny koze i ganny dir ki prosedir i ete. E *part* sa formalite i osi dir ou *what is the cut off* pou nou kapab ed ou. Mersi Mr Speaker.

MR SPEAKER

Mersi. Onorab Roucou, ou annan siplemanter?

HON MICHEL ROUCOU

Mersi Mr Speaker. Mr Speaker, lamazorite mon kestyon in ganny reponn dan prezantasyon PS. Selman si Minis i kapab dir nou, apepre kantite letan ki i pran pou enn sa bann kliyan ou kapab dir pou zot kapab ganny en larepons pou zot konnen? E si zot annan drwa pou zot kapab *appeal* lo desizyon ki'n ganny pran? Mersi.

MR SPEAKER

Thank you. Minis?

MINISTER ROSE-MARY HOAREAU

Mersi Onorab. Avek ou permisyon mon a demann PS Perine pou reponn sa kestyon *please*?

MR SPEAKER

Tre byen. PS.

PS KEVIN PERINE

Mersi Mr Speaker. Komite i zwenn en fwa tou le mwan. Byensir letan nou zwenn en desizyon i ganny pran. E letan desizyon i ganny pran Onorab, la nou fer konnen Lotorite Distrik atraver DA. E nou osi

anvoy sa dimoun en let personelman pou dir li desizyon ki'n ganny pran.

Me selman par fwa i annan dimoun letan i ganny larepons, i pa kontan larepons ki in gannyen. Wi i kapab *appeal*, e la i anvoy Komite en let pou demann *appeal*.

Me selman lefe i reste ki i annan en formil en kriter ki nou servi. E *base* lo sa kriter ki ki'n ganny spesifye, la en lot ka i ganny konsidere. Mersi.

MR SPEAKER

Thank you. Onorab Naidu.

HON SATHYA NAIDU

Mersi Mr Speaker. Zisteman parey *scheme* i apele *Housing Repair Scheme*, savedir zot fer bann travay relye avek bann reparasyon. Eski i annan en *ceiling* an term lasistans finansyel ki Gouvernman i pou donn sa *household*?

Dezyenm pwen, Minis in fer resorti poudir bann MNAs i bezwen travay ansanm avek bann DAs. E Minis in fer resorti dan enn son bann repons poudir ki DA i prezant ka avek sa Komite. Propozisyon ki mon pe fer se donn MNA osi sa loportinite pou kapab angaz avek sa Komite akote DAL parey nou fer pou *Housing Allegation Committee*. E en *unit* lakaz,

parey in leka St Louis R1.1 milyon. So, nou pe determin lekel ki devret ganny *1 unit*.

Alors, mon panse dan lenstans ki konsern *Housing Repair*. ki bann *MNA* osi i ganny sa loportinite pou asiz akote zot *DA* pou met devan konsern zabitan.

An relasyon avek sa *ceiling*, R12mil ozordi zour mon krwar R12mil per *household* a mon avi *it's a bit to tight* ler ou pe regard sityasyon la deor. Espesyalman ler nou annan scheme *part rental*, nou ep dir R 19 mil koman en *ceiling* pou fer sir... R 18 mil pou fer sir ki bann ki tonm dan sa kategori zot kapab ganny asiste.

Me selman pou *housing repair* nou pe fer li R12 mil. Eski nou pou kapab revwar sa laspe, pou nou fer sir ki nou kapab *reach out to more people* akoz i annan dimoun la deor ki bezwen sa lasistans? Mersi.

MR SPEAKER

Mersi Onorab. Ou'n fer 3 pwen deza. Nou a les Minis adrese.

MINISTER ROSE-MARY HOAREAU

Mersi Onorab. E Mr Speaker, mon kapab demann *PS Perine* pou reponn silvouple?

MR SPEAKER

PS, silvouple.

PS KEVIN PERINE

Mersi Onorab. Onorab, letan nou ti pe diskite avek *cabinet*, nou ti pe prezant sa papye en desizyon ti ganny pran ki *DA* ki prezante. Alors, sa i en desizyon ki'n ganny aprouve par *Cabinet*. Rezon det par deryer sa, se ki nou konsyan poudir bann Onorab zot travay ki zot fer zot pa tou kou *available*.

Akoz nou kapab decide pou zwenn en zour mardi 2 er, oubyen Merkrede 1 er ki sa bann letan zot dan Lasanble. E parey Minis in dir, pou desizyon reste enparsyal. Onorab i antre an diskisyon avek son *DA* kapab prezant bann *case* avek son *DA*. Me selman *DA* ki vin prezant *case*, ki i fer ki napa politik ki antre dan bann prezantasyon *case*.

E *ceiling* ki ou pe koz lo la i annan diferan *ceiling* ki'n ganny met an plas. Par egzant pou *roof and ceilings*, sa fodre pa i desot R100 mil. Pou bann travay *electrical* sa i R50 mil. *Plumbing* 50 mil, striktir 100 mil, pou laport avek lafnet R30 mil. Pou lavarang 50 mil, pou *extension* oubyen renovasyon sa i 100 mil. E pou osi aranz kekfwa lasanm kot sa dimoun pe servi li osi i ariv R100 mil.

E sa i bann baren ki'n ganny met an plas pou nou kapab travay avek. E parey mon'n dir kot vreman ka i merite, e bokou ka i ganny aprouve. Mersi.

MR SPEAKER

Mersi. Bon nou pe apros ler ki nou devret pe pran *break*. Silvouple fer zot kestyon bref, direk. Onorab Monthy?

HON PHILLIP MONTHY

Mersi Mr Speaker. Minis, Cascade nou'n *submit* anviron en pti pe plis ki en dizenn ka. E mwan mon'n *involved* dan tou sa bann cases, akoz mon'n lo teren mon konn sa bann ka byen. E an diskisyon ek *DA*, nou'n *submit* sa bann case.

La o moman aktyel, ki mannyer mon ganny *update* lo sa bann case. Eski mon lyez ek mon *DA*? Mon lyez ek sa Komite? Oubyen mon lyez avek *PS Perine* kot *Local Government*, pou mwan konnen lekel bann case Cascade ki pe ganny *vet*?

Lekel ki'n ganny *approved*? Lekel ki'n ganny rezete? Akoz mon en pe dan en lenpas la pou le moman viz a vis sa bann cases. Mersi.

MR SPEAKER

Mersi. Minis?

MINISTER ROSE-MARY HOAREAU

Mersi Onorab. Mersi Mr Speaker. Onorab, an premye lye si ou oule en *update* kote ki *status* ou bann *files* ki ou'n soumet, annan en diskisyon avek ou *DA*.

Me si ou oule aprofondir serten keksoz lo ou bann cases, napa naryen ki anpes ou telefonn *PS Perine* as the *Chairperson*. Nenport dimoun ki le nenport *MNA* ki le detay lo *status* zot bann *file* ki'n prezante, silvouple pran kontak avek zot *DA*. E osi zot kapab pran kontak avek *PS Perine*. Mersi Mr Speaker.

MR SPEAKER

Mersi. Onorab Loze.

HON JOHAN LOZE

Mersi byen Mr Speaker. Minis dan ou larepons ou'n etal en portre koripsyon ase efreyan ki'n pase dan Gouvernman avan. Alors, mon zis anvi konnen, ki zistans case lapolis in arive. Akoz i menm annan payot disparet *from what you telling us*. Ki zistans case lapolis in arive dan sa bann ka koripsyon ki ou'n aporte avek Lasanble?

E lekel ki pe *follow up* sa case ek lapolis, si ou menm ouswa si ou'n apwent en

dimoun dan ou Minister pou *follow up* sa bann *case*. So, ki zot a kapab kontinyen kit Lasanble *briefed* sirtou dan bann moman ki *case* pe komans pran letap pou al Ankour. Mersi Mr Speaker.

MR SPEAKER

Mersi. Minis?

MINISTER ROSE-MARY HOAREAU

Mersi Onorab. Parey mon'n dir dan mon prezantasyon pandan mon larepons, se ki bokou diskisyon in ganny fer. E bokou dezord, bokou keksoz ki pa *accountable* in ganny vwar.

E i *rest* a vwar ki Komite pou deside fer. Eski parey nou dir ou pou *throw good money after bad*? Ki pa pou abouti nou si nou anmenn sa bann *case* Ankour. Wi, me selman si sa bann dimoun pa la? Si sa bann dimoun in fini mor? Tousala, akoz sa *Pti Payot Scheme* la, i ti pou bann dimoun aze, bann dimoun vilnerab.

Me selman, sa pwen ki Onorab Loze in mont avek i en bon pwen. E si Komite i deside pou pran bann aksyon legal, sa osi i pa en move lide. Mon pa konnen si *PS Perine* ti a kontan azoute.

MR SPEAKER

PS, ou annan en pwen pou azoute? Si ou napa, nou a bezwen satisfè avek repons Minis. *PS*, wi?

PS KEVIN PERINE

Mersi *Minister*. Mersi Mr Speaker. Mersi *Minister* pou donn mwan osi lasans pou azoute. Letan Komite ti ganny formen, avan Komite ti ganny formen ti annan en Komite ki ti'n deza ganny formen pou revwar sa bann *case*.

E la nou ti antre an diskisyon avek *AG's Office* e zot deza okouran ki bann labi ki'n pase anba la. Sa i ava en desizyon ki Gouvernman i ava pran, an regardan sa vye pti payot ki mannyer ti pe fonksyonnen oparavan. Mersi.

MR SPEAKER

Mersi. Nou a pran poz la. Nou a rebran 4er. Mersi.

(BREAK)

MR SPEAKER

Nou rebran avek kestyon nimerò 26. Onorab Waven William.

HON WAVEN WILLIAM

Mersi Mr Speaker. Bonn apre midi Minis avek ou delegasyon. Kestyon i konm swivan:-

Eski Minis i kapab eksplik sa Lasanble, ki bann defi mazer ki pe afekte travay son Minister e ki demars pe ganny fer pou sirmont sa bann defi? Mersi.

MR SPEAKER

Mersi Onorab. Minis?

MINISTER ROSE-MARIE HOAREAU

Mersi Onorab. Mersi Mr Speaker. Onorab mon byen apresye ki sa kestyon i sorti kot ou koman en Onorab byen eksperyanse ki'n dan distrik pour plizyer lannen.

Enn nou bann defi prensipal, se dan domenn resours imen. E sa i en keksoz ki tou *MDAs* i fer fas avek. I pa fasil pour ganny dimoun konpetan e angaze, me nou sey nou mye.

Koman sa Minister fasiliter dan reponn bezwen piblik e ki donn sa servis pour fasilite lavi kominoter, nou war nou pe zer lekspektasyon piblik ki parfwa pa realis. Sa osi i en defi.

Nou vwar nou ozordi pe fer fas avek bokou plis ka dezans natirel e osi bokou kalamite dan kominote tel parey dife, linondasyon e lezot lensidan.

Lezot defi ki nou Minister pe fer fas avek, i problemm vwazinaz. Tel parey diskisyon

antre vwazen, problemm *right of way*, eksetera. Alor ou kapab konpran lentansite e kompleksite nou travay.

Mr Speaker i enportan note, ki Sesel in resaman fer fas avek kalamite pli dir dan son legzistans.

Le 7 Desanm 2023, nou ti eksperyans en kalite dezans ki pa ti'n zanmen deza arive dan listwar Sesel.

Menm si personn pa ti'n prepare pour en tel katastrof, dan sa detres nou'n war *staff* mon Minister ansanm avek bann lezot lazans, lo teren pour asiste e esey mannye sityasyon.

Mon kapab dir avek fyerte ki mon annan en tim solid. Malgre tou defi nou reste rezilyan e touzour angaze pour donn sa bon servis lo pli – pour donn sa servis lo pli meyer fason posib.

Nou pe kontinyen investir dan *capacity building*, pour kontinyen donn nou *staff* tou sipor ek bagaz nesese ki zot bezwen. Sa i a ed zot pli byen delivre dan nenport ki sirkonstans. Mersi Mr Speaker.

MR SPEAKER

Mersi Minis. Onorab ou siplemanter?

HON WAVEN WILLIAM

Mersi Mr Speaker. Mon ti a kontan demann Minis. Prenon kont sa bann defi e ver lavenir; eski Minis i kapab dir avek nou. Par lefe ki nou annan *District Team Meetings* e bann size ki ganny fer sorti.

Eski ou panse poudir apard ki annan sa bann *meeting* e korperasyon ki lo kote bidzeter, petet dan lavenir serten parti bann Bidze serten departman, Gouvernman devret ganny *allocate* avek Minister Gouvernman Lokal?

Par lefe ki ou santi poudir i annan plis aktivite ki zot bezwen fer, ki parfwa i tonm avek serten bann lezot departman? Mersi.

MR SPEAKER

Mersi Minis.

MINISTER ROSE-MARIE HOAREAU

Mersi Onorab. Mersi Mr Speaker. Onorab parey ou'n dir *District Team Meeting - Regional Meetings* i ganny fer regilyerman. E wi la kot tou bann konsern distrik i ganny met devan.

E nou kot *Local Government*, nou kontinyen travay tre pros avek lezot lazans ek departman, ek Minister ki bezwen pran sa problemn anmenn pli devan. Parey

toultan mon dir nou, nou bann fasilitater.

Alor ler nou travay ek sa bann lazans, ler nou travay ek sa bann departman, ler nou travay ek sa bann Minister, nou annan en bon korperasyon avek zot. Nou annan en bon *line of communication*.

Ki si nou war en keksoz pa pe bouz ase vit, nou lev telefonn, nou telefonn sa dimoun konsernen. Nou dir ogarde sa i *outstanding*, annou pouse pour nou fer li arive.

Kontrent bidzeter pour toultan la. E nou bezwen nou tou travay dan sa Bidze ki nou'n gannyen komansman lannen pour nou travay avek.

E ankor enn fwa bann problemn dan distrik ankor enn fwa akoz nou konsern i lo Bidze osi. Nou bezwen ankor enn fwa met priyorite – *prioritize* bann keksoz ki pli irzan e fer triyaz parey nou dir.

E regarde kwa ki pour *handle* avan, kwa ki nou bezwen *allocate* Bidze, kwa ki kapab petet atann en pe plis. Mersi Mr Speaker.

MR SPEAKER

Mersi Minis.

HON WALLACE COSGROW

Mersi Mr Speaker. Mr Speaker, ler mon pe ekout Minis. Annefe

depi bann kestyon oparavan, ki pe – ki i ti pe reponn apre midi la, mon pe remark en keksoz.

I paret mwan parmi bann defi enn bann defi ki zot annan se *DRMD*. *DRMD* i en lazans olye travay ansanm avek zot me i en defi pour zot.

Akoz ozordi zot pe eksperyans par egzant bann glisman later, bann linondasyon, bann landrwa kot pye dibwa i kree danze.

Me *DRMD* atraver son Direkter Zeneral ki preski dir pa egziste, nou pa war li, pa pe kapab donn zot sa bann *assessment* pour anpese ki apre Gouvernman Lokal i anmas sa bann difikilte ki zot pe anmase bann letan dezans.

So eski ou kapab klarifye *DRMD* koman osi en defi Minis? Akoz i paret zot pe anmas tou bann difikilte ki vin apre dezans. Me sa ki sipoze pe fer prevansyon pour ed ou anmas *less* difikilte, pa pe fer son louvraz aköz i pa egzistan sa dimoun. Mersi.

MR SPEAKER

Minis. Ou repons.

MINISTER ROSE-MARIE HOAREAU

Mersi Onorab. Mersi Mr Speaker. Onorab les mwan

reasir ou poudir Mr Ernesta i byen egziste, i byen vivan.

Annefe si i annan en dimoun ki travay *very close* avek *DRMD*, se *Executive Director* Songor. Aköz son louvraz i fer ki i lo teren souvan, i an diskisyon teknik avek sa bann dimoun, avek bann dimoun *DRMD*.

Wi, nou louvraz i diferan. Nou annan – ou vwar nou koman bann *first responders*, *right?* Apre ler tou bann keksoz i ganny finalize nou'n tanporiz sityasyon, *then the next step is bring on board DRMD*.

Akoz si zot, zot annan bann ekspertiz ki nou, nou napa, zot mont lo teren apre landmen ouswa *whatever amount of days – number of days later*, zot mont lo teren avek nou e zot ed nou.

Nou annan en bon korperasyon avek *DRMD*. Mon pa pour kapab koz lo zot defi, ki petet zot - pe anpes zot fer plis ki zot pe fer konmela. E sa se en keksoz pour Mr Ernesta vin eksplike.

Me selman kot *Local Government*, nou pa kapab konplent *DRMD*. Wi nou travay fortman ek zot, nou annan en bon relasyon ek zot. E (pardon) – e nou ganny tou zot sipor dan – ler nou, nou bezwen zot nou *reach out*, zot la pour ed nou.

So, wi parfwa keksoz i pran en pe letan pour arive. Sa mon pa pour *deny*. Me selman nou bezwen konpran parey taler mon'n fer resorti resours imen, i limite partou.

So petet zot osi zot annan zot kontrent, me ler konmsi keksoz i sal, nou ganny tou zot sipor e tou zot korperasyon. E parey mon'n dir, Mr Ernesta i byen vivan. Mersi Mr Speaker.

MR SPEAKER

Mersi Minis. Prosen kestyon nimerò 27 Onorab Waven William.

HON WAVEN WILLIAM

Mersi Mr Speaker.

Eski Minis i kapab eksplik sa Lasanble akòz ki *Daycare Centre* Souvenir pe pran letan pou materyalize? Mersi.

MR SPEAKER

Mersi Onorab.

MINISTER ROSE-MARIE HOAREAU

Mersi Onorab. Mersi Mr Speaker. Onorab nou'n fer plizyer diskisyon konsernan sa proze *daycare*. Ti annan diferan lopinyon lo ki pli bon fason pour servi sa lenfrastruktir kot sa *daycare* pe ganny propoze.

Parey ou konnen nou'n annan konsiltasyon avek

diferan antite, ki ti annan lentere dan sa lenfrastruktir. *Management Team* in rezwenn ankor resaman pour rediskit lo sa size.

Aprè bann long diskisyon, mon Minister in tonm dakor pour fer en *survey* avek bann zabitan Souvenir La Misère. Byensir avek ou lasistans e sipor, mon krwar sa in meyer fason pour les zabitan deside, ki nou pour fer avek sa lenfrastruktir.

Nou ti servi sa metod *survey* avek bann zabitan Perseverance, e i ti mars tre byen. Avan *survey* i komanse an Avril, nou pour rankontre avek ou pour nou fer en plandaksyon ansanm.

Nou pe anvizaze ki sa *survey* pour pran anviron 3 semenn pour konplete. Nou ekspekte annan en desizyon an Me sa lannen, lo desizyon ki zabitan in pran.

Ler *survey* in konplete, nou pour rezwenn ankor avek ou pour diskit *the way forward*, an prenon kont ki i annan en konponan bidzeter ki pour bezwen osi ganny aprouve. Mersi Mr Speaker.

MR SPEAKER

Mersi Minis. Siplemanter Onorab?

HON WAVEN WILLIAM

Mr Speaker, mon ti a kontan demann Minis, ouswa dir avek Minis ki sa proze depi anba ansyen Gouvernman e i ti katriyenm lo lalis bann *daycare* ki sipoze ganny fer dan pei, anba Gouvernman Lokal.

Mon konnen ti annan en problemm avek *India Grants*. Me Minis petet lo kote fer en *survey*, Desizyon bann dimoun La Misère, tou sa bann letan ki mon'n dan Grand Anse Mahe, zot anvi sa *daycare*.

So mwan mon ti a dir Minis par bezwen – *well* mon pa anvi vin malelve, pour dir – konmsi pa bezwen fer sa *survey*. Akoz dimoun i anvi sa *daycare*. Akoz i dan zot labous pe demande tou letan, kan pour fer?

E mon ti ava demande ki zot kapab regarde ki fason nou kapab demare. Akoz i annan sa demann i pa zis pour bann dimoun La Misère.

Me bann dimoun pe desann anvil, Anse Boileau, Port Glaud, si zot konnen poudir i annan en gran *daycare* i fasil pour zot, pour zot zanfan. Mersi.

MR SPEAKER

Mersi. Minis, ou annan en komanter.

MINISTER ROSE-MARIE HOAREAU

Mersi Onorab. Mersi Mr Speaker. Onorab zisteman, annou fer sa diskisyon apre. Akoz parey mon'n dir Bidze i en konponan kle.

E nou bezwen war ki mannyer sa i pour ganny zere e si ou asir nou, ki ou pe reasir nou ki sa demann i vreman bezwen pour en *daycare*. Nou a koze pli tar. Nou a fer enn pti resansman, e nou kapab *move forward*.

Me selman nou pour bezwen planifye nou byen, akoz ou konnen poudir Bidze i en gran konsern. *Alright*. Mersi Mr Speaker.

MR SPEAKER

Mersi Minis. Prosen kestyon numero 29. Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi Minis avek ou delegasyon. Mon kestyon pour Minis i al koumsa; Eski Minis responsab pour Gouvernman Lokal i kapab donn detay avek sa Lasanble lo progresyon *District Road Naming Project*? Mersi.

MR SPEAKER

Mersi Onorab. Minis?

MINISTER ROSE-MARIE HOAREAU

Mersi Onorab. Mersi Mr Speaker. *National Addressing System* i en lot proze ki'n mor an nesans anba Gouvernman avan. *NAS (National Addressing System)* koni konm *NAS* i en proze ki ti ganny konsevwar depi 2012, par Gouvernman sa letan avek *Universal Postal Union*.

Malerezman depi 2012, sa proze pa'n bouz ditou, ziska an 2018. An 2018 Beau Vallon ti ganny swazir koman en distrik pilot, pour donn non provizyonnel bann semen sa distrik.

Aprè sa proze pilot Beau Vallon, lezot distrik ti ganny mandate pour fer sa legzersis. Me malerezman sa pa ti materyalize.

E ankor enn fwa, legzersis *National Addressing System* ti reste enkonplet.

Mr Speaker, sete an 2022, ki mon ti ganny entrodwir avek dokiman inisyal sa proze, par Mr Weber ki *Chairman* Lapos Sesel ek son *CEO*.

Selon la, mon Minister in koman bann demars, pour re-demar sa proze.

Mr Speaker, travay pe byen ale. E nou ti'n tonm dakor avek en *deadline* lafen Fevriye 2024, pour konplet sa legzersis.

Malerezman avek bann dezas ek katastrof ki'n arive, sa in met nou en retar, pour konplet nou travay.

An vi ki sa legzersis *National Addressing System* i enn nou priyorite, 2 semenn pase, nou'n organiz en sesyon travay avek tou *DAs*, *office managers*, e *office assistant* pour revwar nou progre e pour diskit fason pli efikas, pour finaliz sa legzersis.

Enn parmi bann desizyon ki nou ti pran, se pour *allocate* 2 *staff* sorti Sekretarya Minister, ki tre ofe avek bann prosedir *road naming*, pour mont lo teren avek bann *DAs* ek zot bann tim respektif pour ed zot finaliz sa dernyen bout travay.

Dan sesyon travay, nou ti osi envit Sekreter Prensipal pour *Trade* Mr Francis Lebon, ki ti vin re-anforsi lobzektif nesosite e lenportans sa legzersis *National Addressing System* lo nivo lokal e enternasyonal.

Mr Speaker, a ler aktyel bann vizit pe ganny finalize lo teren pour adopsyon non semen e kolekte bann detay nesoser.

Permet mwan pour remersye tou manm piblik ki pe ed nou. Akoz zot kontribisyon anver sa legzersis, i vreman

valab e apresye. Mon osi remersye tou Manm Onorab, pour zot langazman e komitman anver sa legzersis ki sitan enportan.

Silvouple kontinyen travay pros ek zot *DA*. Akoz zot kontribisyon i mandatwar pour ki nou kapab finaliz, sa legzersis byen.

Mr Speaker pour sa proze *NAS* materyalize, i bezwen lekspertiz diferan sekter. Tel ki Minister Finans, Servis Lapos li menm e bann lezot *MDAs*.

Letan ki mon Minister in konplet e finaliz son kontribisyon anver sa legzersis. La lezot *MDAs* pour rantre, pour konplet lezot konponan ki relye avek zot.

Mon kapab asir sa Lasanble ki nou kot Minister, nou konsyan benefis e lenportans sa proze.

Se pour kwa nou determinen pour konplet sa bout travay ki nou'n ganny demande pour fer, a lafen Mars ou pli tar premye semenn Avril. Mersi Mr Speaker.

MR SPEAKER

Mersi Minis. Siplemanter Onorab Adelaide.

HON FRANCOIS ADELAIDE

Yes, Mr Speaker, mon annan siplemanter. Minis dabor mon

le dir ou mersi, ou avek ou lekip pour realiz valer sa travay ki zot pe fer pour sa zafer *road naming* avek *postal code*.

Akoz sa vreman i pour ed nou ler nou pe koz *rural order* tou dimoun pe tandé, *rural order* isi, *rural order* laba. Sa i pour ed nou bokou, *artificial intelligence* - mon fek sorti en –

Tousala i pour ed nou e i pour fer Sesel vin en pei modern. E byensir i pour Baie Lazare, menm ki zot dir nou, nou en distrik ki en pe, en pe dan leo.

Me nou annan en zoli distrik, me ler ou get son bann semen. I par ler i parey sa zwazo ki annan bann zoli, zoli plim be solman son lipye i pa tro, tro soz...

Mon krwar sa i ava ed nou en bon pe pour montre valer nou distrik. Minis, prezan mon kestyon i - eski sa bann semen petet ler nou fini, e mon krwar i ti devret. Eski i pour ganny proklanmen *ok*, pour li vin dan son stati legal?

E petet Minis, bokou dimoun menm mon konnen ki Gouvernman Lokal pe fer en bon pe travay. Petet i annan bokou bann dimoun deor ki annan lekspertiz, ki annan konesans me petet zot pa konn sa proze.

Petet profite ozordi pour envit zot, zot osi pour zot partisipe, pour ki nou fer sa travay vin en travay ekselan. E dabor mon dir ou mersi bokou, nou vreman apresye. *Thank you.*

(APPLAUSE)

MR SPEAKER

Mersi. Wi, Minis?

MINISTER ROSE-MARIE HOAREAU

Mersi Onorab *for your kind words* e mersi Mr Speaker. Mersi pour anmenn sa a mon latansyon. E zisteman la koman mon lo medya mon ti a voudre, parey ou'n sizere lans en lapel avek tou bann dimoun ki konnen, ki i annan en leksperyans, ki i annan en lekspertiz dan *naming of roads* pour vin devan.

Vin ed zot distrik omwen, vin ed zot distrik. donn sa *DA* ek son lekip ek sa *MNA* respektif en koudmen pour kapab fini li lo en bon lanpler.

E parey ou'n dir Onorab zisteman sa bann pwen ki ou'n fer resorti, se sa ki *PS Lebon* in vini dan nou sesyon, pour fer bann *DAs* konpran ek tou son lekip ki sa i pa zis en keksoz ki nou pe fer pour la dan distrik, lo nivo Nasyonal.

Son lenportans enternasyonal osi, son lenpak ki i pour annan ler sa bann – tou sa bann louvraz in fini ganny fer.

(I annan en lot pwen ankor ki ou'n dir mwan) Anh, wi! Ou'n demann mwan si sa bann semen pour ganny proklanmen. Wi. Me selman sa ler nou nou'n fini fer *the name* – rod sa bann semen e donn li en non.

E sa bann non la, nou bann *DAs* ek zot bann lekip zot bezwen al - ler zot lo teren, zot demann bann dimoun ki en pe pli aze akoz sa semen i apel sa non? Si i annan en pti zistwar deryer? Akoz nou apel li tel semen nou pa apel li en lot non?

Tousala en konversasyon ki ganny fer ler bann travayer *Minister Local Government* i lo teren *and I'm sure* avek zot bann *MNAs* osi.

Alor lemoman ki nou nou'n fini fer nou bout, sa bann semen i lo *GIS* - (wi) - *then* ki *facilitate* pour konnen bann bout ki'n fini ganny fer, bann *links*. Selman sa bann *links* i ankor en pe *internal*.

La aprezan nou *handover* avek sa lot Lotorite, ki pour pran li prezan pour anmenn devan, pour legaliz li, pour *proclaim* li eksetera.

Sa selman pa *Local Government* ki pe fer. Nou pour

handover, sa ki nou lenformasyon ki nou, nou anmase nou *handover to the next entity*, aprezan zot, zot pran sa baton, zot ale parey en *relay*.

Ler sa in fini ganny fer pour annan en lot konponan ankor. Sakenn pour annan son bout pou fer. Ziska ler finalman sa proze in entegre dan sistenm. Mersi.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Minis, baze lo ou bann larepons ki ou donnen. E mon konstate, akoz mwan osi, mon enn parmi ki'n dan mon distrik ki'n form par sa legzersis.

E mon santi poudir i annan en pe konpleksite dabor pour kapab realiz dan son totalite, sa legzersis. Minis, mon dir sa akoz premyerman nou annan bann ansyen semen, apre nou annan nouvo semen. *Ok*.

So baze lo sa Minis eski letan zot in anmas tou sa bann lenformasyon akoz pour annan bann sanzman – akoz i annan dimoun pe deza pe servi bann non lo zot ladres.

E si zis ou ale ou sanze i kapab kree serten

lenkonvenyans, si li i pa konnen. *Ok*. So baze lo sa eski bann *finding* finalite, en pe parey i fer avek *National Land Use Plan* kot diskisyon i retourn dan distrik ler zot in fer sa *finding* final e ki ava annan bann konsiltasyon avek tou bann parti prenan parey.

Akoz tou dimoun mon krwar pour bezwen konsernen la, akoz i annan landrwa ki pour annan sanzman dan non. E i annan landrwa petet ki kapab reste parey osi, baze lo bann listwar ki'n deza egziste.

So eski zot pe mazin dan sa finalite avan adopsyon final, annan en konversasyon lo nivo distrik dan son - parey en *meeting* poudir bann dimoun respektif, lala bann propozisyon?

Eski zot annan osi – petet i annan ki ava vin ek propozisyon, e lala ki nou pe met devan zot, pour zot asire poudir zot konnen ki pe pase dan zot prop distrik? Mersi.

MR SPEAKER

Mersi. Minis.

MINISTER ROSE-MARIE HOAREAU

Mersi Onorab. Mersi Mr Speaker. Onorab zisteman i annan en – pour annan par egzantp pour annan *post code*,

pour annan *parcel number* ki pour ed ler pe finaliz, pe *compile* lekel semen? Lekel non ki pour ganny servi la?

I pa pour zis en semen, i pour annan lezot mekanizm, ki bann, sa bann lazans konsernen pe travay lo la Komite pe travay lo la. Pou kapab en *postman* par egzanp, ouswa en dimoun ki pe dan sa distrik pour idantifye kote sa semen i ete? Kote sa lakaz i ete? Malgre petet i kapab annan en sanzman dan non.

Me selman pour annan lezot mekanizm, akoz dan enn bann diskisyon ki mon antann, pour menm annan bann petet posibilite en *postcode*.

Parey nou tou ler nou vwayaze i annan - e sa *postcode* annandler sa ladres pa ni enportan, sa *postcode* i pli enportan. Si ou pa met sa *postcode* ou let i vir an ron.

So i annan bann mekanizm modern ki pour ganny entrodwir ansanm avek sa - ki pour ganny dan son *final stages* ki pour ganny mete ansanm avek sa bann semen.

E pour kwa pa, parey ou dir fer en, i pour en ledikasyon anmenn li dan distrik *per district*, dan sak distrik. Anmenn li fer li en ledikasyon ki bann zabitan i konpran ki pe

pase. Sa en bon sizesyon. Mersi.

MR SPEAKER

Mersi Minis. Onorab Georges.

HON BERNARD GEORGES

Mersi Mr Speaker. Minis mersi bokou pour ou leksplikasyon e permet mwan poudir ki sa legzersis i enn ki byen itil e ki pour ed bokou dimoun.

Par egzanp i ava asire ki nou bann zanmi dan Lopoziyon, ler zot envit - parey zot in fer pour dernyen eleksyon zot bann siporter pour enn pti parti bwar.

Zot pa pour bezwen envit zot vin anba pye ponm lo glasi, me zot a kapab dir Semen Baroza oubyen Semen Cosmoledo, parey la prezan zot pour kapab fer li.

Mon - atraver sa mon kestyon pour ou se sa enn swivan; Dan mon distrik, mon *DA* avek mwan depi deza 1 an, oubyen 18 mwan nou'n fini fer sa travay, nou'n resanz tou bann semen, tou bann non nou'n eksplike akoz zot annan sa non.

Nou'n anvway anba - mon sipoze kot ou Minister. Eski se se sa travay ki ou pe koz lo la? E si wi ki zistans nou'n arive lo en plan Nasyonal pour met sa travay a son term?

Kot nou kapab dir ki la nou'n resanz tou bann semen, nou konn zot non. E prezan nou bezwen - nou kapab *move to the next step*. Mersi bokou Mr Speaker.

MR SPEAKER

Mersi. Minis?

MINISTER ROSE-MARIE HOAREAU

Mersi Onorab. Mersi Mr Speaker. Pour lemoman la, nou annan 6 distrik ki'n fini konplete lo sa nivo parey Les Mamelles.

I annan serten distrik ki ti pe ganny enn pti pe difikilte e se pour kwa aprezan nou'n met bann sipor ekstra. Parey mon'n dir, 2 dimoun ki *well versed* dan *name – road naming*, kot Minister, ki'n *actually involve* depi avan. Depi dan 2012, 2018.

Alor la zot osi zot pe montre, zot pe donn sa sipor zot lekspertiz. E sa pe ed nou bokou pour finaliz sa proze. Parey mon'n dir, nou anvizaze fini sa *handover*, nou travay avek PS Lebon pli tar premye - lafen premye semenn Avril.

E vwala kot nou ete e depi ler ki nou'n fer sa rankont apepre 2 mwan - 2 semenn pase avek tou DAs ek zot tim. Nou'n fer en triyaz, kwa ki nou'n -

konmsi la nou - dezas in donn nou enn pti pe rekour la, nou pa tro *busy* lo teren avek dezas.

Aprezan la bann DAs i kapab konsantre fortman dan sa legzersis. E vwala ki fer mwan konfidan ki dan 3 semenn nou pou'n kapab *handover* nou travay avek PS Lebon.

E parey mon'n dir, *once* nou *handover*. La bann lezot keksoz ki pour vin avek sa prezan en lot tim i ava pran, pour vin petet devan zot, pour eksplike, ki *what the next step is*. Me nou, nou konnen nou pe fer nou bout la lo teren. Mersi Mr Speaker.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Chairman. Mr Chairman, prenon kont bann larepons ki Minis – (*sorry* Mr Speaker). Prenon kont bann larepons ki Minis pe donn nou e lefe ki in dir nou ki sa ti'n mor anba Gouvernman presedan, Ladministrasyon presedan, enn bann keksoz ki'n pa'n ganny fer.

E mon swiv parol Prezidan ki bann keksoz ki en Gouvernman avan in komanse, i ganny fini par en lot Gouvernman.

Mon ti a kontan demann Minis *cost wise*, ki kantite resours nou pe anvizaze al mete dan en legzersis *naming of roads*? In annan en legzersis *naming of roads* resaman la, ki'n arive kot nou'n war bann *signs* ganny mete dan fernwanr lo bann semen.

Mon prezimen sa enn pa pour parey. Me *cost wise* konbyen sa pour koute? Akoz pa bliye nou pe koz *naming of roads* e sanz non bann semen la, dan en moman ki *Bill* elektrik in mont, *almost twice what it is*.

Konnen, *I mean - I'm talking about prioritizing* keksoz a sa moman la e bann tou sa bann keksoz ki Minister i annan pour fer, parey ou'n dir nou *deal* avek bann *mitigation problem*, dezaz, pye dibwa koupe.

So, konmsi *cost wise*, eski zot pe *prioritize* sa *as something* ki la, la, la, la, la, oubyen zot pe regard bann keksoz, ki pli esansyel ganny fer avek movetan, sanzman klima *and everything*?

Pour ki zot kapab asire ki zot pe delivre lo manda, *rather than* al *chase after* en *red herring so to speak*, oubyen *down* en *rabbit hole*. Ki apre nou kontinyen ek *naming of*

road for the next two, six years, me nou'n met en resours ladan.

So cost wise sey donn nou en nide...

MR SPEAKER

Mersi.

HON SEBASTIEN PILLAY

... e Mr Speaker avek gran lazwa mon dir ou ki nou *next* parti ki nou pour fer se *State House* an 2025. Mersi.

(APPLAUSE)

MR SPEAKER

Minis ou repons lo *cost* e priyosite.

MINISTER ROSE-MARIE HOAREAU

Mr Speaker mon pa ti a voudre pronons mwan lo *cost* akoz mon regrete mon pa'n anmenn sa *figure*.

Me selman, mon kapab dir ou ki nou'n ganny en Bidze, sorti kot Minister Finans. I pa en gran Bidze akoz nou nou'n ganny en Bidze pour nou fer nou bout.

I pa en gran Bidze, me akoz laplipar travay pe ganny fer par bann *DAs*, ki zot pe fer li dan ler travay, alor i pa vin en kou adisyonnal pour nou.

Me selman ki Finans in met a nou dispozisyon. En

larzan parey en *allowance* pour ed bann manm piblik ki pe mars ek nou, ki konn distrik pli byen petet ki nou, pour ed nou. Alor i annan en *allowance*.

E si mon rapel, mon bann detay ki mon'n gannyen an 2018, R2000 ti ganny donner *per* pour sak volonter. Mon pa tro konnen ki Bidze Finans in donner safwasi, mon bezwen al re-verifye.

Me selman in en keksoz ki ki'n la e i normal ki sa bann volonter i ganny en *allowance*. Akoz sa ti en keksoz ki ti pe ganny fer depi avan.

Be selman malgre sa *allowance* an 2018, zis Beau Vallon ki ti ganny fini, leres pa'n ganny fer. So la nou pe rebran, lo en baz kominoter, pa pe kout gran larzan, zis enn pti *allowance* pour donn bann manm piblik ki pe ed nou, se tou. Mersi Mr Speaker.

MR SPEAKER

Mersi Minis. Bon nou'n ariv a lafen sesyon kestyon pour ozordi. Premyerman permet mwan remersye Minis e son tim pour zot partisipasyon e byensir mersi bann Manm pour zot kestyon.

Nou ava *adjourn* la e Lasanble i a rebran demen bomaten 9er avek bann Mosyon ki nou, lo *Order Paper. Adjourn.*

(ADJOURNMENT)

